


# APOCALYPSE, KAPU YA YIYA

## KITINI YA II

 Mu kele na kyese mingi dyaka na suka yayi. Mu vwandaka banza kaka na mutindu ti mvula ya mpembe yayi . . . Ntangu yayi, mpe kana beto vwandaka na Colorado, mvula ya mpembe yayi zolaka vwanda kieleka ya lembami mpe ya pete, mpe zolaka vwanda pene ya makumi yiya na yisi ya zelo, mpe beno lendaka sala, *hah*, kufula mutindu yina, mpe ya ke kuma mbala mosi fundu-fundu. Mpe ya ke vwanda mutindu yina hiver nyonso. Kasi ntangu yayi, mutindu awa, na yayi . . . mutindu na kati-kati, na kati-kati ya bizunga, ntangu yayi ya ke kumaka kieleka maza-maza mpe poto-poto mpe yimbi, mpe—mpe ya ke talana kaka mutindu ti mu—mu lenda pumbuka kaka, kuna na Arizona, mpe kuingila tii printemps ke kwiza mpe kuna kuvutuka.

<sup>2</sup> Ya kele mutindu yina beto nyonso ke vwandaka na miyoyo, ba-microbe mpe nyonso ntangu yayi kele kaka ya kulala na ntoto mpe ya ke kangama mpe na manima ke sulumuka, mpe na manima ke kangama mpe na manima ke sulumuka. Mpe yawu ke mata mpe beto ke pema na yawu, mpe ke kuzwa mpasi na laka, bayintu mpasi, mpe kutatika mpe bampasi. Mpe, oh, oh, wapi nsungi, wapi mutindu ya kisika.

Kasi ya kele na Yinsi yankaka kuna na simu ya  
nzadi,  
Yina ba ke bokilaka ya mbote ya kukondwa  
nsuka,  
Mpe beto ke kuma kaka na Yinsi yina na  
lukanu ya lukwikilu;  
Mosi na mosi beto ke nunga nkotolo yina,  
Kuna kuzinga na bantu yina ke kufwa ve,  
Kilumbu mosi ba ke wakana bangunga yango  
ya wolo samu na nge mpe munu.

<sup>3</sup> Ya kele kisika beto ke kwenda na Yinzo samu na kuvwanda kuna, mutindu yina ve? Ya kele kilumbu yina beto ke na kusosaka.

<sup>4</sup> Ntangu yayi, mazono na nkokila kieleka mu sepelaka na malongi ya kitoko yina mpe bima yina mu kuwaka na bampangi ya munu. Wapi kisika kele Pat Tyler, yandi kele awa na suka yayi? Pat, oh, mu vwandaka me mona nge ve ya kuvwanda kaka kuna mutindu mbombo na kizizi. Mpe—mpe mu—mu monaka nge ve ya kuvwanda kuna. Mbala ya ntete mu me kuwa Pat . . . kuwa Pat kuzonka; Kieleka mu me sepela yawu, mu ke kwikila ti beto nyonso.

<sup>5</sup> Mpe na manima ntwenya ya bakala yina pesaka kimbangi yina ya tiya ya dilongi awa yina kieleka wakanaka mutindu masini ya munduki ya tiya. Mpangi mosi, mu kutanaka na yandi, na Ohio. Yandi kele awa na suka yayi? Kisika mosi awa? Mpangi Neville simbaka mutindu ya yandi ya kuzonza ya mbangu mingi.

<sup>6</sup> Mpe Mpangi J. T. Parnell. Mpe—mpe mu banza ti bawu kumaka ve na Mpangi Beeler. Mpe yandi kele awa, Mpangi Parnell? Mpangi Parnell, Mpangi Beeler? Mu zaba ve, mu banza ti mu monaka Mpangi Beeler.

<sup>7</sup> Minda yayi, yayi kele. . . Ntangu ba ke tunga tabernacle ya malu-malu, Mu banza ti bawu ke yidika kima yango mutindu yankaka, na mwa mutindu yankaka. Yayi kele mosi ya beto ya ntete, ya kumeka. Mpe na yawu beto me kuzwa mosi ya malu-malu, mbote, beto zola yawu mwa mutindu yankaka na yayi; beno lenda mona ve; Mu ke zola tabernacle kuvwanda ya kutunga mutindu kukulumuka mutindu *yayi*, na kutalaka bantu. Beno ke na kutalaka mbala mosi bantu ntangu nyonso. Mpe kuna kulutila na balukutakanu ya kumona, beno lenda tala kaka bisika nyonso. Beno me mona, kubaka kaka bawu bisika nyonso mutindu yayi, na manima mpe na mantwala. Mpe kuna, kana beno ke kuzwa mwa balcon samu na kubasika, ya kele mbote.

<sup>8</sup> Mpangi Littlefield, kana Billy kele awa, yandi bokilaka munu mazono na nkokila mpe yandi ke fidisa munu plan ya tabernacle yina mu byekaka kuna, yina ba-architecte. . . Mpangi Wood, ya ke lomba mbongo, mu banza, bankama tanu ya ba-dollar kaka samu na architecte na kufikula yawu. Mpe yandi—yandi ke fidisa yawu na ntalu mpe na bima nyonso ya bisalulu mpe na bayinda mpe na bitezo nyonzo yina ke kwenda na yawu. Mpe yandi ke fidisa beto yawu, mpe yandi ke zola kukwiza; mpe yandi tubaka ti yandi ke kwenda na bisadi-mabaya mpe nyonso mpe kumona kana yandi lendaka kuzwa na bawu kukatula fyoti ya mbongo mutindu bawu salaka na yandi. Tabernacle ya kitoko mingi, ya nene mingi ve, kasi ya kele yinzo ya kitoko.

<sup>9</sup> Na yawu mu tubaka na yandi, mu tubaka, “Mu—mu ke pesa yawu na ba-administrateur mpe ba-diacre na yina beno ke fidisa yawu na Billy mpe—mpe kuna beto ke bika bawu kumona mbongo yikwa bawu ke kuzwa samu na kubanda kutunga.”

<sup>10</sup> Yandi tubaka, “Ntangu beno ke banda yawu, mu ke kwiza, mu ke lwata lele ya munu ya kisalu mpe ke vwanda kaka na beno ntangu nyonso yina.” Mpangi Littlefield kele kieleka muntu ya mbote, muntu ya lemvo, ya mbote mingi.

<sup>11</sup> Ntangu yayi, beno nyonso ke na kuwa mbote na yawu, na kubanda Mvula ya Malu-malu ntangu yayi? Amen! Kusabuka kaka Mvula ya Malu-malu. Beto ke zola kaka kubanda yawu, na kusadilaka Mfumumu. Bantu yikwa telamaka na suka yayi mpe tondaka Yandi samu na mvula ya ntama mpe nyonso

yina ya zolaka tuba, mpe lombaka Yandi, “Na kuzimbana yina lutaka”? Beto salaka yawu kuna, na lweka ya mbeto ntangu beto vumbukaka, mpe na manima kwendaka na mesa mpe na mwa kisika yango ya autel ya dibuta, beto vukanaka na mesa mpe sambilaka.

<sup>12</sup> Mpe na yawu beto ke mekaka na kusala yawu kima ya mumesanu na kusambilaka bankokila ntete beto kwenda na mfulu. Mu kele, na yawu, tuka mu ndimaka ntete. Ntangu mu ke vumbuka na suka, mpe ti ya kele na mpimpa mingi mpe dibungi mingi samu na munu na kutambula, mu—mu zaba ve wapi kisika mu ke kwenda. Kasi kana mu lomba kaka na Yandi na kubaka diboko ya munu mpe kutwadisa munu kilumbu mosi.

<sup>13</sup> Kuna mu ke bambuka moyo, kaka awa na simu ya bala-bala, ntangu mu vwandaka kaka ntwenya ya bakala, Billy Paul vwandaka na bamvula tatu, to yiya, mpe beto vwanaka zinga kaka na simu yina ya bala-bala. Mpe mpimpa mosi yandi vwandaka sosa maza ya kunwa, mpe ya vwandaka na kikuku, louche vwandaka na kipanu. Mpe mu tubaka. . . Oh, mu vwandaka kieleka ya kulemba, mu salaka kilumbu ya muvimba mpe longaka ndambu ya nkokila. Mpe—mpe yandi tubaka, “Papa, mu—mu zola kunwa maza.”

<sup>14</sup> Mpe mu tubaka, “Billy, kwenda kaka na kikuku kuna, ya kele na zulu ya mesa ya fyoti.” Mu tubaka. . .

<sup>15</sup> Yandi telamaka, nikaka meso ya yandi, mpe talaka kuna, yandi tubaka, “Papa, mu kele na boma ya kukwenda kuna.” Beno me mona?

<sup>16</sup> Mpe mu tubaka, “Mbote, ya kele. . . ya kele nyonso mbote.” Mu tubaka, “Kwenda kaka, cheri, mpe baka maza. Papa kele ya kulemba mingi.” Ya vwandaka kaka ntama, mutindu tii na nela yina.

Mpe yandi—yandi tubaka, “Kasi mu kele na boma ya kukwenda, papa.” Beno me mona?

<sup>17</sup> Na yina, mu telamaka na mwa mwana yango. Mpe yandi tandaka diboko mpe simbaka diboko ya munu, mpe ya vwandaka kima ya mbote; beto tambulaka ve bitambi yiya to tanu ti yandi tutaka tapis ya fyoti yina vwandaka na dibaya yina Meda kusaka, kitini ya linoleum, mpe beno zaba mutindu ya kele. Mpe yandi zolaka kubwa, kasi mu vwandaka na diboko ya yandi, mpe kuna yandi simbaka kaka munu ngolo mingi. Mpe na yina mu telamaka kuna mwa fyoti, mpe mu banzaka, “Nzambi, ya kele kieleka.” Beno me mona? “Mu zola ve kusala dikulu mosi kukondwa ti Nge simba diboko ya munu, samu ti mu zaba ve ntangu mu ke syelumuka.” Beno me mona? “Mpe ntangu mu lendaka kuwa diboko ya Nge ya nene, ya ngolo nyonso kusimba ngolo ya munu, mu zaba ti Nge ke simba munu na bantangu ya munu. . .” Beno me mona?

<sup>18</sup> Na yawu mu ke mekaka kusala yawu mumesanu, samu—samu na kubika diboko ya munu na ya Yandi. Mpe bambala mingi mu me salaka bima yina monanaka ti ya vwandaka buzoba na meso ya munu, bima yina vwandaka ve ya kulunga samu na mabanza ya muntu; kasi kana beto bika yawu kaka, mu ke mona ti ya vwandaka kima kaka yina lendaka salama na kuvwanda ya kusungama.

<sup>19</sup> Beno zaba, bima yina kele mbote ve awa, kana Nzambi kutwadisa beno na kati ya yawu, ya ke vwanda kaka na kikuma awa kisika mosi, beno me mona, samu ti Yandi zaba mutindu ya kutwadisa. Na yawu, na kumonaka ti Yandi kele lemvo ya beto nyonso ya kulunga, mpe nyonso yina beto kele na yawu nsatu to yina beto kipeke kele na Yandi, na yina beto tula nyonso yankaka na lweka ya Yandi mpe simba diboko ya seko ya Nzambi.

<sup>20</sup> Beto vwanda yimbaka nkunga mosi awa, ya me kuma bilumbu mingi ti mu me kuwa ba yimba yawu. Ntangu yayi, mu me zaba kuyimba ve mpe ya kele. . . Mu banza ve ti ya kele na banzena na kati ya beto. Na yawu mu . . . Ya kele samu na yina mu ke meka mwa bankunga yayi, samu ti mu ke zolaka kaka yawu. Mpe Gene, kana nge ke bika yayi kukota na bande kuna samu na bantu! Beto vwanda yimbaka mwa nkunga yayi awa:

Ntangu kele ya kifuluka na nsobolo,  
Kima ya mpamba ve na zulu ya ntoto ke simba  
ngwi.  
Tunga kivuvu ya nge na zulu ya bima ya  
Kukonda nsuka,  
Simba diboko ya seko ya Nzambi!

Bantu yikwa ya beno me kuwaka ntete nkunga yango? Oh, mu zola yawu, ve? Beto meka nzila mosi ya yawu:

Simba diboko ya seko ya Nzambi!  
Simba diboko ya seko ya Nzambi!  
Tunga kivuvu ya nge na zulu ya bima ya  
Kukonda nsuka,  
Simba diboko ya seko ya Nzambi!

Beto meka nzila yankaka:

Ntangu nzyetolo ya beto kele,  
Mpe na Nzambi beto vwandaka ya kieleka,  
Yinzo ya beno kuna na Nkembo,  
Moyo ya beno ke mona!

Simba diboko ya seko ya Nzambi!  
Simba diboko ya seko ya Nzambi!  
Tunga kivuvu ya nge na zulu ya bima ya  
Kukonda nsuka,  
Simba diboko ya seko ya Nzambi!

21 Beto telama kaka ntangu yayi mwa minuti fyoti samu na kisambu, kana beno zola, na yina beto ke telemisa mosi ya maboko ya beto na Nzambi mpe kuyimba dyaka yawu:

Simba diboko ya seko ya Nzambi!  
 Simba diboko ya seko ya Nzambi!  
 Tunga kivuvu ya nge na zulu ya bima ya  
 Kukonda nsuka,  
 Simba diboko ya seko ya Nzambi!  
 Lula ve bima ya mpamba ya yinza,  
 Yina ke bebaka na nswalu nyonso,  
 Tunga kivuvu ya nge na zulu ya bima ya  
 Kukonda nsuka,  
 Yina ke luta ata fyoti ve!

22 Tata ya Mazulu, na yina beto me telama, Mfumu, beto ke zolaka kaka kuyimba bankunga yina ya ntama, ya ke kulumukaka na mudindu ya kati ya ntima ya beto mpe ke lakisa luzolo ya beto na Nge, Nzambi ya moyo. Mpe na yina beto me telemisa maboko ya beto, Mfumu, na suka yayi, ya vwandaka samu na kuzola kutuba ti “Simba maboko ya beto, Mfumu.” Mutindu mu vwandaka tubila na Billy Paul, mutindu ti yandi kangamaka diboko ya munu, yandi zolaka kubwa kana ti mu simbaka yandi ve. Mpe, O Nzambi, bambala yikwa beto zolaka kubwa kana Nge simbaka ve diboko ya beto! Na kubanzaka mutindu ti yandi, ya kukondwa mama, na kuvwandaka mwana ya bébé . . . mpe mutindu ti . . . mpe mutindu na nzila ya luzingu, banzila yina yandi bakaka, ya zolaka fwa yandi ntama mingi, kasi ya vwandaka na Diboko mosi ya nene yina lendaka kusimba yandi kisika ya munu lendaka ve kukuma, mpe simbaka yandi. Ntangu yayi, beto ke vutula matondo mingi samu na yawu.

23 Kyese mingi na kuzaba, Mfumu, ti ntangu beto ke kuwa moyo ya beto kukabuka na nzutu yayi, ti ya kele dyaka na diboko yina beto lendaka simba mpe kubaka, yina ke twadisa beto na kusabuka nzadi. Beto ke tonda Nge samu na bima yayi, na kivuvu yayi, kivuvu ya kulutula lusakumunu yayi yina kele na beto, Kizundu ya moyo, yina ke kanga beto ngwi na yina beto ke sala nzyetolo yayi to ke luta na mubu ya luzingu.

24 Mpe beto ke sambila, Tata, ti mutindu powete tubaka, “Mpangi ya mawa, mpe ya kulemba, na kumonaka kutelama ya beto ya ngwi (na masuwa), na kumonaka yawu, kuzwa dyaka ntima, to kuzwa dyaka ngolo mpe kumeka dyaka”; kuzaba ti Nzambi ya kulunga nyonso, kana beto tuta dibaku to kubwa, ti diboko ya Yandi ya nene kele kuna samu na kusadisa beto. Lemvo ya Yandi kele ya kulunga.

25 Ntangu yayi beto ke sambila, ti Nzambi, na suka yayi, ti beto ke banda Mvula ya Malu-malu yayi na bankunga mpe kuyimba mpe kusepela, mpe na kuzabaka ti Nzambi ke twadisa beto na nzyetelo ya luzingu mpe tii na nzadi ya lufwa, na Yinsi yina ya

nsilulu. Meso ya beto ke na kutala na lweka ya Jourdain yina kele na yinto yina ke na kukuma nene, na kisika bilanga ya—ya trefle mpe bilanga ya matiti yina kele ntangu nyonso ya mubisu ke na kukula, mpe beto ke sambila, Nzambi, ti myoyo ya beto ke simba vision yina mpe ke bika yawu ata mbala mosi ve. Kilumbu ntangu beto fwana kwiza na yinto yina kisika yawu ke sabukaka, ti, mutindu Elie ya ntama, ti Robe ya Nzambi kubula bayinto ya lufwa mpe ti beto ke tambula kukondwa boma. Pesa yawu, Mfumu.

<sup>26</sup> Sadisa beto na yina beto ke belama na Ndinga ya Nge. O Mfumu, mu ke sambila ti Mpeve-Santu ya Nge kupakula Ndinga yayi. Kieleka beto kele ya kulunga ve na kulonga yawu, na kuvwandaka ve mulongisi. Beto zaba ti mutindu kaka ti beto lendaka zaba Yawu kele ti mfumu Mulongisi ya nene yina kukwiza mpe kubaka kisika ya Yandi—ya Yandi ya kuzinga na kati ya bantima ya beto, mpe—mpe kununga mabanza ya beto na mutindu ti (mpe bambanzulu ya beto) tii kuna beto ke . . . Yandi ke tendula samu na beto Masonuku ya Santu. Kieleka beto ke na kutala yawu.

<sup>27</sup> Mpe kubanza na yawu, Nzambi, oh, mutindu ya kele mbote ti Tata ya moyo mutindu yina, yina vwandaka na . . . yina kele kieleka kisina ya Seko, kukulumuka na bantu ke kufwa mpe kusadisa beto, mpe ke nata Ndinga ya Yandi mpe ke pesa Yawu na bayinwa mpe bantima mpe makutu ya beto samu ti beto kuwa Yawu mpe kuzinga, samu na kuvulusa beto na nsingulu yina beto kuzwaka kima ve ya kusala na yawu, Tata, samu ti ya salamaka na nzila ya muntu mpe beto kele bankuna ya bakwelani yina—yina ya ntete. “Mpe beto kele ya kubutama na disumu, ya kusala na disumu ya nko.” Kasi Nzambi ya moyo zaba ti beto vwandaka na kima ve ya kusala na yawu, kasi me sala nzila ya kukimina mpe me pesa beto bweso ya kukwiza. Mutindu beto kele na kyese na kukwiza na Yinzo ya Tata!

<sup>28</sup> Beto ke sambila ntangu yayi, ti Nge ke sakumuna dibuundu ya beto awa, Mpangi Neville, pasteur ya beto—ya beto ya mbote, kisadi ya Nge ya kukikumusa. Beto ke sambila samu na ba-diacre ya beto mpe ba-administrateur ya beto, ti Nge ke pesa bawu mvula ya kulutila nene na yina bawu me kuzwaka. Pesa yawu, Mfumu. Pesa bawu luzingu ya yinda. Pesa bawu ngolo, Mfumu, bawu kele bisadi ya Nge. Ti bawu ntangu nyonso kuvwanda mbote na kisika ya bawu ya kusala. Sakumuna misambidi, bamambebe, bana ya Nge ya luzolo yina ke kwizaka na yinzo yayi. Nzambi, beto ke lomba moyo ya mosi na mosi ya bawu yina ke sabukaka nkotolo ya yinzo yayi. Beto ke lomba yawu samu na Nge, Mfumu. Sadisa beto na kuvwanda mutindu ya milongi yina ke nata Ndinga na malembe mpe na kieleka nyonso, na nzila ya Mpeve-Santu, ti bawu ke zola kuvwanda mutindu Nge, Mfumu. Pesa yawu. Belusa bambevo mpe bantu

ya mpasi yina ke kwiza. Mpe bisika nyonso na yinza, pesa yawu na konso yinzo ya Nzambi.

<sup>29</sup> Na nsuka, ntangu Nge ke manisa, Mfumu, ti beto kota na bankotolo ya Nge, kuvwanda na mesa ya Nzambi yina ke yambaka, mpe kudya mpe kuzinga kintwadi na nzila ya bansungi ya seko. Na kuvingilaka yina, ti beto vwanda na mavimpi ya mbote mpe ngolo, nsayi, kyese, lulendo mpe lenda, mpe balusakumunu ya Mpeve-Santu samu na kutwadisa beto. Beto me lomba yawu na Nkumbu ya Yesu. Amen. Beno lenda vwanda.

<sup>30</sup> Mu me sepela na muziki yina ya mbote na suka yayi. Ti . . . Mu vwandaka me kwiza kaka, na ntangu ya mbote, vwandaka zonza na nkundi ya munu ya mbote, Mpangi Skaggs, mpe—mpe Mpangi Gene na manima kuna, mpe mpangi yankaka ya bakala na lweka ya kyelo; ti mu kuwaka kaka ya yawu fyoti, kasi ya me bakama kieleka mbote.

<sup>31</sup> Wapi mutindu beno nyonso ke na kusepela na Apocalypse? Mbote mingi? Mu banza ya muvimba mutindu mwana ya munu ya kento, Sarah, kuna na manima, ya me kuma “bakukolama” samu na munu, ya kele kaka—ya kele kaka bakukolama yina ke landila mpe ke landila. Beno zaba, mu ke zola ti beto vwanda kaka na ntangu yayi tii pene Ngonda ya tatu to Ngonda ya yiya, kutula kaka lele mosi ya nene kuna na manima awa mpe kukwiza kaka na kilumbu mpe kufikula bizizi yango mpe bidimbu nyonso, mpe kuzibula kaka yawu mpe kufutika yawu mutindu balele ya nela, beno zaba, mutindu mu ke lotaka ntangu nyonso ntangu yankaka na kuzwa tabernacle ya nene kisika mosi kisika mu lendaka tanda diboko mpe kuzibula bidimbu yayi, yina ke vwanda nzila nyonso na estrade; mpe baluzayikisu mpe balutendulu yina Mfumu pesaka munu, mpe kubaka mwa yinti mpe kubanda nzila kuna mpe kubasisa bansungi yayi. Na yina ntangu beto ke manisa na yawu, kuzibula mosi, kufutika yankaka yina mutindu *yayi* mpe kubanda na yawu, mpe kulongila yawu. Oh, ya ke vwanda kaka mutindu mwa mazulu, mutindu yina ve? Kuvwandila kaka hiver ya muvimba, kuvwandisa kaka yawu na Mfumu.

<sup>32</sup> Na yawu ya kele mbote na muntu na kuvwanda yandi mosi na Yandi! Beno zaba, beto vwanda yimbaka nkunga, “Ya kele na bantangu mu ke zolaka kuvwanda munu mosi na Klisto Mfumu ya munu, mu lenda tuba na Yandi bampasi ya munu nyonso.” Beno me mona, ya kele mutindu ya kusala. Ba vwanda yimbaka, Roy Davis, vwanda yimbaka mwa nkunga mosi, *Kubika Bantu mpe Kusambila na Yesu*. Nyonso ke lakisaka kaka . . . Nyonso yina beno lenda tala ntangu nyonso ke vutulaka kaka na nzila ya Yesu Klisto, ve?

<sup>33</sup> Ntangu yayi, na bansungi ya dibuundu yina beto tubilaka, bilumbu nana ya nsuka yayi na balukutakanu. . . Na yina

mazono na nkokila mu banza ti beto bakaka nzila ya 2 ya kapu ya 4 ya Apocalypse. Mpe mu banza ti beno nyonso vwandaka awa mazono na nkokila samu—samu na kuwa yawu. Mpe na yawu mu . . . mu banza kana mu baka nzila mosi to zole ya yawu na suka yayi, mpe . . . To wapi ntama Mfumu ke twadisa, mu zaba ve. Mu kumaka awa tii nzila ya 6 to nzila ya 7, kaka mwa bisono ya kusonama awa kisika mu lendaka vutuka na kutala na bantangu yankaka na Masonuku mpe kubasisa bima yango, mpe kisika mu tangaka mazono.

<sup>34</sup> Mpe ntangu yayi, beto ke tala ti, beto sukaka mazono na nkokila, mu banza, na nzila ya 2, na mbandukulu ya kapu ya 3, mu banza ti ya vwandaka yawu. Mpe beto sukaka kaka na “Ndinga ya Mpungi.” Ya vwandaka yawu ve, “Makelele ya Ndinga”? Beno bika munu kutanga yawu nyonso samu beto vutukila ntangu yayi:

*Na manima ya yayi mu talaka, mpe, tala, kyelo vwandaka ya kuzibuka na mazulu: mpe ndinga ya ntete yina mu kuwaka vwandaka mutindu ti ya vwandaka ya mpungi vwandaka zonga na munu; yina tubaka, Mata awa, mpe mu ke lakisa nge bima . . . fwana salama na bilumbu na ntuala.*

*Mpe na mbala mosi mu kotaka na kimpeve: mpe, tala, kiti ya kintinu kutulamaka na mazulu, mpe muntu vwandaka na zulu ya kiti ya kimfumu.*

*Mpe yandi yina vwandaka ya kuvwanda na kiti ya kimfumu . . . yandi yina vwandaka ya kuvwanda vwandaka talana na zulu mutindu ditadi ya zape mpe . . . sardwane: mpe ya vwandaka na mukyama vwandaka zunga kiti ya kimfumu, na kumona mutindu emerode.*

<sup>35</sup> Ntangu yayi, yayi kele kitoko, oh, mutindu ya lesa ya kitoko! Mpe na suka yayi, kaka ntete mu kwiza, mu kumaka awa na nzila ya 6, Mu banzaka, “Oh, la la, mu lendaka bika yawu ve, samu ti awa kele na kima mosi na nzila ya 6 yayi Mu ke zola bantu nyonso kuwa kieleka mbote, ntangu beto ke kuma na *bima* yayi.” Bansasa yankaka ya bima yayi awa, na kuvutukilaka na ntete, mosi kele mutindu kibulu, mpe bima yiya yankaka kele mutindu yankaka. Mosi kele kibulu, na ki-Grec, mutindu “kibulu ya mfinda.” Yankaka yayi ba bangulaka yawu ve mbote na King James, samu ti ya kele ve *bima*, ya kele “Bivangu ya moyo.” Mpe mutindu Bivangu yayi, yina ba vwandaka, ya vwandaka ve bantu to dyaka ti ya vwandaka Bawanzio. Na yawu ya kele “Bivangu ya moyo,” mpe wapi mutindu bawu vwandaka na bizizi yiya na yiya . . . Oh, la la, beto ke nata yawu kuna na Nsangu ya mbote, mpe kuvutula kaka yawu mpe kutula yawu bubu yayi kaka na mutindu ya yawu ya kulunga. Mpe, beno bambuka moyo, *yiya* kele lutangu ya ntoto. Beno me mona? Mpe ya kele kaka



dilongi mosi ya kitoko kuna, mpe na yawu mu—mu ke ndima ti beto ke luta kuna ve; mu banza ti beto lendaka. Kasi ya kele kitoko mingi!

<sup>36</sup> Na yina, kana Mfumu zola, kuna kana beto kele na kizunga, mu banza ti Lumingu ke landa beto lendaka meka dyaka yawu; kumeka, kuna, kumona kana beto lendaka manisa kapu ya 4 yayi ntete beto kwenda. Beto zaba kieleka ntete ve kisika ya ntete ya kubanda ke vwanda.

<sup>37</sup> Ntangu yayi, beto ke tala ti *na manima*, “Na manima ya bima yayi.” *Na manima* zola kutuba ti “Na manima bansungi ya dibuundu me suka.”

<sup>38</sup> Na yina ba bokilaka Jean samu na kumata na zulu mingi, “mata awa,” yina zola kutuba “mata tii awa.” Ba lakisaka yandi nyonso yina zolaka salama na yinza na nsungi ya Dibuundu. Na yina na manima bansungi ya dibuundu kusukaka, beto ke tala ti Jean vwandaka kifwani ya mukwikidi nyonso ya kieleka yina ba ke bokila na Klisto na Zulu. Ya kieleka? Kubokila, “Mata awa.”

<sup>39</sup> Mpe beto talaka ti Ndinga yina zonzaka na yandi vwandaka Ndinga ya mpungi, ya pwelele, ya kuswaswana, mpe yawu vwandaka Ndinga mosi yina zonzaka na yandi awa na zulu ya ntoto. Beno me mona, ntangu nyonso yina Yandi vwandaka na kati-kati ya minda sambwadi ya wolo, Yandi vwandaka zonza na . . . to *na*. Oh, mu zola yawu, “na kuzonzaka na minda.” Beno me mona, Yandi vwandaka na kati ya minda, vwandaka zonza na nzila ya bawu na Dibuundu ya Yandi. Na yina ntangu nsungi ya dibuundu sukaka, Yandi bikaka ntoto mpe mataka na Mazulu mpe Yandi bokilaka bayina Yandi Vulusaka na kumata na Yandi. Oh, ya kele ve kitoko? Mu—mu . . . Oh, ya ke sala kaka ntima ya munu kudumuka.

<sup>40</sup> Mpe beno bambuka moyo, na yina beto ke tala bima yayi, mu zola mingi-mingi ti bantwenya ya mindimi mutindu Mpangikento Ina awa, to, mpe Ina, na kisika, mpe bakala ya yandi, mpe Rodney mpe—mpe kento ya yandi, mpe Charlie mpe bayankaka, kubakula ti bima yayi, mpe mingi ya beno bantu ya bantwenya yina me kwiza kaka na Mfumu, bayina me kwenda ntete ve ntama na ndilu, yina mekaka kaka Yandi mpe me mona ti Yandi kele mbote mpe ya lemvo. Ntangu yayi, beno tala yayi, ti bima yayi yina beto ke na kuzonzilaka, yina beto ke na kumeka na kusala kele kuvwandisa lukwikilu ya beno, ti ntangu Nzambi ke tubaka ya ke na kima fwana salama. Ya ke kondwa kaka ve! Ata ti . . . Ya lendaka monana ti ya kele mafuku ya bakilometele . . . mpe ti lendaka salama ata mbala mosi ve, kasi Nzambi ke twadisa kaka yawu mpe ke nata yawu na kusalama. Mpe Yandi ke salaka yawu samu na kumeka beno.

<sup>41</sup> Beno tala yina Yandi tubaka na Abraham. “Nata mwana ya nge awa na zulu ya mongo mpe kufwa yandi,” na manima yandi vingilaka yandi bamvula makumi zole na tanu. Mpe Yandi

tubaka, “Nata yandi na zulu awa mpe kufwa yandi.” Mpe wapi mutindu. . .? “Mu ke sala nge tata ya bayinsi.”

42 Mpe Abraham, na bamvula nkama; kento ya yandi, makumi yivwa; mpe mwana ya bawu kaka. . . Abraham vwandaka na kutala bamvula nkama na kumi na tanu kuna. Na yawu yandi tubaka, “Wapi mutindu yandi ke vwanda, wapi—wapi mutindu ya lendaka vwanda? Kana munu, kiboba ya bakala, kiboba mutindu mu kele, mpe vingilaka bamvula makumi zole na tanu. . . Nge pesaka munu nsilulu na bamvula makumi sambwadi na tanu, mpe awa mu kele na nkama mosi. Mpe Sarah vwandaka na bamvula makumi sambanu na tanu, mpe ntangu yayi yandi kele na bamvula makumi yivwa. Wapi mutindu? Na manima beto me kuzwa bébé yayi. . . Mpe Nge tubaka na munu kuna, bamvula makumi zole na tanu me luta ntangu mu vwandaka na bamvula makumi sambwadi na tanu, ti mu zolaka ‘kuzwa bébé’ na manima ya kuzingaka na Sarah bamvula nyonso yayi, mu vwandaka kisita mpe yandi vwanda na mabuta ve. Na yawu kuna wapi mutindu? Kasi, Nge me pesa munu mabuta mpe me pesa yandi mabuta, mpe kuna me kwiza mpe me pesa beto bébé yayi. Mpe beto me sansa yandi awa tii bamvula kumi na tanu, mpe na nzila ya mwana yayi Nge tubaka ti Nge ke ‘Sakumuna Bantu ya makanda mpe yinsi nyonso na yinza,’ mpe me sala mpe munu tata ya Bantu ya makanda, me sala munu tata. Na yina na bansungi yina ke kwiza, Mfumu, ti Nge ke sala munu tata ya yinsi nyonso yina kele na yisi ya mazulu na nzila ya mwana yayi. Mpe na nzila ya mwana yayi ke kwiza Mukudi, mpe na nzila ya Mukudi yina ke vulusa bantu nyonso. Wapi mutindu Nge ke sala yawu, Mfumu?” Yina vwandaka ve dibanza ya Abraham, yina vwandaka ve kyuvu ya Abraham. Kutumama! Yandi tubaka ve, “Wapi mutindu Nge ke sala yawu?”

43 “Ya ke dyambu ya munu ve. Nge tubaka yawu, na yawu mu zaba ti Ndinga ya Nge kele kieleka, kana Nge lendaka zitisa Ndinga ya Nge samu na munu mpe lendaka kulakisa munu ntangu mu vwandaka na bamvula makumi sambwadi na tanu; ntangu nge bokilaka munu mpe tubaka, ‘Kabuka nge mosi mpe kwenda zinga na yinsi ya nzenza,’ mu kele na yinsi yayi bamvula makumi zole na tanu. Mu vwandaka, muntu ya kiboba, vwandaka zinga na kento yina mu zingaka tuka yandi vwandaka mwana ya kento, yandi mpangi ya munu ya kento ya ndambu. Mpe na yina mu. . . ntangu nyonso yayi. Mpe Nge me pesa munu bébé yayi yina Nge silaka; mu me kuzwa yandi mutindu mosi na kati ya bantu ya kufwa. Mpe kana Nge ke tuba ‘kufwa yandi,’ Nge kele na lenda ya kuvumbula dyaka yandi na lufwa.” Oh, la la! Ya kele mutindu yina, yawu yina. Mpe Yandi salaka yawu.

44 Mpe na ntangu yandi tumamaka na Nzambi na muvimba, me katula bansuki ya Isaac na kizizi ya yandi, me basisa dyonga samu na kufwa. . . mwana ya yandi mosi, mwana mosi kaka ya yandi. Nzambi vwandaka lakisa kifwani, na kulakisaka beto.

Samu na yinki Yandi salaka yawu? Yandi zolaka sala yawu ve. Kasi Yandi salaka yawu samu ti beno na munu, ti beto lendaka tala na bima yayi na kilumbu yayi ya mpimpa ya boma kisika bantima ya bantu me fuluka na yimbi, ti beto lendaka zaba ti Nzambi ke zitisaka nsilulu ya Yandi. Ata mutindu kukondwa kulunga ya ke monana na kuvwanda, mutindu ya lendaka salama ve, Nzambi kele kaka Nzambi mpe Yandi ke zitisaka konso nsilulu yina Yandi salaka.

45 Ya kele yina mu ke na kumekaka na kutuba na beno ntangu beto ke telamaka awa samu na lukutakanu ya kubeluka. Beno ke telama awa, beno ke tuba, “Mu kele na kimbevo.” Mpe beno. . . Yina kele ntembe ve, ti beno kele na kimbevo. Kasi Nzambi ke zitisaka nsilulu ya Yandi! Na yina Yandi ke kulumuka. Ntangu yayi, beno me mona, Yandi salaka kukatula ya masumu awa ti Yandi—ti Yandi ke belusa beno. Ya kele yina Yandi salaka. Ntangu yayi, kima kaka Yandi ke lomba beno na kusala kele kukwikila yawu, beno kangama na yawu mutindu Abraham salaka.

46 “Mbote, dokotolo me tuba ti mu ke—mu ke zinga kaka kilumbu mosi.”

47 Mu ke kipe ve. Ya kele mbote, yina kele nyonso yina muntu yina zaba, ya kele yina ya mbote ti yandi zaba. Wapi mutindu Abraham zolaka kuzwa mwana yayi na manima yimeni lalisaka yandi awa, mpe Ndinga ya Nzambi tubaka na yandi ti “kwenda kufwa mwana yango ya bakala”? Wapi mutindu yandi ke sala yawu? Yina kele ve kyuvu. Nzambi tubaka sala yawu mpe yina sukisaka dyambu. “Wapi mutindu mu ke beluka mpe dokotolo me tuba ti mu lenda beluka ve?” Mu. . . yina kele ve ya munu. . . munu kyuvu; ya kele kubaka Ndinga ya Nzambi. Mpe kaka na ntangu ya me monisama na beno ti beno ke beluka, kuna beno—beno bambuka kaka moyo ti beno ke vwanda na mavimpi ya mbote. Ya kele na kima ve yina lendaka kanga beno na yawu. Ya kele kieleka. Beno me mona?

48 Na yawu ntangu Abraham kumaka ya muvimba ya kutumama. . . Wapi mutindu Yandi ke sala yawu? Na ntangu ya nsuka, ntangu baminuti tanu ya nsuka kumaka, baminuti tatu ya nsuka, baminuti zole ya nsuka, minuti mosi ya nsuka, basekonde makumi tatu ya nsuka, ntangu sekonde ya nsuka kumaka, ntangu diboko vwandaka yimeni na zulu samu na kukatula luzingu ya mwana ya bakala, Nzambi tubaka, “Sukisa yawu kaka kuna. Sukisa yawu kaka kuna, beno me mona. Mu me mona ya kieleka ti nge ke na kivuvu na Munu. Ntangu yayi, mu me sala kaka yayi, Abraham, samu na kulakisa na Branham Tabernacle na bilumbu ke kwiza, beno me mona, yina ke na salama, ti bawu fwana tula kivuvu na Munu. Ba fwana tula ve ntembe na Munu ata fyoti ve. Beno tula kivuvu na Munu!”

49 Kaka na kutala na ntangu yina, yandi. . . Awa vwandaka munkayulu, ata mbala mosi ve ti yandi salaka yawu ya mpamba. Ve, yandi ata mbala mosi ve salaka yawu ya mpamba, samu ti kaka kuna mwana-dimeme vwandaka boka, ntwenya ya nkombo ya bakala ya kukanga na mampoka kuna na ntoto ya kuyuma. Mpe bambala yikwa beto me talaka yawu. Wapi mutindu nkombo ya bakala yina kukumaka kuna? Wapi mutindu, na bibulu nyonso yayi ya mfinda? Ba-kilometele pene nkama na makumi sambanu na sambwadi na civilisation, na kati-kati ya bankosi, bayimbwa ya nseke, bibulu, na mutindu nyonso ya kibulu ya mfinda na manima kuna, kuna na zulu ya mongo kisika ya vwandaka ve na maza to matiti, yinki yawu vwandaka sala kuna? Nzambi vangaka yawu, tulaka kaka yawu kuna.

50 Mpe kumona Yandi na bilumbu ya beto yina beto ke na kuzingaka! Ntangu yayi, na suka yayi mu ke vwanda na kusala kutanga bima ya—ya munu samu na kutuba yawu, samu na kuzwa yina mu zola kutuba. Ya kele samu na yina mu ke kubika yayi mutindu mu kele, ntete beto banda na yayi. Mu zola beno kubakula ti bima yayi yina ke wakana ya munu mosi, ya zola ve kutuba ya munu mosi. Ya ke tubama kaka samu na kupesa beno mutindu na beno ti lukwikilu ya beno lendaka pema swi na lukwikilu yina kele kati na Klisto, beno lendaka pema na zulu ya nsilulu ya Yandi. Samu ti Nzambi ke zitisaka kaka nsilulu ya Yandi kaka na mutindu ya kulunga, ntangu yayi samu na kulakisa beto.

51 Mpe beno tala *Yehova-yile* yina, yina Abraham bokilaka Yandi, yina na Hebreux zola kutuba “Nzambi ke pesa samu na Yandi mosi munkayulu.” Nzambi lenda sala yawu. Yandi salaka nzila ya Yandi. Kana Yandi tubaka . . . Yandi tubaka na Noé . . .

52 Beno ke tuba, “Mbote, yina vwandaka kaka Abraham.” Ve. Yandi tubaka yawu nzila nyonso ya nsungi, mpe Yandi ke na kutuba dyaka.

53 Yandi tubaka na Noé kuna, ti, mutindu beto ke kota na yawu na suka yayi, “Oh, ya ke noka.” Kasi ya vwandaka ve . . . ata mbala mosi ve ti dituti vwandaka na zulu. Yinto ya maza ya kulutila nene vwandaka mwa-nzadi kisika Nzambi vwanda pesaka maza na yinsi, na mwa yinto ya maza kisika mosi. Yina vwandaka yinto ya maza ya kulutila nene.

54 Ntangu yayi, bantu ke tuba, “Wapi mutindu na yinza ya ke vwanda na maza mosi ke kulumuka katuka zulu kuna? Beno lakisa munu kisika ya kele na zulu kuna na tiya nyonso yina ya mwini, kana ti ya kele ve na mosi na zulu kuna.”

55 “Kana Nzambi tubaka, ‘tunga nzasa, ti ya ke na kwiza,’ ya kele kisalu ya munu na kutunga nzasa mpe kukubama, samu ti ya ke na kukwiza. Yandi kele Yehova-yile, Yandi lenda pesa maza na zulu kuna.”

56 Mpe kima kaka Yandi salaka vwandaka kubika bantu, ya bulawu, bantu ya buzoba, kusala kieleka landila science ya bawu, samu na kulungisa yina Yandi zabaka ke kwiza. Nzambi ata mbala mosi ve kubebisaka yinza; muntu ke bebisaka yinza. Nzambi ke bebisaka kima mosi ve, Nzambi ke mekaka na kukeba na bima nyonso. Muntu ke bebisaka yandi mosi na luzabu ya yandi, mutindu yandi salaka na nsaba ya Eden na yinti, mpe nyonso yina. Mpe na yawu mwa bafanatiki kuzwaka mwa ngolo ya atomique, kisika mosi, ti bawu kuzwaka yawu.

57 Bawu—bawu lendaka kusala na yawu kuna, samu ti bawu lendaka kusala bima na yawu yina beto me longokaka ntete ve. Beto me kuma ntama mingi ve. Ya lendaka lomba beto bamvula tatu to yiya dyaka, to ya kulutila, ntete beto lenda kusala yawu, kusala yina bawu salaka. Bawu tungaka ba-pyramide mpe sphinx mpe nyonso yankaka. Beto ke lenda ata mbala mosi ve kusala yawu. Beto lendaka sala dyaka yawu ve, ya kele na ata mutindu samu na beto na kusala yawu, kaka kana beto lenda kuzwa ngolo ya atomique. Ngolo ya lusanse, ngolo ya nsula, lendaka nangula mosi ya babloke ya bawu, lendaka nangula yawu na ntoto. Mpe bayankaka ya yawu kele yinda mutindu immeuble ya mbanza, ya kutelama tii na zulu, mpe ya bakilo mingi ya ba-tonne. Wapi mutindu bawu nataka yawu na zulu kuna? Beno me mona, bawu zabaka.

58 Mpe bawu salaka yawu kupasuka, muntu mosi fidisaka mosi ya bawu ya ba-bombe atomique na kitala-tala ya muntu yankaka, na bilumbu yina lutaka, samu ti, “Mutindu ya vwandaka na bilumbu ya Noé,” mutindu ya vwandaka, civilisation ya mutindu yina, mutindu ya bantu ya mayele mingi yina; “mutindu yawu vwandaka na bilumbu ya Noé, mutindu mosi yawu ke vwanda, mutindu mosi ya ke vwanda na nkwezulu ya Mwana ya muntu.” Kuvutukila ya yina vwandaka! Beno me mona?

59 Awa ntama mingi ve na—na Mexique, bawu vwandaka me timuna station hydraulique ya malu-malu, yina vwandaka na ntwala ya kifuluka ya maza. Beno monaka yawu? Ya vwandaka na mukanda, kisika station hydraulique ya malu-malu kaka mutindu yina beto kele na yawu bilumbu yayi, ya dyamaka kieleka na yisi ya ntoto; kima mosi ya atomique kufukaka yawu. Ya pasukaka kaka mpe me zika yawu mutindu yina. Beno me mona?

60 Ntangu yayi, “mutindu ya vwandaka na bilumbu ya Noé,” bantu ya mayele mingi, bantu ya mayele mingi na mangolo ya bawu ya atomique mpe nyonso, lendaka tunga ba-pyramide mpe sphinx mpe nyonso yankaka. “Mutindu ya vwandaka na kilumbu yina, mutindu mosi ya ke vwanda.” Kasi ba ke zenga nkufi kisalu na kilumbu yayi, samu ti ya ke vwanda na bantu ba ke zangula na Enlevement. Mutindu Enoch, ya ke vwanda na bantu ba ke

nata na zulu. Beto kele na kalasi yina na suka yayi, bantu yina ba nataka na zulu mutindu Noé lutilaka na kufuluka ya maza.

61 Kasi beno bambuka moyo, ntete. . . Beno zimbana yayi ve! Ntete ti mosi ya ditonzi ya mvula kubwa, ntete ya vwanza na kima mosi na zulu, ntete ti Noé kumanisa ntete—ntete nzasa, Enoch kubakamaka na Yinzo. Ba zangulaka Enoch kukondwa kufwa, yandi bandaka kaka kutambula kilumbu mosi, mpe—mpe ngolo ya kubenda zimbisaka kusimba ya yawu na yandi. Mpe yandi talaka dikulu mosi fyoti na zulu, mpe dikulu yankaka fyoti na zulu, mpe dikulu yankaka fyoti na zulu, mpe kima ya ntete beno zaba, yandi tubaka, “Kwenda mbote, yinza.” Mataka kaka na Nkembo.

62 Mpe ntangu Noé talaka bisika nyonso mpe lendaka ve kutala Enoch kisika mosi, yandi talaka bisika nyonso mpe yandi zabaka ve kisika Enoch kwendaka, na yina yandi tubaka, “Ya kele ntangu ya kutunga nzasa ntangu yayi.” Beno me mona? Mpe yandi kwendaka na kusala nzasa samu na kunata bayina bikanaka.

63 Ya kele kima mosi yina ke na kusalamaka kaka awa. Dibundu kubakamaka na Mazulu, mpe awa Jean kunatamaka na zulu na Yawu mutindu kifwanukusu ya bayina ke vumbuka, mutindu beto bakaka yawu mazono na nkokila. Mpe beto talaka ti Ndinga mosi yayi yina bokilaka yandi na kutala na manima na zulu ya ntoto, vwandaka Ndinga mosi yina bokilaka yandi na kumata.

64 Oh, Muklisto nyonso! Ndinga ya kieleka, Charlie, yina bokilaka nge kilumbu mosi kuna na Kentucky, samu na “Baluka,” kele Ndinga mosi yina ke bokila nge, “Mata!” Nge kele na kyese ve samu na yawu, Mpangi Evans? Ndinga yina tubaka, “Baluka,” Ndinga mosi tubaka, “Mata!” Oh, la la! Na yina, wapi mbokolo! Wapi kieleka! Pwelele, ya kuswaswana mutindu mpungi, “Baluka, sadila Munu! Mata kisika Mu kele.”

65 Kuna beto monaka yandi kumonikisa bayina kufwaka, Moise na kumonikisaka basantu ya kufwa; vumbukaka. Elie, na nkonga ya yandi na kilumbu ya nsuka, na nkonga ya yandi yina Zangukaka ya kutelama kuna. Bawu nyonso na ntwala ya Mfumu Yesu! Jean kutalisaka yawu. . . Yesu tubaka na bawu ti yandi—yandi zolaka kufwa ve, mpe yinki ya vwandaka samu na bawu kana yandi zolaka zinga tii yandi ke mona nkwezulu ya Yandi. Mpe bilandi samunaka yawu.

66 Oh, mu ke zola kana mu lendaka zonza kieleka, kieleka na mudindu ntangu kaka yayi, na dibundu, baminuti fyoti. Muntu nyonso zaba. . . Mpe muntu nyonso ke zingaka luzingu ya yandi mosi na Nzambi. Ya kele dyambu ya muntu yandi mosi, bima ya Kimpeve ke nataka beno na bisika yina beno lendaka zonza ve.

67 Mu me talaka yayi na ministere ya munu mosi, ya fyoti, ti ya kele bambala mingi ti mu ke tuba kima mosi mpe kuzaba ve samu

na yinki mu me tuba yawu, mpe yawu ke monana mutindu mbote ve (Kasi dyaka, muntu mosi ke tuba kima mosi.), kasi mu ke tala yawu mbote mpe kima mosi yina ke salama kaka na mutindu ya kulunga ti ya lendaka salama. Nzambi ke sala yawu kusalama! Ntangu mu ke zola kaka kutuba kima mosi, mu ke tuba, “Mbote, ntangu yayi, beno vingila fyoti. *Muntu yina, kingandi, yayi* ke salama awa, ntangu yayi yina—yina ke salama kaka mutindu yina.” Mbote, kieleka, mu—mu ke zaba ve samu na yinki mu me tuba yawu. Mpe kima ya ntete beno zaba, ya kele kaka mutindu yina. Nzambi ke salaka yawu!

<sup>68</sup> Ntangu yayi, ntangu bilandi yayi tubaka, “Oh, Yesu tubaka ‘muntu yayi ke kufwa ve.’” Yesu tubaka yawu ata mbala mosi ve.

Yesu tubaka, “Yinki ya kele samu na beno kana yandi ke zingaka tii Mu ke kwiza?”

<sup>69</sup> Kasi na kumonaka bilandi kutuba yawu, na yina Yesu tandaka diboko mpe bakaka Jean mpe matisaka yandi mpe bikaka yandi kuvutukila kima ya muvimba, beno me mona kuvutukila ya Nkwizulu ya Mfumu. Jean monaka Dibuundu, yandi monaka nsuka ya bansungi ya Dibuundu, yandi monaka nsuka ya ba-Juif, yandi monaka Nkwizulu ya Zole, yandi monaka lutumu nyonso.

<sup>70</sup> Mpe beno tala yina Nzambi zolaka sala; kutokisa yandi na mafuta pene ya bangunga makumi zole na yiya kuna, samu na kubika bawu kumona ti yandi vwandaka ya Nzambi, ti Mpeve ya Nzambi kupakulaka bumyoyo. . . (yina na ngaanda, buntoto, to nyonso yina beno ke bokilaka yawu, nsuni ya muntu), yandi vwandaka kieleka ya kukota na Bunzambi ti mafuta ya kutoka ya tiya na bangunga makumi zole na yiya kunyengisaka mpe yandi ve. Beno ke meka ve na kubasisa Mpeve-Santu na muntu na kutokisaka yandi; ya ke simba ve. Na yina ba nataka yandi na kisanga ya Patmos, mpe yandi sonikaka Buku, mpe vutukaka mpe longaka bamvula mingi. Hmm. Hmm.

<sup>71</sup> Samu ti, awa, yandi zolaka baka nkumbu ya yimbi, “Yandi vwandaka nganga-nkisi, yandi vwandaka ndoki.” Bantu yikwa zaba ti ba bokilaka Jean ndoki? Kieleka! Ba bokilaka Yesu mutindu mosi, mpe. Beno me mona? Beno me mona, yinza zaba ve kima na zulu ya bima yayi. “Yandi vwandaka mutangi mabanza.” Beno me mona? Ba tubaka ti “Yandi vwandaka ndoki ti yandi lokaka mafuta yina, ti mafuta lendaka ve na kuyoka yandi samu ti yandi lokaka yawu,” kaka samu ti yandi ndimaka ve mabanza ya bawu ya Katolika. Ya vwandaka kaka yina.

<sup>72</sup> Yandi vwandaka kisadi ya Nzambi yina . . . ya kulemvuka, yina vwandaka na kisalu mosi ya fyoti kuna yina yandi vwandaka keba. Yandi vwandaka pesa ve muswa na bima yina ya ntama ya nene, mpe na yawu Nzambi bumbaka kaka yandi mpe kebaka yandi. Mutindu mosi Yandi salaka: na Santu Martin mpe—mpe Irénée, mpe nzila nyonso na bansungi.

<sup>73</sup> Mpe Yandi ke na kusalaka kima mosi bubu yayi, na kulandilaka. Ntangu yayi, beno simbana ve yayi, ti Nzambi silaka bakuningana ya nene, mpe bisalu ya nene, ya ngolo. Ntangu yayi, beno sonika yayi na banote ya beno yina beno ke na kusonikaka (Benó me mona. Benó me mona?), ti yina muntu ke bokilaka “ngolo mpe nene,” Nzambi ke bokilaka yawu “Bulawu!” Mpe yina muntu ke bokilaka “bulawu,” Nzambi ke bokilaka “Nene!” Benó zimbana yawu ve, beno me mona, beno zimbana yawu ve. Yina ke sadisa beno na bamvula ke kwiza, samu ti beto ke na kuingila na kima ya kulutula nene ntangu nyonso. Mpe beto ke na kuzwaka ntangu nyonso ya kulutula nene, kasi bantu ya yinza zaba yawu ve. To dyaka ti bawu zabaka yawu na bilumbu ya Noé, to dyaka ti bawu zabaka yawu na bilumbu ya Jean, na bilumbu ya Yesu, na bilumbu ya bantumwa, na bilumbu ya Irénée, mosi na mosi ya bilumbu yina, bawu zabaka yawu ve.

<sup>74</sup> Mpe Jeanne d’Arc, yandi vwandaka, ntwenya ya kento ya santu. Ntangu yandi vwandaka kima ve kasi mwana ya kento, Nzambi vwandaka zonga na yandi na ba-vision, mpe Wanzio vwanda zonzaka na yandi. Benó zaba yinki dibuundu ya Katolika tubaka? “Yandi kele ndoki.” Mpe bawu tulaka yandi na mwa yinti mpe kuyoka yandi na kufwa, banganga-Nzambi ya Katolika kusalaka yawu; kufwaka yandi, fundisaka lufwa ya yandi mutindu “ndoki,” mpe Jeanne d’Arc kufwaka mutindu ndoki. Pene ya bamvula bankama zole na ntswala, ba bakulaka ti yandi vwandaka ve ndoki, yandi vwandaka kilandi ya Klisto.

<sup>75</sup> Bawu salaka kima mosi na basantu nyonso. Yesu tubaka, “Nani ya beno batata ya beno kutalisaka ve mpasi? Wapi mosi ya baprofete yina kwizaka ntete yina bawu mangaka ve?” Yandi tubaka, “Benó kele bibaka ba me tula mpembe.” Yandi tubaka, “Benó—beno ke kwendaka kuna mpe—mpe ke bongisaka badyamu ya baprofete, mpe beno kele bayina ke tulaka bawu na kati kuna.” Hmm! Oh! Oh! Benó me mona? Yandi kwendaka ve maboko mpamba. Hmm! Yandi tubaka kaka na bawu.

<sup>76</sup> “Nsungi ya banyoka yayi,” Jean tubaka, “nani longaka beno na kukima nganzi ke na kwiza? Benó banda ve na kutuba ti beno kele na Abraham tata ya beno.” “Beto kele ya mosi ya ba-organisation, ya nene.”

“Nge kele Muklisto?”

<sup>77</sup> “Oh, mu kele Methodiste. Mu kele Presbyterien. Mu kele Pentecotiste.” Ya kele kaka ve yina ya kele. Yina kele na mingi ve ya kusala ti—ti—ti—ti—ti mvula ya mpembe ke salaka na mwini. Benó me mona? Ya kele na kima ve ya kusala na yawu. Kana beno kele Muklisto, beno kele kisadi ya Nzambi yina me butuka dyaka.

<sup>78</sup> Ntangu yayi, ntangu yayi, ntangu Jean kwizaka, beto talaka yawu mazono na nkokila. Ntangu yayi, beno bambuka moyo, ntangu beno ke kwizaka na yayi. . . Samu dibanza ya kima, mu—



mu tubilaka beno kuna. Beno bambuka moyo, yinza ke na kuzwa kuningana ya kulutila ngolo yina yandi me kuzwaka ntete ve, ntangu kaka yayi, dibuundu ya yinza.

<sup>79</sup> Ntangu yayi, beno bambuka moyo, kukondwa ntembe ti, na bilumbu ya—ya Jean, bilumbu ya Yesu, ya vwandaka na bafeti ya nene mpe bantu yina ke zonzaka nene na bilumbu ya bawu, bantu ya nene ya mayele, mpe bawu vwandaka benda makumi ya mafunda na bambala mafunda ya bantu. Yinki Caïphe zolaka sala kana yandi bokilaka lukutakanu mosi kintwadi? Yandi zolaka nata Jérusalem nyonso, yandi zolaka nata Israël nyonso kintwadi, katuka dikunzi na poto. Mpe bawu nyonso ke tuba, “Oh,”

“Ntangu yayi, kana Caïphe tubaka bima *yayi-yayi*, ya ke vwanda nene.”

“Oh, beno ke kwikila Masonuku, Rabbi, Révérend, Mulongisi, Bishop? Beno ke kwikila Masonuku?”

“Kieleka, mu ke kwikilaka Masonuku, mu kele kizabi ya nene!”

<sup>80</sup> “Mbote mingi. Ntangu yayi, Biblia ke tuba awa ti ya ke vwanda na ntangu mosi, ‘Myongo nyonso ke dumuka mutindu mwa nkombo ya bakala, makasa nyonso ke bula maboko ya bawu, mpe bisika nyonso ya zulu ke kulumuka mpe ke vwanda na yisi, bisika nyonso ya yisi ke natama na zulu mpe ke kuma na zulu. Mpe yawu ke salama na nzila ya ndinga ya muntu ke dila na ntoto ya kuyuma.’ Beno ke kwikila yawu, Labi, Reverend, Docteur, Pasteur?”

“Ya kieleka, mu ke kwikila yawu!”

“Wapi mutindu ya ke salama?”

<sup>81</sup> “Oh, Nzambi ke fidisa muntu mosi ya ngolo na zulu ya ntoto kilumbu mosi. Oh, yandi ke vwanda nene. Yandi ke vwanda ndinga ya muntu yina ke loka na ntoto ya kuyuma, to yandi ke zabisa na ntwala nkwezulu ya Mesiya. Mpe ntangu yandi ke kwiza, ya kele ve na ata ntembe na dibanza ya munu kasi yina yandi ke kulumuka kuna na Mazulu mpe kukwizaka tii na tempelo. Yandi ke kwiza kaka awa na tempelo, mpe ke tuba, ‘Ntangu yayi, beto ke baka Romains nyonso mpe ke bula bawu tii na lufwa. Kaka yina. Beto ke bula ba-Romain nyonso kuna.’ Mpe—mpe na manima yandi ke tuba, ‘Kwisa, Mesiya!’ Mpe Mesiya ke kulumuka, mpe beto ke sala nyonso na ba-serpe ya beto na . . . to bambele ya beto na ba-hoyaux mpe ba-serpe, mpe ya ke vwanda dyaka ve na bamvita.” Mpe, uh-huh, yina kele lutendulu ya bawu.

<sup>82</sup> Kasi yinki salamaka ntangu yawu kwizaka? Yinki salamaka? Ya vwandaka ve na kima ya ngitukulu na Mazulu, yina bawu monaka ntete; ya vwandaka na mosi, kasi bawu monaka yawu ve. Bawu monaka yawu ve. Beno me mona. Ntangu myongo

nyonso kudumukaka mutindu mwa bankombo ya babakala? Na wapi ntangu bisika nyonso ya zulu kukumaka yisi mpe bisika ya yisi zulu? Mulongi ya kiboba ya kifuluka na mandefo kubasikaka na ntoto ya kuyuma mpe yandi zabaka ve ABC ya yandi. Landila disolo, yandi kwendaka na ntoto ya kuyuma na bamvula yivwa mpe monanaka dyaka ve tii ntangu yandi kuzwaka makumi tatu. Yandi vwanda kudyaka bampasu mpe bwiki ya mfinda. Bampasu kele makonko, bawu kele yinda na makonko.

<sup>83</sup> Bawu ke kudyaka yawu ntangu nyonso. Mbote, beno lendaka sumba kaka yawu awa na . . . Beno banza ve ti ya kele yimbi, samu ti beno lenda sumba yawu awa na supermarché kana beno zola yawu, ba-bourdon, bwiki ya banyosi, manzenze, banyoka, nyonso yina beno kele na nsatu, beno me mona.

<sup>84</sup> Na yawu yandi vwandaka zingila na manzenze mpe bwiki. Wapi mutindu ya kudyaka! Kasi yandi vwandaka ya kukeba na ngolo ya Nzambi. Yandi vwandaka ve ya kulwata nkingu ya kubaluka; mutindu tubaka muntu mazono na nkokila, Mpangi Parnell to mosi ya bawu. Yandi vwandaka ve ya kulwata kazaka ya mukila, mpe nyonso yina. Yandi basikaka na ntoto ya kuyuma na kitini ya nene ya mpusu ya dimeme na zulu ya yandi. Mutindu mu tubaka, mu banza . . . Beto fwana yobila konso kilumbu, mpe ya lendaka vwanda ti yandi vwandaka yobila mbala mosi na kati ya bangonda tatu to yiya, kuna na ntoto ya kuyuma. Mu zaba ve. Yandi vwandaka ve mbote na kutala. Yandi vwandaka na ata chaire ve. Yandi kwendaka ve na bambanza ya nene mpe kuzwaka ba-campagne ya nene. Yandi telamaka kuna na simu ya Jourdain, poto-poto na makulu ya yandi, mpe vwandaka tuba, “Benoni nsungi ya banyoka ya mpidi, nani me longa beno na kukima nganzi ke na kwiza?” Hmm. Yina kele ntangu bisika ya zulu kukumaka na yisi, beno me mona, mpe bayisi ya zulu kukumaka zulu. Uh-huh. Yinga, tata.

<sup>85</sup> Na yina, kima ya ntete beno zaba, ba vwandaka vingila Mesiya kukulumuka na Bawanzio mpe nyonso, mpe kuvwanda na ba-dais kuna mpe tempelo kisika ba tungaka samu na Yandi na kukwiza (mutindu beto ke na kutungaka bisika ya nene bubu yayi na bayinsi mpe nyonso yina). Beno me mona? Mpe na wapi ntangu Yandi kwizaka? Yandi bikaka mosi na mosi ya ba-synagogue ya bawu, mosi na mosi ya ba-organisation ya bawu, kwizaka na kidikulu. Bawu kwikaka Yandi na kukota na yawu.

<sup>86</sup> Ya kele yina ya kele bubu yayi. Ba ke kwika Yandi na kukota na bima, ke kwika na kusala yawu, ke kwika na kuvwanda na tabernacle yina ke yambaka bantu nyonso, samu ti Nsangu ya Yandi ke wisanaka ve na denomination. Nsangu ya Yandi bubu yayi, yina ke longamaka na milongi ya Yandi, kele yina ke yambaka bantu nyonso samu ti ba-denomination me tula Yandi na ngaanda. Biblia ke tuba yawu. Yandi vwandaka na ngaanda, ke na kukonkota, na kumeka na kukota (Benoni me mona?), na

dibuundu ya Yandi Mosi. Ya kele kisika yina ya kele. Beno me mona, ya kele kaka mutindu mosi bubu yayi.

<sup>87</sup> Na yawu, beno bambuka moyo, yina ke talana nene samu na muntu, kele fyoti na ntwala ya Nzambi. Ntangu yayi, ya kele samu na yina beno fwana vwanda ve na kikunku ya bafololo. Mpe ntangu Nzambi ke kwiza dyaka, ntangu Yesu ke kwiza dyaka, beno ke yituka na kumona, mwa mama yina ke sukulaka bilele na yisi ya bala-bala. Uh-hum. Beno ke yituka na kumona, bakala yina ke tubaka kima ve, yina ke bumbaka mansweki samu na yandi mosi kutambula na ntwala ya Nzambi, ya kulemvuka. Beno ke yituka. Ya ke vwanda kuyi- . . .

<sup>88</sup> Mu me longa ntama mingi ve, na lufundusu. . . *Kuyituka na Lufundusu*. Ya ke vwanda ve kuyituka na kumona muntu yina ke tekaka malafu ya mayuya kuna, yandi zaba kisika yandi ke kwenda. Kieleka. Ya ke vwanda ve kuyituka na kumona muntu ya luvunu, muntu ya kindumba, nyonso kuna, ya ke vwanda ve. Kasi kuyituka ke vwanda, mpe kunyonga ke vwanda, bayina ke banza ti bawu vwandaka kwenda; uh-huh, yinga, mpe na manima ba ke losa. Bayina ke tubaka, “Mbote, vingila fyoti, mama ya munu vwandaka ya dibuundu yayi, tata ya munu vwandaka ya dibuundu yayi, nkooko ya munu ya bakala mpe nkooko ya kento. Mu me vwanda mambele kuna luzingu ya munu nyonso.”

<sup>89</sup> “Beno kwenda ntama na Munu, beno bantu ya masumu ya nko, mu zabaka beno ata mbala ve.”

<sup>90</sup> Beno tala na bilumbu, ntangu kiboba Siméon, muntu ya kukondwa kuzabana, ya kukondwa nsangu, beto zaba kima ve na yandi na Biblia. Kasi Biblia ke tuba, “Ya kumonisamaka na yandi na nzila ya Mpeve-Santu,” (Beno tala yandi; beno bawu yayi.) “ti yandi zolaka kufwa ve tii yandi ke mona Klisto.”

<sup>91</sup> Beno tala dyaka na nani vwandaka Jean Mubotiki, mutindu mosi ya muntu ya mutindu yankaka, muntu ya mfinda kuna na mfinda. Ya kumonisamaka na yandi. Yandi basikaka vwandaka longa Nsangu. Beno tala yawu!

Nani vwandaka Anne?

<sup>92</sup> Ntwenya ya mwense, Marie, kuna na mbanza ya Nazareth (yina zola kutuba mutindu Jeffersonville) mpe kisika disumu mpe nyonso vwandaka mingi, kasi yandi bumbaka yandi mosi mpembe samu yandi zabaka ti kilumbu mosi ya vwanda na Mesiya yina ke kwiza. Beno me mona?

<sup>93</sup> Joseph, kisadi-mabaya, kufwilaka kento ya yandi mpe—mpe vwandaka sansa ntwenya ya mwana ya kento yayi. Mpe ya vwandaka na nzila ya kuna tki Mpeve-Santu kukwizaka na yawu. Mpe kuna yinza kwizaka mpe pesaka bankumbu ya ndombe na yawu, mutindu “exalté, pentecotiste.” Beno me mona, nkumbu ya ndombe na yawu. “Mbote, ti, yandi. . . mwana yina kubutamaka na ngaanda ya ngwisani ya santu ya

makwela.” Beno me mona, bawu kwikilaka yawu, mpe yawu ke tala kaka mutindu ya vwandaka. Kasi Nzambi ke salaka yawu samu na kufwa meso ya bantu ya ndwenga mpe ya mayele, mpe ke monisaka Yawu na bana ya fyoti yina zola kulonguka.

<sup>94</sup> Mu banza ti ya kele na lufulu ya nene samu na kima yina mu ke baka na manima ya ntangu fyoti. Mu ke lakisa beno. Beno me mona mafuta yayi? Ntangu yayi, yina mu me tuba na beno, lufulu, samu na kumona ti ya kele ve muntu, ya kele Nzambi, mu ke lakisa *yayi*. Mbote mingi.

<sup>95</sup> Ntangu yayi, “Mata awa,” vwandaka Ndinga. Mpe ntangu yandi zibulaka yandi kuwaka makelele ya mpungi, mpe kuna na mbala mosi Jean kotaka na Kimpeve—kotaka na Kimpeve, mpe na nswalu yina yandi kotaka na Kimpeve yandi bandaka na kumona bima. Beno ke banda na kumona bima ntangu beno ke kota na Kimpeve. Ya ntete beno fwana kota na Kimpeve. Ya kele kieleka?

<sup>96</sup> Ntangu yayi, yinki kana beno kwenda na nsaka ya baseball, mpe beno tuba, “Kieleka mu zola base-ball.” um-hum. Mpe beno ke baka kiti ya mulonga ya mantwala, kaka kuna na gradin mpe beno ke vwanda na kutala mbote ba-Yankee to ba-Bulldog, ata bawu yina ke, na kubulaka. Mpe bawu nyonso ke na kuzwa nsaka mosi ya nene kuna.

<sup>97</sup> Mpe kana kipi ya beno kele kaka pene ya kukondwa, mpe na mbala mosi Babe Ruth ya malu-malu ke fidisa yinti ya yandi mutindu *yayi* mpe ke tuba, “Beno ke mona kuna?” Ya kele na bantu tatu na ntelamanu. “Vlan!” Mpe yandi me twadisa yawu na ngaanda ya meso; ke katula yimpu ya yandi mpe ke sala yandi mosi mupepe; ke tambula kuna na ntelamuna ya ntete mpe ke tala bisika nyonso, bantu ya yandi nyonso; ke kwenda na ntelamanu ya zole, ke bula maboko na muntu ya zole ya ntelamanu; ke tambula, ke tambula kaka na nswalu na yinzo, ke kulumusa ya yandi. . . Mbote, oh! Oh! Wapi makelele, wapi kudumuka, wapi kuloka, makelele ya, “Kitoko!” Mbote, bawu ke. . .

<sup>98</sup> Kieleka mu me monaka bawu kubaka bayayi. . . Beno ke bambuka moyo na bayimpu ya ntama yina vwanda vwandaka na nyanga? Mu kwendaka tala kilumbu mosi nsaka ya baseball mpe mu monaka muntu mosi kutula bi. Mpe muntu yayi ya kuvwanda na mantwala ya munu na yimpu ya nyanga, yandi vwandaka yandi nyonso na kilengi; yandi bakaka yimpu ya yandi mpe futikaka kaka yawu, salaka kaka yawu musanga na nziunga mutindu *yayi* kisika zulu katukaka. Mbote, yandi vwanda kuzwa yandi mosi ntangu ya nene! Yandi—yandi vwandaka kieleka na ngaanda ya yandi mosi ti yandi vwandaka zaba ve yina yandi vwandaka sala. Yandi vwandaka bula kaka mpe vwandaka sala makelele mpe vwandaka boka mpe vwandaka dumuka. Mbote, ntangu yayi, beno zaba yina mu ke banza, kieleka yandi

vwandaka . . .yandi vwandaka ba- . . .yandi vwandaka . . .yandi vwanda zolaka base-ball. Yandi vwandaka fane ya base-ball, kaka mutindu fane ya makaya to fane ya whiskey.

<sup>99</sup> Mu kele fane ya Yesu. Inga. Mu ke zolaka kaka yawu. Mu . . . Kana beno ke zola kukuma fane ya Yesu, beno me mona, fane na manima ya kima mosi.

<sup>100</sup> Na yina beno lendaka banza ti muntu yina ke tuba, “Oh, kieleka, mu kele fane ya base-ball.” Mpe kipi ya yandi ke belama na kukondwa, mpe ke mona yandi kumata mpe kununga nsaka mutindu yina, yandi ke tala bisika nyonso mpe, “Yinga, mu banza ti ya vwandaka mbote mingi.” Uh-huh. Beno ke tuba, yandi “zolaka base-ball.”

“Oh, yandi kele kima mosi!”

<sup>101</sup> Beno ke tuba, “Mbote, nge zola yawu ve, ve? Kima mosi ke tambula mbote ve na nge!” Konso fane ya mbote ya base-ball ke tuba, “Yinki ke tambula ve mbote na muntu yina? Kima mosi ke tambula ve mbote na yandi. Beno tala yandi ya kuvwanda kuna.” Huh! Yina kele kaka mutindu yina . . .

<sup>102</sup> Beno vukisa nyonso zole kintwadi ntangu yayi, beno mona. Oh, ntangu beno kele fane ya Yesu, mpe beno ke kuwa Mpeve-Santu kukota na kati ya Bandinga yango, kuna kima mosi ke boka! Oh, beno ke vwanda ntama ya beno!

<sup>103</sup> Mu banza ti muntu yayi ke lemvočila munu, yandi kele ya kuvwanda pene-pene awa. Muntu ya nene, ya yinda ya kufuluka na nsuki ya ndombe ya kuvwanda awa, yandi vwandaka ya kutelama na hall nkokila mosi kuna na ngaanda, mpe muntu mosi tubaka kima ya mutindu . . .sadisa, beno zaba, ya kusakumuna yandi mutindu yina. Mpe mwana ya bakala yayi ya mawa vwandaka lutila ntangu mosi ya mpasi, mu zaba ti kento ya yandi—ya yandi bikaka yandi mpe nataka yandi na bazuzi samu na kufwa makwela samu ti yandi zolaka Mfumu Yesu. Ya kele kieleka. Mpe muntu mosi tubaka kima na zulu ya Yesu, beno zaba, yandi vwandaka mosi ya mutindu bafane yango. Mpe yandi vwandaka na mvita mpe na bamputa ya kukubula, mpe nyonso, mwana ya bakala vwandaka; mu vwandaka tala yandi kyadi. Kwendaka na yinzo na . . .bana ya yandi mpe kento ya yandi. Kuna yandi—yandi silaka Mfumu ti yandi ke sadila Yandi, mpe kaka ntangu Mfumu bandaka na kusakumuna yandi mpe yandi sungamaka na Nzambi, kento ya yandi pesaka yandi mukongo, nataka yandi na bazuzi samu na kufwa makwela mpe bikaka yandi. Yandi bikaka yandi kuna na madidi. Kasi dyaka yandi vwandaka fane.

<sup>104</sup> Mpe ntangu yandi telemaka kuna nkokila mosi mpe ti muntu mosi tubaka kima mosi na zulu ya Yesu, kima, mutindu nene Yandi vwandaka, mutindu yina, yandi tubaka, “Oh, Nkembo!” Me telemisa maboko ya yandi mpe tala dikofi ya yandi lutaka na kibaka mutindu yina. Yandi zabaka ve ti yandi salaka yawu.

Dikofi ya yandi vwandaka na kati ya kibaka. Yandi tubaka, “Mpangi Bill, mu ke futa samu na yawu.” Mu banza ti Mpangi Wood kwizaka kuna mpe tulaka kitini na zulu, kitini yankaka na zulu. Beto kipe yawu ve, Mpangi Ben, beto kele kaka—beto kele kaka na kyese ti nge kele fane. Ben me mona?

<sup>105</sup> Ntangu Mpeve-Santu ke sala kima mosi na beno, beno lenda kaka ve kuvwanda swi, ya kele na kima mosi ke toka kuna. Amen. Fiu! Yinga, kima ke kanga, fane ya Klisto. Ntangu beno ke zolaka Mfumu, kima kaka mosi na beno ke sosa, ke kangama, ke vwanda na nsatu mpe mpwila, Yesu tubaka, “Ya kusakumuna kele bawu, samu ti bawu ke fuluka. Ya kusakumuna kele bawu yina mpe kele na mpwila, kana beno kele na Yawu to ve.” Bantu yikwa ke zola ya mingi ya Nzambi? Mbote mingi. Mbote, ya kele samu na yina ti beno zola mingi ya Nzambi, beno kele kaka ya kusakumuna na kuvwanda yawu. Kana beno kele na Yawu ve, beno kele dyaka ya kusakumuna. “Mpe ya kusakumuna kele bawu yina kele na nsatu mpe mpwila.” Beno kele kaka ya kusakumuna na kuvwandaka na nsatu mpe mpwila. Samu ti beno zola Yawu, beno kele ya kusakumuna. Samu ti ya kele na bantu mingi yina zola ve Yawu.

<sup>106</sup> Beno ke bambuka moyo na dilongi ya munu ya nkokila yankaka yina? Beno me mona, mutindu ya mayele yina ve, yandi bumbaka sanduku mpe losaka dikabu. Beno me mona? Beno baka sanduku ve, beno baka Dikabu. Mbote mingi.

Ntangu yayi, *na mbala mosi . . . na kimpeve: mpe, tala, kiti ya kimfumu . . . ba tulaka na mazulu, mpe muntu vwandaka na zulu ya kiti ya kimfumu.*

<sup>107</sup> Ntangu yayi, beno tala, na mwa ntangu fyoti na mantwala, to, beto talaka yawu mazono na nkokila, mu banza, ti na zulu ya Kiti yayi ya kimfumu yina . . . Beto talaka ti ya vwandaka na kima mosi ve na zulu ya Kiti ya kimfumu, mpe ntangu yayi ya kele na Muntu na zulu ya Kiti ya kimfumu na yawu ya ke lakisa ti Yesu me kwiza na Dibuundu ya Yandi kuna na Nkembo mpe me vwanda na Kiti ya Yandi Mosi ya kintinu. “Ya kuvwanda na zulu ya Kiti ya kimfumu,” yina kele na manima ya nsungi ya Dibuundu. Ntangu yayi, ntangu yayi, beto zola kubaka yawu na manima ya mwa ntangu fyoti.

<sup>108</sup> Ntangu yayi, beno ke tuba, “Mbote, wapi kisika kele kiti ya Yandi ya kimfumu bubu yayi?” Ntangu yayi, Mpangi Neville, kana mu luta yawu, nge yufula munu na manima ya ntangu fyoti, “Wapi kisika kele kiti ya Yandi ya kimfumu bubu yayi.” Mu banza ti mu ke kuma na yawu kuna na ntwala. “Wapi kisika kele kiti ya Yandi ya kimfumu ntangu yayi kana ti Yandi kele ve na zulu ya Kiti ya Yandi ya kimfumu ntangu yayi?”

Yandi kele ve na zulu ya Kiti ya Yandi ya kimfumu ntangu yayi. Ve, tata.

<sup>109</sup> Mbote mingi, ntangu yayi:

*Mpe yandi yina vwandaka ya kuvwanda vwandaka talana na zulu mutindu... ditadi ya jaspe mpe... sardoine: mpe ya vwandaka na mukyama vwandaka zunga kiti ya kimfumu, na mutindu...na kumona mutindu emeraude.*

<sup>110</sup> Ntangu yayi, beto baka nzila ya 3, na kubanda. Mpe na yawu “zape,” Yandi yayi yina vwandaka ya kuvwanda na zulu ya Kiti ya kimfumu vwandaka tala na zulu...Na mutindu yankaka, ntangu beno ke talaka na Yandi, Yandi vwandaka na kitoko mosi ya nene, ya kitoko mingi! Oh, mu zola kumona Yandi. Beno ve?

<sup>111</sup> Kilumbu mosi...Mu ke bambuka moyo na Mpangi-kento Cadle, Mpangi-kento Howard Cadle, mu banza ti mingi ya beno ke bambuka moyo na yandi. Mu vwanda vwandaka na lweka kuna ya bala-bala, mpe kento ya munu yina kele ya kuvwanda kuna ntangu yayi ke bambuka moyo ti yandi vwandaka na madidi, na kivinga. Mpe mu telamaka, mpe mu vwandaka na mwa, ya ntama...ya vwandaka kikalangu mosi kuna na... beto vwanda yokaka dimpa ya beto na fure, na tiyo. Mpe mu...ya vwandaka kieleka na madidi mpe mupepe vwandaka bula, na hiver, mvula ya mpembe vwandaka na zulu ya ntoto, mpe mupepe vwandaka bula na cheminée, mpe mu lendaka ve kuyoka kima yina, samu na kuvulusa luzingu ya yandi. Mpe mu vwandaka kieleka ya kukwamisa samu na yawu. Mpe mu tulaka ndambu na kati, ya fulaka dyaka na yawu. Billy vwandaka na madidi mpe mpangi ya kento yina vwandaka na madidi, mu vwanda meka na kusala tiya. Mpe kuna ya salamaka ti mu namisaka ladyo mpe (baminuti fyoti ntete, ti mu kuzwa tiya, kuna), mpe Mpangi-kento Cadle vwandaka yimba, “Ntangu mu ke kuma na Yinsi yina, na simu yina ya ntama, mu zola kumona Yesu. Beno ve?” Oh, la la!

<sup>112</sup> Mu vwandaka kaka kuna na ntoto na kati-kati ya yinzo mpe vwandaka kaka kuna mpe bandaka na kudila. Beno zaba mutindu yandi vwanda yimbaka, kuna, na ndinga ya yandi ya malembe ya mutindu ndeke. Mu zola kuwa yandi ntangu mu ke sabuka ndilu kuna; kutuba, “Mu zola kumona Yesu. Nge ve?”

<sup>113</sup> Mu banzaka, “O Nzambi, yinga, mu zola kumona Yandi kilumbu mosi. Ntangu ba ke nata bafololo nyonso, mu zola kumona Yesu.” Mutindu...Kumona Yandi na zulu ya Kiti ya Yandi ya kimfumu, kitoko ya Yandi, kitoko ya Yandi ya nene! Mpe kana mu...Oh, mu ke zola kutelama kisika Jean kutelamaka, samu ti mu telama kaka mpe kutala Yandi.

<sup>114</sup> Awa ntama mingi ve, kuna...na ntangu ya kimpika. Mu ke tuba yayi samu na ndandu ya bankundi ya munu ya ndombe bayina kele awa na suka yayi. Ya vwanda na muntu mosi ya kiboba, ya ndombe mpe yandi vwandaka...kwendaka na mwa kisika mosi, ba vwanda kwendaka.

115 Mpe vwanda salaka yayi kuna na Kentucky, yandi vwanda yimbaka. Mu banza ti Mama Cox mpe bayankaka lendaka bambuka moyo ntangu bawu vwanda kwendaka na kuyimba, beno zaba, bawu ke kwenda na bayinzo mpe bawu ke bula orgue, bantwenya mpe bawu nyonso ke yimba. Ba vwanda salaka yawu awa na Utica, mpe bisika nyonso na yinsi. Bubu yayi bawu ke kunwa ndambu ya whiskey, kuna kisika mosi na feti mosi ya rock-and-roll.

116 Kasi, na ntangu yina, ba vwanda yimbaka bankunga. Mosi ya bankunga yayi ya ntama, ya vwandaka na mpangi mosi ya bakala ya ndombe ya kiboba, yina vuukaka. Mpe Mfumu bokilaka yandi na kulonga, mpe kilumbu yina landaka yandi kwendaka tuba bisika nyonso na bampika na bilanga. Yandi tubaka, “Mfumu me vuukisa munu mazono na nkokila mpe me bokila munu na kulonga na bampangi ya munu.”

117 Mpe na nsuka ya kumaka na mfumu ya ranch to mfumu ya bilanga. Yandi bokilaka yandi, yandi tubaka, “Sambo, mu zola nge, kwiza awa.” Yandi tubaka, “Mata na bilo ya munu.”

Yandi tubaka, “Yinga, tata,” yandi kwendaka na bilo.

118 Yandi tubaka, “Yinki yayi mu ke na kuwa nge ke na kumwangisa na kati-kati ya bampika, na kati-kati ya bantu yina kuna, na bisadi ya munu, bampika ya munu, ti Mfumu me pesa nge kimpwanza?”

119 Yandi tubaka, “Inga, tata.” Yandi tubaka, “Mfumu, mu kele mpika ya nge.” Yandi tubaka, “Ba sumbaka munu na mbongo ya nge, kasi...” Yandi tubaka, “Kasi mutindu yina Nzambi pesaka munu kimpwanza mazono na nkokila, Yesu me pesa munu kimpwanza na luzingu ya disumu mpe ya nsoni, mpe na luzingu ya lufwa. Yandi me pesa munu kimpwanza.”

Yandi tubaka, “Sambo, nge zola kieleka kutuba yawu?”

Yandi tubaka, “Mu zola kutuba yawu.”

120 Yandi tubaka, “Mu me kuwa bawu kutuba ti nge ke banda na kulonga bisika nyonso na bantu ya nge—ya nge awa na bilanga mpe nyonso.”

121 Yandi tubaka, “Yinga, tata!” Yandi tubaka, “Ya kele yina mu ke kanisa na kusala, kulonga Nsangu ya mbote yayi na bantu ya munu.”

Yandi tubaka, “Nge zola kieleka kutuba yawu, Sambo?”

Yandi tubaka, “Kieleka mu zola kutuba yawu.”

122 Yandi tubaka, “Kwiza, kwenda na munu kuna na—na yinzo ya lufundusu, mu ke pesa nge mpe kimpwanza ya nge. Mu ke pesa nge kimpwanza, mpe nge kele na kimpwanza na kimpika nyonso. Mu sumbaka nge, nge kele ya munu, mpe mu me pesa nge kimpwanza samu ti nge longa Nsangu ya mbote na bantu ya nge.” Yandi kwendaka kuna mpe siniaka na mukanda ya



kimpwanza, to nsamununu, mpe yandi kuzwaka kimpwanza. Yandi zolaka tekama dyaka ve mutindu mpika. Yandi vwandaka muntu ya kimpwanza na kulonga Nsangu ya mbote.

<sup>123</sup> Yandi longaka na kati-kati ya bampangi ya yandi bamvula mingi. Mindele mingi kundimaka na yisi ya ministere ya yandi. Kilumbu mosi kiboba ya bakala yayi kufwaka. Yandi longaka bamvula makumi tatu to makumi yiya, to ya kulutila. Mpe ntangu yandi kufwaka, yandi vwandaka ya kulala na kivinga, mpe mingi ya bankundi ya yandi ya mindele kuvukanaka na kivinga mpe bawu banzaka ti yandi kwendaka na kutala bangunga zole to tatu. Na yina na nsuka ntangu yandi vumbukaka mpe talaka na nziunga na kivinga, yandi tubaka . . .

“Wapi kisika nge vwandaka, Sambo?”

Yandi tubaka, “Oh, mu me vutuka dyaka awa? Mu me vutuka dyaka?”

Ba tubaka, “Wapi dyambu, Sambo?”

Yandi tubaka, “Oh, mu vwandaka me zabuka Yinsi yankaka.”

Ba tubaka, “Zonzila beto yawu.”

<sup>124</sup> Yandi tubaka, “Mbote, mu vwandaka me kota kaka, na Mvwandulu ya Yandi.” Mpe yandi tubaka, “Ntangu mu vwandaka me telama kuna,” yandi tubaka, “ya vwandaka na Wanzio mosi vwandaka me kwiza, me tuba, ‘Nkumbu ya nge kele, Sambo *Kingandi*?’”

Yandi tubaka, “Yinga, tata, ya kele yawu.”

Yandi tubaka, “Kota.”

“Mu kotaka, mpe mu talaka Yandi ya kuvwanda kuna.”

<sup>125</sup> Yandi tubaka, “Sambo, kwiza awa ntangu yayi, na manima nge me mona Yandi mu zola nge, kukwiza awa, beto zola kupesa nge robe ya nge, beto zola kupesa nge harpe ya nge, beto zola kupesa nge yimpu ya nge.”

Sambo tubaka, “Kuzonzila munu ve na ba-harpe, bayimpu, mpe ba-robe.”

Yandi tubaka, “Kasi nge me nunga musendo, beto zola kupesa nge musendo ya nge.”

<sup>126</sup> Yandi tubaka, “Beno zonzila ve . . . samu na munu . . . na yina me tala misendo.” Yandi tubaka, “Beno bika kaka munu kutelama mpe kutala Yandi bamvula funda mosi. Yina ke vwanda musendo ya munu.”

<sup>127</sup> Mu banza ti ya kele pene mutindu beto nyonso ke kuwa, “Beno bika kaka munu kutelama mpe kutala Yandi.” Oh, ya ke lunga ti mu kuzwa nzutu ya mutindu yankaka na yina mu kele na yawu ntangu yayi, konso singa ya nzutu munu kaka samu na kutala Yandi.

<sup>128</sup> Kuna Jean telamaka mpe yandi monaka Yandi ya kuvwanda na zulu ya Kiti ya kintinu, mpe Yandi “vwandaka talana mutindu ditadi ya jaspe mpe ya sardoine.” Ntangu yayi, bima nyonso mpe konso mpova kele na mbangululu na Biblia. Ntangu yayi, “ditadi ya jaspe mpe ya sardoine.”

<sup>129</sup> Ntangu yayi, kana beno ke tala, ya ke fwanakana na Masonuku yankaka. Na ntonono ya Masonuku, Yandi vwandaka Alpha, Omega, Yandi vwandaka Mbandukulu mpe Nsuka, Yandi vwandaka ya Ntete mpe ya Nsuka, Yandi vwandaka Tata, Mwana, mpe Mpeve-Santu. Yandi vwandaka “nyonso na nyonso” vwandaka ya kuvukana na Yandi. Matthieu 17 ke lakisa ti Yandi . . .kuna na Mongo ya Nsobolo, ya vwandaka nyonso ya kuvukana na Yandi.

<sup>130</sup> Ntangu yayi, “jaspe” vwandaka ditadi, mpe “sardoine” vwandaka ditadi. (Ntangu yayi, beto ke baka bantinta ya yawu na mwa ntangu.) Ntangu yayi, mu zola beno kutala ti mosi na mosi ya nkooko ntangu bawu vwandaka butuka, inga, konso muntu, vwandaka na ditadi ya mbutukulu. Ya munu, mu butukaka na Ngonda ya yiya, diama. Mpe bangonda yankaka ke monikisa matadi yankaka. Mbote, bankooko vwandaka mosi. Konso ntangu yina nkooko, ntangu yandi vwandaka butuka, yandi vwan- . . .vwanda kuzwa ditadi ya mbutukulu.

<sup>131</sup> Mpe kaka samu na kutelama awa mwa ntangu fyoti. Ntangu bamama ya Hébreux yayi . . .Beno bika munu kulakisa beno Ndinga ya Nzambi, nkundi, samu ti lukwikilu ya beno kutungama kieleka na Ndinga ya Nzambi. Konso ntangu, bamama ya ba-Hébreu yayi, ntangu bawu vwandaka na mpasi, na kati ya bampasi ya kubuta, samu na kubuta . . .kubuta bana ya bawu, kaka bampova yina yandi vwandaka tuba na kubutaka muntu yina (bébé yina vwandaka butuka na yandi) nkumbu ya yandi, mpe ya vwandaka tula yandi na kisika na Palestine kisika yandi ke vwanda na nkwezulu ya Mfumu. Bampasi ya kubuta na mama yayi! Mutindu, *Éphraïm* zola kutuba “pene-pene ya mubu.” Beno me mona? Mpe ba pesaka *Éphraïm* kitini ya yandi pene-pene ya mubu. Mpe, beto tuba, *Juda* zola kutuba . . .mu zaba ve yinki mpova yayi zola kutuba, kasi mu lendaka baka yawu. Ntangu yayi, beno me mona, ya kele kisika mu kele ve na ntangu, bima ya fyoti yayi, samu na kubaka bima yango. Kasi kuna na kuvutuka, mpe *Juda*, kisika nyonso *Juda* zola kutuba, zola kutuba kisika ya yandi ya kutula na kati-kati ya bana ya Israël.

<sup>132</sup> Mpe beno baka Genèse 48 mpe 49, beno ke tala kuna ti Jacob, na yina yandi vwanda kufwa, ya kutelama na yinti ya yandi, ya kufwa meso, yandi landila bisika tubaka na bana yango bisika bawu ke vwanda na nsuka ya yinza. Mpe bawu landila kaka bisika kele kaka ya kuvwanda kuna ntangu yayi tuka bawu me vutukana yinsi. Yandi tubaka na Joseph, “Nge kele vinu ya mubisu na lweka ya kibaka,” beno me mona, “pene-pene

ya yinto,” maza. Yandi landilaka. Yandi tubaka, “Nge me tula kivuvu na Mfumu Nzambi. Nge me kumisa ngolo kintala ya—ya nge” (Etats-Unis. Beno me mona?) “na Mfumu, kasi kilumbu vinu yina ke vutuka na kibaka.” Mpe yandi yayi kuna, kaka kuna ntangu yayi. Kieleka kaka yina yandi tubaka na kutala bamvula mafunda tatu me luta, ya ke vutukila kaka. Yandi tubaka na Ephraïm ti yandi kotisaka makulu ya yandi na mafuta, mpe Ephraïm kuvwanda kaka kuna kisika mabulu ya nene ya mafuta kele. Kaka kieleka.

133 Ya vwandaka kutuba ya bantu yango, yinki vwandaka na bantu yango yina ke kufwa? Nzambi vwandaka baka basinga ya bawu ya nzutu mpe vwandaka sala na kati ya bawu!

134 Ya ke talana mutindu ntangu Kimfumu ya Rome kumwangsaka bawu, ntangu bayankaka mwangsaka bawu, ntangu ba vwandaka ya kuyina na Hitler, makumi ya mafunda na bambala mafunda, yandi fulaka mupepe na misisa ya bawu mpe bawu kufwaka, beno zolaka mona banzutu ya bawu kuvwanda na zulu ya bibaka ya bisengo na ba-bébé ya bawu mpe nyonso yankaka, mpe mikwa . . . mpe vwandaka baka mpe kusalaka na mikwa ya bawu ba-engrain. Vwandaka basisa kaka bawu kuna mpe kupesa ke tobula bawu ntunga, ke tula bawu na wagon. Mpe bawu vwandaka basika, na ntangu bawu vwandaka basika, mpe na kubanda, ba vwandaka yimba, “Mesiya ke kwiza mpe beto ke kunwa dyaka menga ya vinu.” Ntangu ba vwandaka kwenda, na kufwa, ba-Juif yango, na kutambulaka kaka kuna, na kuzabaka ti na manima ntima ke bula dyaka fyoti mpe ya ke suka. Mpe kuna bawu vwandaka kwenda, na kuyimba, “Beto ke mona Mesiya na ntangu fyoti.” Oh, la la! Na kusalaka ba-engrain na mikwa ya bawu.

135 Mingi ya beno basoda na kati awa zaba yawu mpe me monaka yawu. Mu telamaka na bisika yina Hitler mpe bayankaka, vwandaka kuyoka bawu mpe nyonso yankaka, kuna. Mpe beno tala Staline mpe Russie mpe bawu nyonso, kusala kima mutindu mosi. Ya kele kieleka. Kasi na ba-Juif yina, yinki vwandaka dyambu? Ba vwandaka ya kukwika na kuvutuka na yinsi ya bawu. Ya kele kisika bawu kele.

136 Ntangu yayi, mu kele na filme ya nene yina, *Baminuti Tatu Na Ntwala Ya Kati-kati Ya Mpimpa*. Ntangu ba-Juif yayi vwandaka kota, ba vwandaka yufula bawu, ba tubaka, “Samu na yinki beno ke na kuvutukaka, samu na kufwa na yinsi ya beno?”

137 Bawu vwandaka tuba, “Beto me kwiza samu na kumona Mesiya.” Amen. Hmm! Beto kele na nsuka ya ntangu.

138 Mosi na mosi ya bana yango ntangu bawu vwandaka butuka, bawu vwanda kuzwa ditadi ya mbutukulu. Mpe ntangu Aaron, nganga-Nzambi ya ntete na zulu ya mosi na mosi ya bana yina, vwandaka na kinkuti ya kisengo na zulu ya yandi, na robe ya

yandi. Yawu yina mu zola baka mwa ntangu ya yinda, samu na kukota na nzila yayi ya 6, samu ti yina ke kotisa konso kidimbu ya Ngwisani ya Ntama kaka na kati kuna. Konso . . . bima nyonso ya yinzo mpe bima nyonso na kati ya Ngwisani ya Ntama vwandaka kifwani ya yina monanaka na Mazulu, vwandaka kifwani samu na bantu.

<sup>139</sup> Mpe beno tala kinkuti ya kisengo ya Aaron, yandi vwandaka nganga-Nzambi ya ntete. Beno tala, ditadi ya mbutukulu ya konso dikanda vwandaka monikisama na kati kuna. Mosi, tulaka ditadi ya yandi kuna, ditadi ya mbutukulu; dikanda ya Ephraim, dikanda ya Manassé, dikanda ya Gad, dikanda ya Benjamin, nyonso vwandaka ya kumonikisa na kati awa. Mpe ya kele mutindu . . . Mpe bawu vwandaka baka matadi yango ya mbutukulu, matadi yango ya ntalu, mpe vwandaka tula yawu na zulu ya poto mutindu yayi. Mpe kana profete vwandaka pesa profesi, mpe kana ya ke wakana mbote to ve, ba vwandaka nata yandi na Urim Thummim yayi mpe vwandaka bika yandi kutuba profesi ya yandi; kana ya kele na Nsemo ya santu yina ke kwiza kuna mpe ke banda na kulezima na matadi yayi kintwadi, ya vwandaka Nzambi vwandaka zonza. Ya vwandaka samu na dikanda ya muvimba, bawu nyonso, dibuta nyonso.

<sup>140</sup> Ntangu yayi, na zulu ya bayayi, ditadi ya ntete. Ya ntete, bantu yikwa zaba nani vwandaka mwana ya ntete? Yinki vwandaka nkumbu ya yandi? Ruben. Mbote mingi. Nani vwandaka mwana ya nsuka? Benjamin. Ya kele kieleka. Ditadi ya mbutukulu ya Ruben vwandaka “zape,” ditadi ya mbutukulu ya Benjamin vwandaka “sardoine.” Yandi vwandaka talana mutindu “Ruben mpe Benjamin,” ya Ntete mpe ya Nsuka, Yandi yina Vwandaka, Yina Kele, mpe Ke Kwiza, Yandi vwandaka Alpha (A) na alefabeti ya Grec, Omega (Z) na alefabeti ya Grec. Yandi vwandaka ya Ntete, ya Nsuka, Yandi vwandaka kubanda Benjamin tii Ruben, katuka Ruben na Benjamin. Oh, la la! Kuna Yandi vwandaka, “Vwandaka talana mutindu ditadi ya sardoine mpe mutindu ditadi ya jaspe.” Yandi vwandaka ya kuvwanda na zulu ya Kiti yayi ya kimfumu!

<sup>141</sup> Wapi mutindu beno nyonso ke zola kumona Yandi kuvwanda na zulu na Nkembo ya Yandi? Beto luta na Apocalypse 21:10, kaka na nswalu, mpe kubaka kaka Yandi awa. Mbote mingi, 21:10 tii na 11.

*Mpe yandi nataka munu na kimpeve na mongo ya nene mpe ya zulu, mpe lakisaka munu mbanza ya nene yina, Jérusalem ya santu, yina kulumukaka na mazulu na kukatukaka na Nzambi,*

*Vwandaka na nkembo ya Nzambi: . . . Vwandaka na nkembo ya Nzambi: mpe bansemo ya yandi vwandaka mutindu na ditadi mosi ya ntalu mingi, kaka mutindu . . . jaspe . . . , pwelele mutindu crystal;*

142 “Nsemo ya Yandi.” Nsemo! Nani kele Nsemo? “Mpe Mbanza vwandaka na nsatu ya mwini ve, samu Mwana-dimeme kele Nsemo ya yawu.”

143 Ditadi “Ya jaspe, ya sardoine”. Nkembo ya Nzambi kele Yesu Klisto, Nkembo ya Yesu Klisto kele Dibuundu ya Yandi. Mpe Yandi vwandaka ya Ntete. Nani Yandi vwandaka? Yandi vwandaka Mbandukulu ya ntangu, Yandi kele Nsuka ya ntangu. Yandi vwandaka ya Ntete ya bankooko, Yandi kele ya Nsuka ya bankooko. Yandi vwandaka Dibuundu yina vwandaka na . . . Yandi vwandaka Mpeve yina vwandaka na kati ya Dibuundu ya Ephèse, Yandi kele Mpeve ya Dibuundu na Laodicée. Yandi kele ya Ntete mpe ya Nsuka, A tii Z, ya Ntete, ya Nsuka, Yandi yina Vwandaka mpe Ke Kwiza, Nsimbulu mpe Dikanda ya David, Mbwetete ya Suka, Lis ya Kiwanda, Rose ya Saron! Oh, ya kele na bankama yiya mpe bima ya bisalu na kati ya Biblia ke tadila Yandi. Beno banza kaka na yawu, yina Yandi vwandaka! Mpe kasi Yandi vwandaka Mfumu Yesu ya kulemvuka yina kubutamaka na kidikulu ya bibulu samu na balukumu ya Nzambi.

144 Nyonso yina kele ya kulemvuka, beno tala yawu mbote samu ti ya kele kieleka. Nyonso yina kele ya kunanguka, na yawu beno kipe yawu ve; beno me mona, ya kele mupepe mingi, mpe kima ve na yawu. Mbote mingi.

145 Ntangu yayi, “Yandi vwandaka talana mutindu ditadi ya jaspe mpe ya sardoine.” Beto vutuka. Beno me . . .? Beto kele na mwa ntangu, mutindu yina ve? Beto kele na minuti pene makumi yiya dyaka. Beto tala, beto vutuka na Ezéchiel 1. Beno vutuka na kati ya Biblia na Ngwisani ya Ntama, na Ezéchiel, mpe beto tanga awa kisika Ezéchiel kumonaka Yandi, mpe. Mpe beno fwanikisa Masonuku yayi ntangu yayi mpe beno mona kisika beto kele. Ezéchiel, kapu ya 1te, mbote mingi, ntangu yayi beto tanga mwa ntangu fyoti. Ntangu yayi mu ke tanga banzila tanu ya ntete, mpe kuna beto ke tanga, mu sonikaka yawu awa, kubanda na 26 tii na 28. Kasi beto tanga banzila ya ntete ntangu yayi ya kapu ya 1te ya Ezéchiel, profete. Mbote mingi:

*Mpe ya salamaka na mvula ya kumi na tatu, mpe na ngonda ya yiya, na kilumbu ya tanu ya ngonda, . . . mu vwandaka na kati-kati ya bankole—na kati-kati ya bankole na lweka ya nzadi ya Kebar, . . . (Ya kele ya kulunga, Kebar? K-e-b-a-r, Kebar.) . . . mpe mazulu vwandaka ya kuzibuka, mpe mu monaka vision ya Nzambi.*

*Mpe na . . . (Ntangu yayi, beno tala mbote.) . . . Na kilumbu ya tanu ya ngonda, yina kele na ngonda yina nkole ya ntinu Jojakin,*

*Ndinga ya MFUMU kwizaka pwelele na Ezéchiel ngangana-Nzambi, mwana ya Buzi, na yinsi ya . . . ba-*

*Chaldéen na lweka ya nzadi ya Kebar; mpe diboko ya MFUMU vwandaka . . . na zulu ya yandi.*

*Mpe mu talaka, mpe, tala, mupepe ya ngolo kubasikaka na node, . . .*

146 Beno tala mbote profete yayi awa, bankama tanu mpe makumi yivwa na tanu ya bamvula ntete nkwezulu ya Klisto, beno mona mutindu vision ya yandi ke fwanakana na Jean:

*. . . mupepe ya ngolo kubasikaka na node, ditudi ya nene, . . . tiya vwandaka zibula yawu mosi, mpe kulezima vwandaka na ziunga ya yawu, mpe kati-kati ya yayi vwandaka mutindu ntinta ya bumbwaki, na kati-kati ya tiya.*

*Mpe na kati-kati ya yandi kwisaka mutindu bivangu yiya ya moyo. Mpe yayi vwandaka kifwani ya bawu; bawu vwandaka mutindu mosi na . . . muntu.*

147 Beno tala, ntinta ya Mpeve ya Nzambi yina vwandaka na zulu ya mutindu ya Bivangu yiya yayi, vwandaka bumbwaki. Bumbwaki kele ntinta ya saka-saka na ya mbwaki. Ntangu yayi, beno tala mbote, “ntinta ya saka-saka na ya mbwaki,” *bumbwaki*, oh, Yandi kele mutindu mosi mazono. . . Yandi monikisaka Yandi mosi na Ezéchiél; na kati ya vision ya Ezéchiél, Nsemoyayi yina yandi monaka kukwiza na na zulu ya Bivangu yiya ya moyo yina vwandaka ya ntinta ya saka-saka na ya mbwaki. Ntangu Yandi kwizaka na Jean, Yandi talanaka na ntinta ya *emeraude* yina kele mpe “ntinta ya saka-saka na ya mbwaki.” Yandi ke kwiza ntangu yayi na mumoni na ntinta ya saka-saka na ya mbwaki. Yandi ke kwizaka na beto na ntinta ya saka-saka na ya mbwaki, Nsemoyayi! Kutambula na kati ya Nsemoyayi, Yandi kele Nsemoyayi.

148 Beto kwenda na nzila ya 26 ntangu yayi, samu beto tanga tii nzila ya 28. Nzila ya 26:

*Mpe na zulu ya zu- . . .*

Oh, ntangu beno ke vutuka na yinzo, mu zola ti beno notika yawu mpe ti beno tanga kitini nyonso ya yawu. Beto landa ntangu:

*Mpe na zulu ya matuti yina vwandaka na zulu ya bayintu ya bawu vwandaka mutindu ditadi, na kifwani ya ditadi ya sardoine: mpe na zulu mutindu kiti ya kimfumu vwandaka mutindu kifwani ya muntu na zulu . . . yawu.*

149 Yina vwandaka Mwana ya muntu, beno me mona, Klisto. Ntangu yayi beno tala mbote mutindu Yandi vwandaka, mutindu Yandi vwandaka ya kulwata awa:

*Mpe mu monaka mutindu bantinta ya bumbwaki, (beno tala mbote, na ziunga ya Mwana ya muntu yayi)*

*mutindu kifwani ya tiya na ziunga ya yawu—na ziunga ya yawu, kubanda kifwani ya luketo ya yandi. . .*

150 Beno kuwa! Beno vwanda ya kimpeve, beno bakula, mpe na kati ya bantima ya beno mosi awa. Mu ke lomba beno na Nkumbu ya Yesu, beno bumba yayi samu na beno mosi! Kasi beno bambuka kaka moyo mutindu ya kele lusakumunu!

151 “Mu. . .” Beto banda dyaka na nzila ya 27. Beno kuwa, muntu nyonso! Beno bakula kieleka mbote ntangu yayi!

*Mpe mu monaka mutindu ntinta ya bumbwaki (ya kele ntinta ya saka-saka na mbwaki), mutindu kifwani ya tiya na ziunga. . . yawu, . . .*

Tiya ya ntinta ya saka-saka na mbwaki. Ntangu yayi:

*. . . kubanda kifwani ya luketo ya yandi tii na zulu, (Kubanda luketo ya yandi tii na zulu.) mpe kubanda kifwani ya luketo ya yandi. . . na yisi, mu monaka mutindu ya vwandaka kifwani ya tiya, mpe ya vwandaka lezima na ziunga. (Tiya vwandaka ziunga.)*

*Mutindu kifwani ya kongolo mpe na kati ya ntinta na bilumbu ya mvula, mutindu vwandaka kifwani ya kulezima na ziunga. Yayi vwandaka kifwani mpe mutindu mpe nkembo ya Mfumu. Mpe ntangu mu monaka yawu, mu kubwaka na zulu ya kizizi ya munu, mpe mu kuwaka ndinga ya muntu yina zonzaka.*

152 Beno tala mbote! Beno me kubama? Beno kuwa! Beno bumba yayi ntangu yayi, beno bambuka kaka moyo, samu beno zaba. (Gene, nge lenda kanga bande yayi.) Beno kuwa! (Ve, mu fwana kanga yawu kuna ve, ya kele ya kulunga. Mu vwanda zola kaka kutuba bika bande kulandila; mu ke bika yayi samu na Dibundu.) Beno tala yayi! Ntangu yayi, samu ti beno zaba ti ntinta ya Nsemu yina kele na Mfumu, mpe Nsemu ya Mfumu yina ke landaka Mfumu, mpe ya kele mutindu Mfumu, ya kele bumbwaki, ntinta ya saka-saka na ya mbwaki. Ya kele ntinta mosi ya Nsemu yina kele na beto bubu yayi, mutindu bantu ya science kubakaka foto ya Yawu, ntinta ya saka-saka na ya mbwaki, bumbwaki.

153 Mu vwandaka ntete mwana ya fyoti ya bakala, ntangu mu monaka Yawu mbala ya ntete, beno ke bambuka moyo, bantu ya ntangu ya ntama awa. Mu vwanda zonzilaka beno ntangu nyonso ntete ba baka foto awa, “Ya vwandaka ntinta ya saka-saka na ya mbwaki, yina kele bumbwaki.” Ntangu yayi, samu na kuzabisa beno ti Mpeve ya Mfumu. . .

154 Yandi tubaka, ntangu yandi monaka yawu kubanda luketo ya Kivangu ya moyo yina telamaka na ntwala ya yandi, “Kubanda luketo ya yandi na zulu vwandaka mutindu tiya, Nsemu kubanda luketo ya yandi na yisi, ya vwandaka ya

kufuka na Nsemo. Mpe ziunga nyonso vwandaka bantinta mingi mutindu mukyama.” Ya kele kieleka?

155 Mu zola beno kubambuka moyo, ti Nzambi ke zingaka dyaka na bantinta yango mosi, “kubanda luketo na zulu, tiya, ntinta ya bumbwaki,” ba bakaka na camera to na appareil photo en couleur, “bumbwaki kubanda luketo na zulu, kubanda luketo na yisi, mpe na ziunga, bantinta mingi mutindu mukyama kele na zulu na manima ya mvula.” Yesu Klisto mutindu mosi mazono, bubu yayi, mpe kukonda nsuka! Mpeve-Santu dyaka na ngolo ya Yandi, dyaka na kati ya Dibuundu ya Yandi na bilumbu yayi ya nsuka. Yawu yina. Munu ve, mu vwandaka kaka ya kutelama kuna, kasi ya vwandaka foto yina ba bakaka. Mu zola beno kutala yawu, kaka kieleka yina Ezéchiel kumonaka. Bantinta mosi, mutindu mosi, mpe salaka mutindu mosi, mpe lezimaka mutindu mosi, na Bivangu ya moyo yayi. Yinki ya kele? Bivangu ya moyo na kumonikisaka Dibuundu ya moyo, Dibuundu yina ke na zingaka na nzila ya ngolo mpe mvumbukulu ya Klisto. Bantinta ya yawu mosi ya bumbwaki fukaka yawu kubanda luketo na zulu, kubanda luketo na yisi.

156 Ya kele dyaka ve na kubanza, science me baka bafoto! Beno tala bantinta ya bawu, beno tala kaka bantinta ya tiya na kati kuna. Beno me mona? Mukyama. Beno tala na ntinta ya saka-saka na ya mbwaki yayi ya emeraude. Ntangu yayi, na appareil photo *yayi*, ya vwandaka kaka appareil photo ya mpamba ya photographer. Na appareil photo *yayi* vwandaka na couleur, filme ya couleur, Kodachrome ya couleur. Beno tala bantinta ya emeraude na kati kuna. Kana mu lendaka nata yawu na zulu ya mwinda kisika mosi kisika beno na manima lenda mona yawu. Beno lenda mona ntangu yayi? “Mutindu na mukyama,” beno tala banzila kukatuka na manima na mantwala mutindu mukyama, mosi na mosi na mutindu yankaka ya ntinta. Beto ke kota na yawu na mwa baminuti, yinki kele bantinta yango mpe yinki bawu ke monikisa?

157 Oh! Yina ke sala kaka ntima ya munu ya mputu kudumuka na kyese. Mpe na kuzaba ti na kilumbu yayi yina beto ke na kuzingila, ti Klisto . . . ntangu bantoto yankaka nyonso kele zyelo ke dyamisa, ntoto nyonso yankaka. Mu ke banza, “Samu na yinki mu lenda tuba yawu ve? Samu na yinki mu lenda sala yinza kumona Yawu ve?” Yinza zolaka ve kumona Yawu. Yinza ke mona Yawu ve, ata mbala mosi ve ti bawu ke mona Yawu! Kasi Dibuundu ke na kuzwaka kuningana ya Yawu ya kulutula nene yina Yawu me kuzwaka ntete ve!

158 Na bilumbu ya bawu bawu lendaka ve kubaka Yawu na foto. Bawu lenda ntangu yayi samu ti bawu me kuzwa bima ya kusadila. Bayina me meka na kubaka mekaniki samu na kumanga Nzambi, ke vutuka kaka manima mpe ke monisa ti ya kele na Nzambi. Ya kele kieleka, “Emeraude.” Ntangu yayi, beno bambuka moyo, munu ve me sala yawu, mu ke na



kutangilaka beno yawu na Biblia. Beno tala mbote na yina mu ke tanga, mpe beno tala, mpe beno tala ti Yawu ke Mfumu Nzambi mosi, ya ke na luswaswanu ve. Beno tala mbote nzila ya 27:

*Mpe mu monaka... ntinta ya bumbwaki, mutindu na kifwani ya tiya...*

159 Beno me mona, mutindu milaka ya tiya. Beno me mona? Bantinta ya bumbwaki vwandaka katuka na tiya. Beno ke mona yawu ntangu yayi? Bumbwaki, yayi ke bantinta ya bumbwaki yina vwandaka katuka na tiya. Awa na yisi ya ke tuba:

*Mpe kifwani mutindu kongolo, to mukyama, na bilumbu na manima ya mvula, ... mukyama, na bilumbu na manima ya mvula, ...*

160 Mpe ya vwandaka na “Kivangu ya moyo.” Yina Jean vwanza monikisa, Dibuundu ya muvimba, yina ba zangulaka. Mu tubaka na beno. Muntu mosi awa na vision lendaka monikisa Nzutu ya muvimba ya Klisto, ya kufuka! Ntangu yayi, beno tala mbote:

*Mpe mu monaka... ntinta ya bumbwaki, mutindu kifwani ya tiya... ziunga na yawu, mpe kifwani... kubanda kifwani ya luketo ya yandi tii na zulu, mpe kubanda kifwani ya luketo ya yandi tii na yisi, mu monaka mutindu ya vwandaka kifwani ya tiya, ...*

161 Beno tala mbote, beno tala tiya yina vwandaka lezima na ngolo. Wapi kisika yawu vwandaka basika? Mukyama, bantinta sambwadi. Ntangu yayi, beno tala mbote mbote, kieleka ya ke na bantinta sambwadi kuna, mpe mukyama ke na bantinta sambwadi.

*... mu monaka mutindu ya vwandaka kifwani ya tiya, mpe ya vwandaka lezima na ziunga.*

*Mutindu kifwani ya kongolo yina ke na kati ya matuti na kilumbu ya mvula, mutindu vwandaka kifwani ya kulezima na ziunga. (Na ziunga ya Kiti ya kimfumu ya Nzambi, beno me mona.) Yayi vwandaka kifwani ya mutindu ya nkembo ya MFUMU.*

162 Mfumu ve, ntangu yayi, nkembo ya Mfumu. Nkembo ya Mfumu na kufukaka na zulu ya Dibuundu ya Yandi samu ti Yandi ke na kati ya Dibuundu ya Yandi! Amen! Oh, ya ke wakana bulawu samu na muntu ya ndwenga ve, kasi wapi mutindu nene Yawu ke samu na bayina ke kwikila. Uh-huh.

*... Yayi vwandaka kifwani mpe mutindu ya nkembo ya MFUMU. Mpe ntangu mu monaka yawu, mu kubwaka na zulu ya kizizi ya munu, mpe mu kuwaka ndinga kuzonza...*

163 Ntangu yayi yandi ke kwenda na ntwala mpe ke tuba yina vision zola kutuba, yina beto ke ve na ntangu ya kukota na suka yayi.

164 Ntangu yayi, beno tala mutindu Mfumu na kyadi ya Yandi ya nene pesaka beto bima yayi.

165 Ntangu yayi beto baka mosi yankaka. Bawu zole Ezéchiél mpe Jean monaka Yandi na dinsweki ya bantinta ya Yandi mpe na Nsemo, mpe ba bokilaka Yawu “ntinta ya bumbwaki.” Jean na bilumbu na ntuala. . . Beno bayina ke tula. . . beno ke na kusunikaka Masonuku, ya Ntete ya Jean 1:5 tii 7. Jean, na bilumbu na ntuala (mpe yandi vwandaka na kisanga ya Patmos pene ya bamvula tatu ntangu yandi sonikaka Buku), ntangu yandi vutukaka, kiboba ya bakala ya bamvula yivwa, na ya Ntete ya Jean 1:5 mpe 7, yandi tubaka, “Nzambi kele Nsemo.” Jean kuzwaka kimbangi, yandi monaka Yandi mpe yandi zabaka ti Yandi vwandaka Nsemo, Nsemo, Nsemo ya Seko; ve mwinda ya yinza, mwinda ya mwinda ve, mwinda ya lutiliki, ya mwini, kasi Nsemo ya Seko! Oh, mutindu mu zola Yandi. “Nzambi kele Nsemo.”

166 Beno tala, beto ke vutuka ntangu yayi mpe kumona kisika beto kele. Na nzila ya 3 dyaka, mutindu yina ve? Beto ke bakula Yawu? Mu banza. Mbote mingi:

*. . . yandi. . . vwandaka talana na zulu mutindu ditadi ya jaspe mpe ya sardoine: mpe ya vwandaka na mukyama. . . ziunga kiti ya kimfumu, na kumona mutindu emeraude. (Ntinta ya saka-saka na ya mbwaki.)*

167 Ntangu yayi, “mukyama,” beno me mona ya vwandaka mukyama. Beto vutuka na Genèse 9 mpe beto tala, na Genèse 9:13. Mpe beto ke tala dyaka awa “mukyama,” ntangu mukyama ya ntete kumonana. Genèse kapu ya 9, mpe beto ke banda na nzila ya 13, Genèse 9:13. Beno nyonso ke zola Yayi? Oh, mu zola Yawu! Mu ke sepelaka kaka na Yawu ve, mu ke zolaka Yawu! Beno tala:

*Mu me tula kongolo ya munu na matuti, mpe ya ke vwanda samu na kidimbu (Benó tala mbote!), kidimbu ya ngwisani na kati-kati ya munu mpe ntoto.*

168 Yinki? “Na kati-kati ya Munu mpe Noé”? Ve. “Na kati-kati ya Munu mpe ntoto.”

*Mpe ya ke kwiza na kusalama, ntangu mu ke nata dituti na zulu ya ntoto, ti kongolo ke monana na dituti:*

*Mpe mu ke bambuka moyo na ngwisani ya munu, yina—yina kele na kati-kati ya munu mpe beno. . .*

169 Ntangu yayi Yandi ke vutuka na ngwisani ya Yandi na kati-kati ya bawu, kasi ngwisani ya mukyama. . . Beno me mona, ngwisani vwandaka luzingu samu na Noé, ti Yandi kubikaka yandi, kasi ngwisani yina Nzambi salaka na Yandi mosi vwandaka mukyama, ti Yandi zolaka ve. . . Ntangu yayi, mu ke lakisa beno yina vwandaka ngwisani ya Noé na Nzambi,

na minuti. Kasi yayi awa vwandaka ngwisani ya Nzambi Yandi mosi na Yandi mosi, amen, mukyama.

170 Ntangu yayi, beto ke mona ti *ngwisani* kele “kidimbu,” kidimbu. Nzambi tubaka ti ya vwandaka “kidimbu” awa, Yandi tubaka ve? Beno me mona?

*Mu . . . tula munu . . . mu me tula kongolo ya munu na matuti, (Yina kele na manima ya kubeba ya yinza, kubeba na nzila ya maza; nsuni nyonso, na ngaanda ya Noé—Noé, ba kufwaka.) mpe ya ke vwanda samu na kidimbu ya ngwisani na kati-kati ya munu mpe ntoto.*

171 Ve “Munu mpe yinza.” *Yinza* “kosmos.” Beno me mona? Kasi yayi kele “na kati-kati ya Munu na ntoto.” Nzambi tubaka, “Mu salaka ntoto yango. Mpe Mu me talisa yawu kieleka mpasi na mutindu ya yimbi, ti Mu me balula yawu zulu na yisi mpe me sala yawu na bitini-bitini. Mpe—mpe Mu—Mu—Mu—Mu—Mu zolaka sala yawu ve, Mu banza.” Yandi tubaka, “Mu—Mu me tala mpe mawa, ya vwandaka kima mosi ya boma.”

172 Yinki beno ke banza ya ke vwanda ntangu Yandi ke kwiza na nganzi ya Yandi ntangu yayi? Nkundi musumuki, sungama.

Oh, beno vwanda na kutala mbote mpe beno  
vingila na kutala vision yango,  
Yandi ke na kukwizaka dyaka.

Beno ke kwikila yawu?

Yandi ke na kukwizaka dyaka.

Mu zola yawu, beno ve?

Oh, beno ke vwanda ya kutanga mutindu mosi  
ya bambeni ya Yandi?

Mu ke zola ve kuvwanda yawu. Beno ke zola? Ve, tata. Kuvwanda mbeni ke te- . . . to, kuvwanda mbeni samu na Yandi, kuvwanda na Yandi ke vwanda mbote. Kasi kutelemina Yandi!

Beno vwanda ya kukwondwa ditona na kati,  
beno vwanda ya kutala mbote mpe beno  
vingila na kutala vision yango,  
Yandi ke na kukwiza dyaka. (Hmm!)

173 Ntangu yayi, ngwisani, kidimbu ya yinki? Kidimbu ya yinki? Ya munkayulu yina ba me ndima. Ntangu yayi beno baka Genèse 8:20 mpe 22. Ntangu yayi, Genèse 8:20 mpe 22, mbote mingi, kaka na lweka yankaka ya page ya kele.

*Mpe Noé tunga autel na MFUMU; mpe bakaka . . . bibulu nyonso ya kuvedila, mpe . . . bandeke nyonso ya kuvedila, mpe pesaka minkayulu ya kuyoka na autel.*

*Mpe MFUMU kuwaka nsunga ya mbote; mpe MFUMU kutubaka na ntima ya yandi, Mu ke singa dyaka ve ntoto (singa ntoto) mbala mosi dyaka samu na muntu; samu ti dibanza ya ntima ya yandi kele yimbi kubanda*

*buntwenya ya yandi; to dyaka Mu ke semba mbala mosi dyaka kima nyonso ke zinga, mutindu Mu me sala.*

174 Mpe ntangu yayi beto lenda tanga nzila ya nsuka:

*Mpe. . . Na yina ntoto ke zinga, bambuma ya ntangu mpe kuyonzika, . . . madidi mpe tiya, . . . mvula mpe kisifu, . . . mpe kilumbu mpe mpimpa ke suka ve.*  
(Ngwisani.)

175 Kima mutindu mosi na yina Jean kumonaka: Yesu, ngwisani Nzambi ndimaka kuzungudila mazulu. Mpe na ziunga ya Yandi vwandaka mukyama zungudilaka Kiti ya kimfumu, na kutala mutindu emeraude, Nsemo ya bumbwaki na ntinta ya saka-saka na ziunga ya Kiti ya kimfumu. Lukumu na Nzambi!

176 Beno tala mbote! Noé kele ya kusala na ntete. . . Mukyama ya Noé kele ya kusala na ntete na bantinta sambwadi. Muntu nyonso zaba ti mukyama kele na bantinta sambwadi. Ntangu yayi, yinki kele bantinta yango? Mbwaki, orange, violet, ve, mbwaki—mbwaki, orange. . . ntinta ya saka-saka, bleu, indigo, mpe violet. Ya kele bantinta ya mukyama. Ntangu yayi, beto kele na kima ya mudindu awa, mpe mu ke baka kaka mambu ya ngundi ya yawu samu ti ntangu me luta mingi. Ntangu yayi, beno bambuka moyo, orange, to, mbwaki, orange, jaune, ntinta ya saka-saka, bleu, indigo, mpe violet.

177 Ntangu yayi, kana beno tala, sambwadi. Beno tala mbote. Mukyama sambwadi. . . bantinta sambwadi, mu zolaka tuba, bantinta sambwadi ya mukyama. Ya ke zola kutuba bakongolo sambwadi! Bakongolo sambwadi, mabuundu sambwadi yina ke na kulakisaka bansemo sambwadi, konso nsemo kele ya kufuka na kati ya mosi na yankaka. Ya bandaka na mbwaki, mbwaki. Na manima ya mbwaki ke kwiza orange, yina kele kulakisa ya mbwaki. Na manima ya orange vwandaka. . . na manima—na manima ya orange ke kwiza jaune, ya kele mbwaki mpe orange ya kuvukana kintwadi, ke sala jaune. Na manima ntinta ya saka-saka. Ntinta ya saka-saka mpe bleu ke salaka ndombe. Na manima ke kwiza indigo. Mpe na manima ya indigo ke kwiza violet, yina kele ndambu ya bleu. Aleluya! Beno ke mona ve? Nzambi, na kati ya mukyama ya Yandi ya bantinta sambwadi, ngwisani ya Yandi yina Yandi salaka, ngwisani yina na nzila ya Bansungi Sambwadi ya Dibuundu, bantinta sambwadi, Yandi ke vulusa ntoto.

178 Yinki Yandi ke sala? Beno bambuka moyo, Yandi salaka yawu na ntoto, ntinta ya Yandi. Kasi ntangu yayi beno tala mbote. Mukyama yayi kaka, na mutindu ya horizontal, ke fuka kaka (na kongolo) ndambu mosi ya ntoto. Ya kele mukyama nyonso ya ntinta ya Noé, kaka. . . ke fuka, kaka ndambu ya ntoto. Ya vwandaka na kati ya masuwa, ya kele nyonso beno zolaka mona. Kasi ntangu Jean kumonaka *Yandi* na ntinta ya Yandi ya emeraude, Yandi zungaka Kiti nyonso ya kimfumu ya

Nzambi. Ndambu me tubamaka ntete ata mbala mosi ve. Yandi fukaka . . . Yandi kaka . . . ntoto ke salaka kaka masuwa, ya kele kaka ndambu ya yawu; yina kele bansungi ya dibuundu.

<sup>179</sup> Kasi ntangu Jean kumonaka Yandi na ntinta ya bumbwaki yayi, ntinta ya bumbwaki, Yandi zungudilaka mpe fukaka na ziunga mutindu kulezima. Ludimi ya nsemo! Kulezima ya ntinta ya bumbwaki, Yawu kuzungudilaka bumuntu ya Yandi! Beno me mona? Ntinta mosi, Nzambi mosi na zulu ya nyonso, na nzila ya nyonso, mpe na kati ya nyonso, kasi ya kele na Bansungi Sambwadi ya Dibuundu.

<sup>180</sup> Beno tala mbote diama ya nene. Beto vwanda talaka yawu . . . beno lendaka tala yawu na ntoto na Afrique na babalabala. Beno meka ve na kubumba mosi, samu ti ba me zenga yawu ve. Kana beno kuzwa mosi yina ba me zenga ve, kaka na ntangu yina ba ke tula beno na boloko, mpe ke pesa beno kitumbu ya lusingu samu beno bumbaka yawu. Beno fwana vutula yawu, na ntangu kaka yina beno ke mona yawu.

<sup>181</sup> Ntangu yayi, ba ke baka diama yayi. . . Oh, ya kele kima ya mpasi. Mu monaka masini ya nene ya kunika ya ba-tonne makumi yiya ya kutelama mutindu *yayi*, bawu dukulaka ditadi yango ya bleu na kati kuna, nikaka yawu bisika nyonso, ya nikaka kaka ditadi yango mutindu bombi, kasi ya lendaka ve kunika diama. Makumi yiya yango ya ba-tonne na zulu *kuna*, na kubalukaka na meno ya yawu ya nene mutindu yina, na kuzengaka kaka ditadi yina na bitini; kasi diama ke luta kaka na nzila ya yawu, ya ke katula kima ya makumi yiya ya ba-tonne yina fukaka yawu. Oh! Na yina ba me nika yawu mpe ya ke lutila na kiyengosolo, ke yengisa biyengolo yankaka, ke sukula yawu mpe na manima na nsuka yawu ke kwenda na rampe.

<sup>182</sup> Ntwadisi ya Mine ya nene ya Diama yina na kimberley vwandaka mosi ya ba-huissier kuna na mulonga, kieleka mpangi ya bakala ya mbote, ya kukikulumusa.

<sup>183</sup> Mpe kuna pene ya makulu tanu na zulu ya maza yina, kisika ya vwandaka luta, ya kele, kele Cosmoline ya kutula na zulu kuna. (Beno zaba, wapi mutindu—wapi mutindu beno ke bokilaka kima yayi? . . . Meda, yinki ya kele yina beto kele na yawu na mbungu na dibaya kuna? Vaseline!) Mpe beto ke tula Vaseline yina, pene basentiemele tatu, na kisika ke syelumuka awa. Mpe ya ke kulumuka, mpe beno tala, ntangu nyonso yina ditadi yina ke kwiza kuna, ya ke baluka kaka na Vaseline yango; kasi ntangu diama ke kwiza na zulu ya yawu, ya ke kangama. Diama kele ya kuyuma mpe ya ke kangama na yawu. Mu me monaka ba kubaka yawu, ata bayina ya kulutula fyoti, mpe kukabula bawu na bineti. Mpe mu yufulaka bawu samu na yinki ba vwandaka sala yawu, ba tubaka ti ba vwandaka teka yawu na Amerique samu na ba-aiguille ya Victrola mpe nyonso; ya ke bebaka ve, beno me mona.

184 Kasi badiama yango ya nene, ntangu yayi, beno tala ya kele, kaka mbuma mosi ya nene. Kasi ntangu . . . Bawu ke baka yawu mpe ke baka bamasini ya nsula mpe ke zenga yawu, mpe ke sala kuzenga ya diama. Na yina ntangu bawu ke zenga yawu, ya ke lakisa bantinta ya kulezima ya kara ya yawu, mpe ya ke lakisa bantinta sambwadi, mpe.

Oh, mutindu Yesu . . .

185 Oh, beno lendaka vwanda na mbongo mingi, beno lendaka vwanda na parc ya ba-Cadillac, beno lendaka vwanda pasteur ya yinzo mosi ya nene ya bamvumbi to ya cathedrale ya kima mosi, beno lendaka vwanda bishop to archibishop, kasi, oh, mpangi ya bakala, ntangu beno ke tala Ditadi yina ya ntalu, Diama yango, muntu ke teka bimvwama ya yandi nyonso yina kele na yandi, ke bika yawu, nyonso yankaka.

186 Beno tala mwense ya kulala. Oh, yinki yandi salaka? Yandi zolaka teka nyonso samu na kusumba Mafuta ya yandi. Yinki yandi zolaka teka? Ba-credo ya yandi ya ntama mpe badenomination mpe nyonso. Yandi tekaka nyonso yina vwandaka na yandi samu na kuzwa Klisto, Klisto, Ditadi yango ya nene ya ntalu. Yesu, nzutu yina . . . [Kisika ya mpamba na bande—Mu.] . . . ? . . . Mu ke na tike ya kukwenda na Mazulu ntangu masini ke luta, mosi ya basuka yayi ya mpimpa. Oh, wapi lusakumunu!

Oh, yinto ya kitoko  
Yina ke sukula munu mpembe mutindu mvula  
mpembe;  
Mu zaba yinto yankaka ve,  
Kima yankaka ve kasi Menga ya Yesu.

187 Kuzabana ve, bima ya nene ve, kima ve, bimvwama ve, kima ve—ve, beno pesa kaka munu Yinto ya ntalu yina. Kaka yina!

Mu ke na kima ve ya kunata,  
Kaka na Kulunsi ya Nge mu me kangama.

188 Ditadi yina ya nene ya ntalu! Yinki Yawu vwandaka? Yawu vwandaka ya kulunga. Ya vwandaka na bamvula makumi tatu na tatu mpe ndambu ya bamvula ntangu Nzambi tulaka Yawu na nzila ya masini ya nene yina ke nikaka, ntangu Yandi bakaka Yawu kuna mpe bandaka na kuzenga Yawu. Yandi zengaka Yawu, Yandi nikaka Yawu, Yandi bebisaka Yawu.

*. . . yandi lwalaka samu na masumu ya beto, . . .  
kubebaka samu na disumu ya beto ya nko: kitumbu ya  
ngemba ya beto kubwaka na zulu ya yandi; mpe na  
bamputa ya yandi beto vwandaka ya beluka.*

189 Yinki Nzambi salaka na Muntu ya kulunga yina? Ya kele kaka na mosi ya bawu na yinza, kaka mosi na yinza, mpe ya vwandaka Yandi! Mpe Nzambi losaka Yandi awa, “Yandi lwalaka samu na masumu ya beto.” Samu ti mu vwandaka musumuki, Yandi bikaka ti mukyama ya Nsemo ya Bansungi

Sambwadi ya Dibuundu ya Yandi kulezima na zulu ya munu, samu na kuzaba ti Yandi lwalaka samu na masumu ya munu.

<sup>190</sup> Beno tala mukyama ya beno ya bantinta sambwadi. “Ba bebisaka Yandi samu na disumu ya beto ya nko, kitumbu ya ngemba ya beto na zulu ya Yandi, na bamputa ya Yandi beto belukaka.” Nzambi zengaka Yandi, mpe bebisaka Yandi, mpe nikaka Yandi, mpe zengaka Yandi, ti Yandi zolaka lakisa na nzila ya bamputa ya Yandi ya kufwa, lemvo ya masumu, kyese, ngemba, mvibudulu, mambote, lembami, kusalasana. Bampeve sambwadi ya Nzambi kele bambuma sambwadi ya Mpeve yina ke lakisa dyaka na kati ya bantu ya Yandi. Ba bebisaka, ba bongisaka mpe ba salaka Yandi, ya kele Nsemo ya Nzambi yina ke lezima na nzila ya nzutu ya Muntu mosi yina lendaka vulusa yinza ya muvimba; “Ba ke zangula Munu na ntoto, Mu ke tula bantu nyonso na Munu.” Beno tala mbote mukyama ya bantinta yango mutindu bawu ke monikisa.

<sup>191</sup> Kasi ntangu Jean kumonaka Yandi awa, yinki ya vwandaka? Kilumbu ya mpulusu kusukaka. Ya sukaka nyonso, na yawu yandi monaka Yandi na mutindu ya Yandi ya ntete, ntinta ya bumbwaki. Kaka ndambu kaka ya yinza ve, ya lenda kaka . . . mwini, lenda lezima kaka ndambu ya yinza na ntangu mosi, beno me mona, landila mutindu yawu ke balukaka. Kasi ntangu Jean monaka Yandi, Yandi vwandaka ya kuvwanda na kutala na zulu mutindu jaspe mpe sardoine, bantinta ya bumbwaki; beno vukisa nyonso zole kintwadi, beno ke kuzwa bumbwaki. “Mpe ntinta ya bumbwaki na ziunga ya Kiti ya kimfumu!” Oh, la la! Oh, mu—mu ke tuba na beno, ti kaka . . . beto lendaka landila kaka mpe kulandila.

<sup>192</sup> Bampeve sambwadi, bantinta sambwadi, bansungi ya dibuundu sambwadi, baminisitele sambwadi, bansemo sambwadi, nyonso na sambwadi. Nzambi kele ya kulunga na “sambwadi.” Nzambi salaka bilumbu sambanu; kilumbu ya sambwadi, Yandi kupemaka. Yinza ke zinga bamvula mafunda sambanu, mpe mafunda ya sambwadi kele Millenium.

<sup>193</sup> Beno tala, *ndambu ya selekele*, “ndambu me zabanaka ntete ve.” Ntangu yayi, ya kieleka bima yayi ke monikisa kima mosi.

<sup>194</sup> Ntangu yayi, na Exode 23:13 mpe na Hébreux 6:12, Nzambi salaka ngwisani na Yandi mosi mpe zengaka ndefi na Yandi mosi. Hébreux :13 ke tuba na beto ti, to 9, : 13, ti “Yandi zengaka ndefi na Yandi mosi.” Ya vwandaka ve na ya kulutula nene samu na kuzenga ndefi na ntangu Yandi tubaka na Abraham mpe Isaac, kuna Yandi tubaka na Abraham ti Yandi ke sala ngwisani na yandi, ngwisani ya kukonda nsuka. Nzambi . . .

<sup>195</sup> Ngwisani kele ntangu nyonso ya kusala na ndefi, na yawu ya kele ve na muntu . . . Beno ke zenga ndefi na muntu ya kulutula nene na beno; kuzenga ndefi na mama ya beno, kuzenga ndefi na yinsi ya beno, kuzenga ndefi na kima, kuzenga ndefi na Nzambi.

Kasi beno lendaka zenga ndefi ve kana ti ya kele muntu ya kulutila nene na beno.

<sup>196</sup> Mpe ya vwandaka ve na muntu ya kulutila nene na Nzambi, na yawu Yandi zengaka ndefi Yandi mosi, na Yandi mosi. Amen! Na kuzengaka na Yandi mosi ti Yandi ke sala ngwisani yayi. Amen. Oh! Fiu! Zengaka na yawu, Yandi ke “bumba Nkuna ya Abraham.” Yinki kele Nkuna ya Abraham samu na Bantu ya makanda? Mbotika ya Mpeve-Santu, Nkuna ya Abraham. Yandi zengaka na Yandi mosi, “Mu ke vumbula bawu, mosi na mosi ya bawu, na zulu. Mu ke pesa bawu Luzingu ya Kukonda nsuka mpe ke vutula bawu awa na zulu ya ntoto.” Samu na yinki beto fwana . . . kubanza na yawu?

<sup>197</sup> Na yawu beto ke mona Yandi na selekele ya ntinta ya saka-saka ya kongolo, ntinta ya bumbwaki. Busaka-saka yayi, yinki ya ke monikisa ntinta ya saka-saka? Luzingu. Ntinta ya saka-saka kele makasa ya mubisu, ntangu nyonso kele mubisu, ya kele luzingu. Yinki ya zola kutuba? Ti Nzambi silaka, na yina Yandi salaka ndefi kuna na Genèse, ti Yandi “zolaka ve. . .” (Ke tula mukyama na zulu.) ti Yandi “ke bebisa dyaka ve yinza yayi na nzila ya maza.” Yandi salaka mpe ndefi ya Yandi mpe zengaka na Yandi mosi ti Yandi ke vumbula Nkuna nyonso ya Abraham, mpe yinza yayi ke zaba kuningana nyonso ya balufundusu ya yawu. Balufundusu yina beto ke baka na baleso na bilumbu na ntwala ke kwiza, ke lakisa beno kisika yinza yayi ke luka mpe ke kota na ba-volcan, mpe ke pasuka na bitini-bitini, mpe zulu na yisi mpe nyonso. Kasi Yandi zengaka na Yandi mosi ti Yandi ke bebisa yawu ve, kasi Yandi ke sala dyaka yawu mbote mpe ke tula bana ya Yandi na zulu ya ntoto samu na Millenium yina. Oh, la la!

Mu ke vingila nkwezulu ya Kilumbu yina ya  
kyese ya millenium,  
Ntangu Mfumu ya beto ya kusakumuna ke  
kwiza kubaka Kento ya Yandi ya makwela  
yina ke na kovingilaka;  
Oh! Ntima ya munu ke vingila, ke dila samu na  
kilumbu yina ya mbote ya kukuula,  
Ntangu Mvulusi ya beto ke vutuka dyaka na  
ntoto.

<sup>198</sup> Oh, wapi mutindu beto ke vingila na kumona Kilumbu yina, Yandi silaka ti Millenium ya nene ke kwiza. Mpe kima yankaka, ya kele samu na yina Yandi vwandaka zungudila, Yandi kele Nzambi yina ke zitisaka ngwisani. Yandi ke zitisa ngwisani ya Yandi!

<sup>199</sup> Ntangu yayi beto baka nzila yina ke landa, na mutindu nyonso. Oh, beto zola kubaka mosi dyaka, mpe beto kele kaka na kutala baminuti kumi, to kumi na tanu samu na kusala yawu.



Beno me lemba mingi? Beno zola kwenda na ntwala? [Dibuundu me tuba, “Amen.”—Mu.] Mbote mingi, beto baka nzila ya 4:

*Mpe na ziunga ya kiti ya kimfumu vwandaka na bakiti yiya mpe makumi zole: mpe na zulu ya bakiti mu monaka bakuluntu yiya mpe makumi zole ya kuvwanda, na kulwata bilele ya mpembe; mpe bawu vwandaka na zulu ya yintu ya bawu bayimpu ya wolo.*

200 Beto lendaka baka nzila nyonso ya nzila yina ve. Mbote, beto banda. Nzila ya 4, beno tala ntangu yayi, ntangu Jean monaka Yandi, ntinta ya emeraude na ziunga ya Yandi, beto me baka bantinta nyonso, mikyama, mpe nyonso yankaka, mpe yina nyonso ya vwandaka. Ntangu yayi, na nzila ya 4, kima ya ntete yandi ke zonzila awa, na nzi- . . . ya 4.

*Mpe na ziunga ya kiti ya kimfumu. . .*

201 Beno tala mbote! Ya kele kizizi mosi ya kitoko mingi awa, beno kondwa yawu ve, “Kiti ya kimfumu.”

202 Beno zaba, beto vutuka na Moïse. Moïse. . . Beto ke na ntangu ya kutimuna yawu ve, na yawu beno baka kaka yina mu ke tuba. Moïse, na ntangu ba pesaka yandi vision mosi kuna na zulu ya Mongo ya Sinai. . .

203 Mu zola beno kutala ti yayi vwandaka dyaka ve Kiti ya kimfumu ya lemvo. Kuna, menga sukaka, mpe munkayulu kuvutukaka dyaka mpe ba ndimaka bawu, mpe ba katulaka menga na kiti ya mawa. Mpe ya vwandaka ntangu yayi kiti ya lufundusu samu ti bidumu mpe banzasi vwandaka basika na yawu. Ya kele kieleka?

204 Beno bambuka moyo, ya vwandaka mutindu Mongo ya Sinai. Ntangu Moïse kwendaka na Mongo ya Sinai, yinki kusalamaka? Bidumu, banzasi. Mpe ata ti ngombe ya kento to mwana ya ngombe to mwana-dimeme, to muntu nyonso, zolaka simba mongo, yandi zolaka kufwa. Biblia ke tuba, “Kuningana vwandaka mingi ti Moïse kutalaka boma ya yawu.” Mpe Mo- . . . Yandi tubaka, “Katula basapatu ya nge awa, nge kele na zulu ya ntoto ya Santu.” Josué munwani mvita ya nene, yina zolaka lutisa bana na lweka yankaka mpe kukabula bawu difwa, zolaka kaka kumata ndambu ya mongo.

205 Awa me telama Moïse kuna na bantinta ya lusyemo ya Nzambi mpe banzasi mpe emeraude na ziunga ya yandi, na kutalaka mbote balutumu yango kusonama. Ya kutelama na Ntwala ya Nzambi, Ndinga yango kuzonzaka, “Moïse, wapi kisika nge kele? Katula basapatu ya nge, nge kele na zulu ya ntoto ya Santu.”

206 Kiti ya lufundusu, yawu vwandaka ntangu yayi, kima ve zolaka telama kuna kasi bantu yina ba kuulaka. Musumuki zolaka belama na yawu ata fyoti ve (ya manisaka), kiti ya lufundusu. Mbote mingi.

207 Ntangu yayi, Moïse salaka bima na zulu ya ntoto, yandi salaka tabernacle, mutindu bima yina yandi monaka na Mazulu. Beto zaba yawu, mutindu yina ve? Beto ke tala Paul kusala kima mutindu mosi. Ya fwana vwanda . . . Hébreux 9:23, ti Moïse salaka bima mutindu yandi salaka. Mpe Paul na vision ya yandi ntangu yandi kwendaka kuna na Mazulu (ntangu yandi longaka Buku yina ya nene ya Hébreux), yandi zolaka mona na vision ya yandi kima mosi yina Moïse monaka, samu ti yandi tubaka ti (yandi longaka Buku ya kulutilla mbote yayi ya Hébreux), mutindu ti Buklisto vwandaka luswaswanu ya Ngwisani ya Ntama. Yandi vwandaka mulongisi ya nene, Mo- . . . Paul vwandaka yawu. Ntangu yayi, yina vwandaka Kiti ya Yandi ya kimfumu *kuna*. Na manima . . .

208 Beto fwana kaka . . . Kikuma samu na yawu kele ve, mu lenda ve . . . Mu zolaka luta yayi, kasi mu lenda sala yawu ve. Wapi kisika kele tablo? Beno vwandaka me vutula yawu? Ya kele na manima, Doc? Mbote, mu banza ti mu lendaka sala beno kumona yawu kubanda awa. Mu—mu . . . Ntangu yayi, beno baka bilapi ya beno mpe papié, samu mu zola tuba kima mosi awa. Mu—mu vwandaka ya kuvwanda na suka yayi na yina kima mosi kwizilaka na munu. Ntangu yayi mu ke tuba na beno yina mu salaka, kana beno tala, mu fikulaka yawu na manima awa. Beno me ona? Mu fikulaka kaka yawu mutindu Mpeve pesaka munu yawu, beno me mona, mu fikulaka yawu awa na mutindu yawu vwandaka. Kasi mu—mu zola kutuba kima mosi kaka awa.

209 Ntangu yayi, Nzambi, ntangu Yandi kele na kiti ya kimfumu, Yandi kele kuna Zuzi. Ya kele kieleka? Na wapi ntangu zuzi ke fundisaka? Ntangu yandi ke kwizaka na kiti ya yandi ya kufundisa, kiti ya kimfumu. Ntangu yayi, mu ke zola beno kutala mbote mutindu ba salaka Ngwisani ya Ntama, mutindu vwandaka ya kusala mantwala yina vwandaka ya kubelama na Kiti ya Yandi ya kimfumuu, mpe mutindu Jean kumonaka awa. Beto ke tubila na yawu ve na suka yayi, nyonso ya yawu. Kasi mutindu Jean kumonaka mantwala yango mosi yina samu na kubelama na Yandi, mpe wapi mutindu ya kubelama na mantwala ya Yandi. Ntangu yayi, oh, mu zola yawu.

210 Ntangu yayi, na Ngwisani ya Ntama, ya vwandaka yina ba vwanda bokilaka “dibuundu,” kisika bantu vwanda vukanaka. Kima ya ntete, ntete bawu kota, dibuundu, samu na kukota kuna, bawu zolaka kwiza na yisi ya menga yina basikaka, na ngaanda ya mantwala. Na ntete bawu vwandaka kwiza na bamaza ya nkabwani, kisika ba vwanda kufwa ngombe ya kento ya mbwaki mpe vwandaka sala maza ya nkabwani. Yina kele musumuki yina vwandaka kwisa mpe vwandaka kuwa Ndinga.

211 Ya kele mutindu yina rabbi yayi ya nene ya ba-Juif kunatamaka na Mfumu, yandi kuwaka munu kulonga yawu kuna na . . . na Tulsa. Ya vwandaka, na Tulsa. Beto vwandaka kuna na Tulsa, na Oklahoma. Mpe yandi kwizaka kuna,

kaka samu na kutala. Mpe yandi kwendaka na manima ya lukutakanu, yandi tubaka, “Mu me zaba!” Yandi tubaka... Yandi kele mosi ya balabi sambwadi ya kulutila nene na yinza. Mpe yandi kwizaka kuna, kutubaka, “Mu ke zola kumona yina bantu ya Mumbungu yayi ya Miklisto... Bawu ke bokilaka bawu, ‘ba-Pentecotiste.’ Mu ke zola kukwenda kuna, kubaka kisika, mpe kuwa.”

<sup>212</sup> Mpe ntangu Mfumu twadisaka munu na kuzonzila na ngombe ya kento ya mbwaki yina ya munkayulu, na manima ya lukutakanu yandi kutanaka na bampangi yankaka kuna, yandi tubaka, “Mu zola kukutana na muntu yina. Mu zaba ti yandi longokaka ve kasi... ” Yandi tubaka, “Mu kele labi ya ba-Juif yina zaba mitindu nyonso ya kutala ya yawu mpe bima ya mutindu yina,” yandi tubaka, “Mu me monaka ntete yawu ve na luzingu ya munu nyonso.” Yandi tubaka, “Mu me monaka ntete yawu ve.”

<sup>213</sup> Mpe ntangu yayi yandi kele rabbi ya Pentecote, ya kifuluka na Mpeve-Santu, yina ke na kukwendaka bisika nyonso, ke longi Nsangu ya mbote. Yandi mosi ke kukibokilaka “Rabbi ya Pentecote.” Kilumbu yankaka yina ntangu beto kukutanaka kintwadi kuna na yinzo ya Mpangi Jack, yandi kwendaka na Hotel Youree na Washington, mpe mama mosi zabaka yandi, yandi tubaka, “Rabbi,” yandi tubaka, “beto kele na kivinga ya mbote samu na nge, kasi” yandi tubaka, “beto kele ve na televizyo kuna.”

<sup>214</sup> Yandi tubaka, “Bima yina kele ‘vizyo ya difelo,’ beno basisa yawu! Mu zola yawu ve kuna, na mutindu nyonso; kana ya vwandaka kuna, mu zolaka sala beno kulosa yawu.”

Yandi tubaka, “Rabbi!”

Yandi tubaka, “Mu kele Rabbi ya Pentecote.” Alleluia!

<sup>215</sup> Yandi tubaka, “Ntangu yayi, ntangu nge kwenda na Israël, Mpangi Branham, mu ke zola kukwenda na nge.” Yandi tubaka, “Beto lenda nata yawu na bantu ya beto.”

<sup>216</sup> Mu tubaka, “Ntangu yayi ve, Rabbi, ntangu yayi ve. Na ntangu yayi ve, ngunga kele ntete ve, vingila fyoti dyaka.”

<sup>217</sup> Ntangu yayi, beno tala bisika ya santu yayi. Ntangu yayi, ntangu beno ke kota na mantwala, ya ntete vwandaka mantwala, mantwala ya ngaanda. Yina vwandaka landa vwandaka autel, kisika minkayulu vwandaka pesama, na autel ya kisengo. Na manima ya ngaanda ya autel ya kisengo, ya vwandaka na vwale ya kulelama awa yina vwandaka kotisa na Santu ya basantu; kuna vwandaka na kiti ya kyadi, na kati kuna vwandaka na Bakeluba. Ya kele yina mu zola kubaka samu na leso ya beto yina ke landa, Bakeluba yina vwandaka fuka kiti ya kyadi. Oh, la la! Mu... Beto lendaka vwanda kaka ngonda ya muvimba na zulu ya yawu, beno me mona, na zulu ya Bakeluba yango.

218 Ntangu yayi, ntangu yayi beno tala na yina bawu vwandaka kota. Dibuundu zolaka kuma *kuna*; banganga-Nzambi zolaka telama *awa*; kasi kaka nganga-Nzambi ya ntete zolaka kota *kuna*, mbala mosi na mvula, na kubakaka menga na yandi.

219 Mpe yandi zolaka vwanda ya kulwata na mutindu mosi, na lele mosi; yandi zolaka vwanda na ngunga mpe grenade, mosi na lweka ya mpangi. Mpe ntangu yandi vwandaka tambula, yandi zolaka tambula mutindu mosi. Na yina yandi vwandaka tambula, yandi vwandaka bula, “Santu, santu, santu, kele Mfumu. Santu, santu, santu, kele Mfumu,” bangunga yina mpe ba-grenade vwandaka wakana kintwadi, “Santu, santu, santu!” Samu na yinki? Yandi vwandaka belama na Nzambi, na menga ya ngwisani na diboko ya yandi, na kukwendaka na ntwala ya Yandi, na kunataka menga.

220 Ya kupakulama (Oh, la la!) na mananasi mosi. Bilele ya yandi zolaka vwanda ya kusala na maboko ya kifuluka na Mpeve-Santu, maboko ya kupakulama vwandaka sala bilele ya yandi. Rose ya Saron, mafuta ya kupakulama, yina ba me mwangisa na zulu ya yintu ya yandi, ya vwandaka kulumuka nyonso na mandefo ya yandi mpe kuna na zulu ya kisika ya yandi na mananasi ya ntinu; grenade mpe ngunga; na kunataka menga ya mwana-dimeme yina zabaka dyambu ve; mpe yandi zolaka belama ve na vwale yina na ngaanda, kaka kuna yandi zola kufwa, kisika yandi vwandaka ya kutelama. Na yawu yandi zolaka kwenda, na kutambulaka na mutindu mosi, “Santu, santu, santu, kele Mfumu. Santu, santu, santu,” (na kubelamaka na Nzambi) “kele Mfumu. Santu, santu, santu!”

221 Mpe yandi vwandaka kwenda kuna mpe vwandaka pesa menga na kiti ya kyadi, mbala mosi na mvula. Mpe na yina yandi vwandaka na kati kuna, yandi vwandaka na bweso ya kumona Nkembo ya Shekinah; ntangu Dikunzi ya Tiya, bumbwaki ya Nsemo yina vwandaka kulumuka, yina basisaka bana ya Israël. Yandi vwandaka fulusa tempelo na mulinga na mutindu ti muntu ve zolaka mona Yawu. Nkembo ya Mfumu vwanda kubwa ti mulinga vwandaka bisika nyonso. Mpe Yandi vwandaka kota na Yandi mosi, vwandaka kwenda na manima ya vwale mpe vwandaka vwanda na kiti ya kyadi na kisika ya kulutila Santu na ya kulutila santu. “Kisika ya kulutila Santu,” ya kele ya kubokila, Santu ya kulutila santu. Mpe yandi vwandaka ya kulwata na mutindu mosi, vwandaka tambula na mutindu mosi, vwandaka ya kupakulama na mutindu mosi. Yandi zolaka vwanda muntu ya mutindu yankaka samu na kukota kuna. Mutindu dibuundu zola vwanda na kimpala na yandi!

222 Kasi ntangu Yesu kufwaka, vwale ya tempelo kupasukaka. Kaka nganga-Nzambi ya ntete ve, kasi “muntu nyonso yina ke zola” lenda kuzwa kupakulama mosi yango ya Nkembo ya Shekinah mpe vwandaka tambula luzingu ya santu, “Santu, santu, santu, kele Mfumu,” mpe vwandaka belama na Ntwala

ya Nzambi, na Menga ya Yesu Klisto na ntwala ya yandi. Yandi ke baka yawu na kutubaka: “Mfumumu Yesu, awa kele ya kulala muntu ya kubela, yandi kele mpangi ya munu ya bakala. Yandi kele na mbeto ya lufwa ntangu kaka yayi, ke kufwa. Mu ke belama na Nge, ‘Santu, santu, santu, kele Mfumumu.’”

“Samu na yinki?”

“Mutindu nganga-Nzambi ya ntete.”

“Samu na yinki?”

“Samu na mambote ya mpangi ya munu. ‘Santu, santu, santu, kele Mfumumu.’”

<sup>223</sup> Beno tala! Kutambula ya beno ya konso kilumbu, kuzonza ya beno ya konso kilumbu, nkadulu ya beno ya konso kilumbu, ntima ya beno, moyo ya beno, mpe nyonso, “Santu, santu, santu, kele Mfumumu.” Ata misisa ya ndudi, ata kima yankaka ve, “Santu, santu, santu, kele Mfumumu. Santu, santu, santu, kele Mfumumu,” na yina beto ke banda na kubelama na mambote ya mpangi ya beto. Muntu nyonso yina ke kwiza, ya kupakulama, Menga na ntwala ya yandi, Menga na kukwendaka na ntwala ya yandi, ke bula “Santu, santu, santu, kele Mfumumu.”

<sup>224</sup> Ntangu yayi, yina vwandaka mantwala ya ngaanda, ya kisika ya santu. Mpe ya kulutula Santu na ya kulutula santu, yina vwandaka sanctuaire ya Nzambi na zulu ya ntoto. Beno tala mbote, ya vwandaka fwanikisa yina mosi ya Mazulu. Ntangu yayi, beto ke vutuka mbala mosi dyaka na Masonuku mosi yayi. Oh, na nyonso na yina beto ke lutula na Apocalypse, beto lendaka vutuka mbala mosi dyaka na yayi. Beno me mona?

<sup>225</sup> Ntangu yayi yandi... Jean, wapi kisika kele Jean ya kutelama? Na mantwala. Beto tanga kaka mwa ntama awa samu beno kuzwa kizizi:

*Mpe na ngaanda ya kiti ya kimfumumu basika banzasi... bidumu... bandinga: mpe kuna vwandaka na minda sambwadi ya tiya (Beno vingila tii beto ke kuma kuna!) yina vwandaka yoka na ntwala ya kiti ya kimfumumu, ya kele Bampeve sambwadi ya Nzambi.*

<sup>226</sup> Na kulakisaka Nsemo ya Nzambi na kati ya Dibuundu, mbala mosi kaka katuka Kiti ya kimfumumu ya Nzambi, na nzila ya seminere ve, ve na nzila ya bishop mosi, kasi na Kiti ya kimfumumu ya Nzambi, na nzila ya luzayikisu ya ngolo ya mvumbukulu ya Yandi, na kusalaka Yandi mutindu mosi mazono mpe kukonda nsuka; bambwetete sambwadi yango ya kutelama kuna vwandaka lakisa Nsemo yina, Nsemo ya Shekinah, na Nkembo ya Shekinah na ya kulutula Santu na santu. Minda sambwadi ya tiya, vwandaka na zulu ya kisikamanu ya minda yayi, na kumonikisaka Nsemo ya Yandi, bantinta ya Yandi, ya ngolo ya Yandi ya mvumbukulu ya Yandi, mbala mosi na kati ya Dibuundu. Amen! Hmm!

*Mpe na ntwala ya kiti ya kimfumu. . .vwandaka na mubu ya galasi mutindu na kitala-tala: mpe na kati-kati ya kiti ya kimfumu, mpe na ziunga ya kiti ya kimfumu, vwandaka na bibulu yiya ya kifuluka na meso na ntwala mpe na manima.*

227 Mpe yandi ke kwenda na ntwala mpe yandi ke banda na kupesa yayi. . . bibulu yayi, kima mosi yina Ezéchiel kumonaka; mikengi yina. . . mosi mutindu muntu, mosi mutindu nkosi, mpe mosi mutindu ngononi. Yinki ya vwandaka? Ntangu yayi, beno tala mbote, ntangu beto ke baka bawu mpe ke lakisa Nkosi yina ya Dikanda ya Juda mpe bawu nyonso yina yankaka mpe makanda ya bawu, yina vwandaka na bibaka yiya, mpe bawu vwandaka keba kiti ya kyadi yayi. Oh, wapi mutindu ya kizizi! Oh, mu kaka. . . Ya kele na bilumbu ya nene na ntwala.

228 Na yinabeto ke mona yawu, ntangu yayi, yina vwandaka Kiti ya kimfumu ya Nzambi na Mazulu, Moïse salaka kifwani ya Yawu na zulu ya ntoto, ya vwandaka Kiti ya kimfumu ya Nzambi samu ti kiti ya Yandi ya lufundusu vwandaka monikisa awa na zulu ya ntoto na kati ya Santu ya santu. Nzambi. . . Israel nyonso kwizaka na kisika mosi yina samu na kuzwa kyadi, samu ti Nzambi ke kutanaka kaka na yisi ya menga yina basikaka.

229 Ntangu yayi, beno kuwa mbote. Na manima Nkembo ya Shekinah kukatukaka na kiti ya kyadi yina kilumbu mosi, mpe Yawu bakaka kisika na Tabernacle yankaka (Amen!), Yandi yayi, “Tata ke fundisaka muntu ve kasi Yandi pesaka lufundusu nyonso na Mwana.” Kiti ya Lufundusu ya Nzambi. Fiu! “Kana beno zonzila na kutelemina Munu, ya ke vwanda ya kulemvuka na beno,” ke na kuzonzila na yankaka—Mosi yankaka yina ke na kwiza, Kiti yankaka ya Kyadi. “Zonza. . . kana beno zonza na kuteleminaka Mwana ya muntu, Mu ke lemvočila beno; kasi kilumbu mosi Mpeve-Santu ke kwiza zinga na kati ya bantima ya bantu, ba ke lemvočila ata ndinga mosi ya kutelemina Yawu ve.”

230 Ya ke na kulandila na kukuma ngolo mpe kukuma dyaka ngolo ntangu nyonso, lufundusu yango, samu ti Nzambi ntangu nyonso mvibudulu ya Yandi ke na kulemba, na kumekaka na kuzwa misumuki na kwiza na Yandi samu na kuwisana. Ya ntete, Yandi vwandaka na mazulu mpe vwandaka sema na nzila ya bambwetete. Ya zole, Yandi vwandaka na zulu ya ntoto vwandaka sema na nzila ya Nkembo ya Shekinah. Na yina me landa, Yandi kwizaka mpe kumaka nsuni mpe zingaka na kati-kati ya beto, na kulwataka dyaka mvibudulu ya Yandi. Na manima Yandi kuulaka muntu na nzila ya Menga ya Yandi, me kota na kati ya Dibuundu ya Yandi na mutindu ya Mpeve-Santu, mpe muntu ke zonza na kuteleminaka Yawu yimeni, yimeni samu na yandi.

231 Ntangu yayi beno lenda mona kisika kuningana ke kwiza. Wapi ntangu, ba ke bakula ve. Bantu lenda bakula ve yina Yawu zola kutuba.

232 Ntangu yayi, Kiti ya kimfumu ya ntete vwandaka na Mazulu, kiti ya lufundusu. Kiti ya kimfumu ya zole vwandaka na Klisto. Kiti ya kimfumu ya tatu kele na kati ya muntu.

233 Ntangu yayi, bika mu baka mwa kima yayi yina mu me fikula awa. Beto ke sala . . . Mu ke zola kana mu vwandaka na tablo, ti mu zolaka sala yawu mu banza kieleka mingi samu na beno. Beto ke baka mpe ke fikula mantwala, beto ke sala kaka yawu na selekele, to mutindu yayi, mosi to yankaka. Ntangu yayi beto ke baka . . . mu banza, mutindu *yayi* mu banza ke vwanda mbote, beto ke baka mpe ke sala mantwala.

234 Ntangu yayi, yinki kele muntu? Yandi kele muntu na bima tatu; nzutu, moyo, mpe mpeve. Bantu yikwa zaba yawu? Beno tala mbote kubelama ya Nzambi. Yinki kele ntima ya yandi? Beno ke bambuka moyo na nsangu ya munu, *Nzambi me Sola Ntima ya Muntu Mutindu Yongi ya Kukeba*? Dyabulu kusolaka yintu ya yandi mutindu yongi ya yandi ya kukuba; beno me mona, yandi ke salaka yandi kumona bima, na kutalaka na meso ya yandi. Kasi na kati ya yawu . . . Nzambi ke salaka yandi kukwikila bima yina yandi lendaka mona ve. Yandi salaka? Beno me mona, Nzambi kele na ntima ya yandi, Kiti ya kimfumu ya Nzambi kele na kati ya ntima ya muntu. Beno me bakula yawu? Muntu! Nzambi salaka Kiti ya Yandi ya kimfumu na kati ya ntima ya muntu.

235 Ntangu yayi, beno tala mbote. Yinki kele ndambu ya ntete ya muntu? Ndambu ya ntete ya muntu kele *nzutu*. Ndambu yankaka kele *moyo* ya yandi, ya kele nkadulu ya mpeve ya yandi yina ke salaka yandi yina yandi kele. Yandi ke belama ntangu yayi. Ntangu yayi, ndambu ya tatu ya muntu kele *mpeve* ya yandi, mpe mpeve ya yandi kele kati-kati ya ntima ya yandi, mpe na kati-kati ya ntima ya kele kisika Nzambi ke kwizaka sala Kiti ya kimfumu.

236 Beno ke bambuka moyo ntama mingi ve, pene ya bamvula yiya me luta na Chicago, yina mikanda kusamunaka, Ntangu mukwikidi ya ntama yina . . . muntu ya kukondwa lukwikilu yina, mu zolaka tuba, vwanda tuba ti Nzambi salaka foti na nzila ya Salomon ntangu Yandi tubaka, “Mutindu muntu ke banzaka na ntima ya yandi.” Yandi tubaka, “Ya kele ve na balenda ya kubanza na kati ya ntima. Wapi mutindu yandi lendaka banza na ntima ya yandi? Yandi fwana . . . Yandi zolaka tuba yintu ya yandi.”

237 Kana Nzambi zolaka tuba yintu ya yandi, Yandi zolaka tuba, “yintu ya yandi.”

238 Mutindu Moïse, yinki kana Moïse . . . Nzambi zolaka tuba, “Moïse, katula basapatu ya nge, nge kele na ntoto ya Santu”;

yandi tubaka, “Mbote, samu na yinki mu ke katula yimpu ya munu ve, yina kele kaka mbote”? Yandi tubaka, “basapatu.” Yandi tubaka ve, “yimpu,” yandi tubaka, “basapatu.”

<sup>239</sup> Mpe ntangu Yandi tubaka, “Beno balula ntima, mpe beno botama na Nkumbu ya Yesu Klisto,” Yandi zolaka ve kutuba “Tata, Mwana, mpe Mpeve-Santu.” Yandi zolaka kaka kutuba yina Yandi tubaka.

<sup>240</sup> Ntangu Yandi tubaka, “Beno *fwana* butama dyaka,” Yandi tubaka ve, “Beno *lendaka* vwanda.”

<sup>241</sup> Yandi tubaka, “Bidimbu yayi *ke* landa bayina ke kwikila,” Yandi tubaka ata mbala mosi ve, “*Ya lendaka* landa bawu.”

<sup>242</sup> Yandi tubaka yina Yandi zolaka tuba! Mpe Yandi kele Nzambi mpe Yandi lenda vutula Yawu ve. Yandi zabaka yina kele ya kulunga na yawu Yandi salaka Yawu mutindu yina, mpe ya kele mutindu Yandi—Yandi zolaka Yawu kuvwanda. Mpe beno fwana mata na Yawu. Yandi ve ke kwiza na beno na yisi na dibanza ya beno, beno fwana mata na Dibanza ya Yandi. Beno tala luswaswanu.

<sup>243</sup> Ntangu yayi, ntangu yayi, samu na systeme yayi ya nzutu, moyo. . . Ntangu yayi, kana beno baka mpopva *moyo* mpe kutala yawu, ya ke tubila beno na kati—na kati ya buku ya bampova ya Biblia to Webster, to mosi na mosi ya bawu, ti ya kele “nkadulu ya mpeve.”

<sup>244</sup> Ntangu yayi, awa kele na muntu, beto tuba, *awa kele* Jean Dupont. Mbote mingi, Jean Dupont. Mpe *awa kele* Sam Dupont. Mbote mingi. Ntangu yayi, Jean Dupont kele muntu, nzutu, yandi kele mpangi ya bakala ya Sam Dupont. Ntangu yayi, Jean kele mpeve, moyo, nzutu; mpe Sam Dupont kele kima mutindu mosi (nzutu, moyo, mpeve) mutindu yandi kele, nzutu, moyo, mpeve. Ntangu yayi, bakala *yayi* kele muntu ya yimbi, ya yimbi, ke salaka mayuya, ke yibaka, ke vunaka, ke salaka kindumba, nyonso ya yimbi yina yandi lendaka sala; kasi muntu *yayi* kele ya kufulukuka na zola, ngemba, kyese. Bawu zole kele na moyo, nzutu, mpe mpeve. Mbote, yinki kele luswaswanu? Muntu *yayi* lendaka vutuka mpe kutuba, “Mu ke bambuka moyo na mama ya munu, Mu ke bambuka moyo na bima yina beto vwanda salaka ntangu beto vwandaka bana ya babakala”; bawu zole lendaka sala yawu. Bawu zole kele na bampeve, bawu zole kele na moyo, bawu zole kele na nzutu.

<sup>245</sup> Kasi nkadulu ya mpeve ya muntu *yayi* kele yimbi; nkadulu ya mpeve ya muntu *yayi* kele mbote. Beno me mona? Na yawu nkadulu ya mpeve kele moyo ya muntu. Beno me mona? Na yawu, ntangu yayi, Nzambi ke na kumeka na kukota na yinki? Mpeve mpe ntima ya muntu. Kisika mpeve kele na kati ya ntima.

<sup>246</sup> Beno zaba, mpe science ke tuba (mutindu mu manisaka yawu ve), ti muntu lendaka banza ve na ntima ya yandi. Mpe science me banda na kutala ti ya kele na mwa kisika na kati ya ntima



ya muntu (na kati ya ntima ya nyama ve, kasi na kati ya ntima ya muntu), ya kele mpe ve na cellule ya menga, to kima mosi ve. Bawu tubaka, “Ya fwana vwanda kisika moyo ke vwandaka, to mpeve.” Beno bika kaka—beno bika kaka bawu swi, bawu ke baka bima ya bawu mosi ya buzoba mpe ke monisa Nzambi. Ya kele kieleka. Nzambi ke salaka kaka ti muntu ya bulawu kupesa kimbangi ya Yandi.

<sup>247</sup> Ntangu yayi, yawu yayi, na bayintu ya nene ya zulunale. Mwana ya fyoti ya kento ya Mpangi Boze tubaka, “Mpangi Branham, nge zaba yina nge vwandaka tubila kilumbu yankaka yina?” Yandi tubaka, “Tala, tala, science me kuzwa yawu yimieni.”

<sup>248</sup> Yandi tubaka, “Mbote, nkembo na Nzambi! Mu zola yawu, mpangi ya kento, mu zola—mu zola yawu.”

<sup>249</sup> Moyo ya muntu kele nkadulu ya mpeve, mpe mpeve ke zingaka na kati ya ntima ya muntu.

<sup>250</sup> Ntangu yayi, ntangu yayi, yinki kele mantwala ya ngaanda? Yina kele nsuni. Beno me mona? Ya kele kima ya ntete beno ke kwizilaka, nsuni. Beno fwana kufwa ya ntete yawu. Beno fwana, kuluta na manima ya nsuni. “Mu—mu ke na kuwa ve mutindu ya ya kutelama mpe kukwenda na dibuundu, banzila kele ya kulengula mingi. Mu—mu . . . Mwini ke ngolo mingi. Oh, dibuundu, mu zaba ve.” Yina ke nsuni. Mbote mingi. Ntangu yayi, beno fwana kufwa mpe kuluta yawu, Nzambi fwana kulutula na yawu.

<sup>251</sup> Mbala yankaka Yandi ke kwiza, Yandi fwana kota na moyo, yina kele nkadulu. “Oh, yinki ba-Jones ke tuba samu na munu? Oh, la la! Beno zaba, dibuundu ya munu ke losa munu na nganda kana mu—kana mu sala kima mosi mutindu yina. Beno me mona?” Kasi beno fwana luta na nzila ya yawu.

<sup>252</sup> Mpe ntangu beno ke lutula na yawu, kuna Yandi ke kota na ntima mpe ya kele kisika Yandi ke baka Kiti ya kimfumu. Ya kele Mpeve-Santu na kati ya beno. Yesu tubaka, “Ya ke vwanda mbote mingi ti ba kanga ditadi ya nene na laka ya beno mpe ba losa beno na kati ya mubu, ti beno nyongisa mosi ya bana yayi yina ke kwikilaka na Munu.” Kusala bawu ata mpasi mosi ve; mpe kunyongisa bawu ve, to kukwamisa kaka bawu na kima mosi. Ya ke vwanda ya kulutula mbote ti beno kudyama beno mosi, to ata mbala mosi ve zolaka butama na ntoto, to ti beno kunyongisa mosi. Kieleka Yandi zolaka kutuba yawu? Yandi zolaka vuna? Bantumwa tubaka yawu? Ve, ve. Yesu tubaka Yawu! Yesu tubaka, “Mpe kana beno nyongisa mosi ya bawu, bana yayi yina ke kwikilaka na Munu.”

“Bidimbu yayi ke landa bayina ke kwikila!”

<sup>253</sup> Muntu mosi, ya nene kutubaka, “Oh, mu ke kwikilaka na Yandi! Alleluia!”

254 “Nge me zonzaka ntete na bandinga, me tendulaka bandinga, me basisaka bampeve ya yimbi, me kuzwaka bavi-  
sion, mpe nyonso yankaka yina, mutindu Yandi silaka?”

“Ve, bilumbu yina lutaka.” Yandi kele mukwikidi ve, yandi kele mukwikidi ya kati-kati.

255 Yesu tubaka, bampova ya nsuka Yandi tubaka, “Bidimbu yayi ke landa bayina ke kwikila, na yinza ya muvimba mpe na konso kivangu.” Ya kele kieleka. “Bawu ke landa mukwikidi tii Mu ke vutuka.” Ya kele Bandinga ya nsuka yina Yandi tubaka. Bantu yikwa zaba yawu? Biblia, Marc 16.

Ntangu yayi, beno me mona, yandi kele mukwikidi ya kati-kati.

256 Kasi ntangu beno ke mona mukwikidi yina ke kwikila ya kieleka, na bidimbu ke landa, mpe beno ke mona kulemuvuka na luzingu ya bawu, kilanda-landa ve, zaba ti yandi kele Muklisto, ya kieleka, ya kieleka, beno vwanda kaka swi. Kima beno fwana sala, kele kuvukana kaka na yandi, kubanda kutambula na yandi, samu ti beno ke na kukendaka na nzila ya Ntinu.

257 Ntangu yayi, yinki salamaka? Beno tala mbote yayi. Mantwala ya ngaanda: vwandaka nsungi ya Luther, kana beto banda na kati ya Nzutu ya Dibuundu ya Bantu ya makanda.

258 Beno bambuka moyo, ba vwandaka ba-Juif tii pene ya ntangu ya—ya beto na mvula 606 ntangu ya kotaka na Thyatire, na kutala mingi ya mindimi nyonso vwandaka ba-Juif. Kasi na manima ya ba-Juif, ya kubwaka na zulu awa na bawu nyonso zole ba-Juif mpe Bantu ya makanda (kasi ya kulutila na ba-Juif). Kasi kieleka ntangu ya kotaka na nsungi ya Bantu ya makanda, me kwiza lweka yayi, beno me mona, me kwiza Martin Luther, John Wesley, mpe nyonso yankaka yina. Beno me mona?

259 Ntangu yayi, beno tala mbote batatu yayi ya nsuka na manima ya Nsungi yina ya Mpimpa, kukwiza tii Nsungi ya Kati-kati mpe lutaka. Ntangu ya kwizaka, beno tala mbote mantwala ya ngaanda yayi. Beno me mona: nsuni, moyo, mpeve. Beno me mona? Mantwala yango ya ngaanda, nsuni. Kisika ya santu: ba-Nazaréen, ba-Pèlerin ya Sainteté, ba-Méthodiste ya Kimpwanza. Beno me mona? Mpe na manima ya kulutila Santu ya santu: kuvutuka na Pentecote, na kisika ya bandaka na mbandukulu, beno me mona, kuvutuka na mbandukulu.

260 Ntangu yayi, kana beno ke na kufikulaka yawu, mu zola kutanguna. Ntangu yayi, ya kele na myelo tanu yina ke pesaka muswa na nsuni, yina ke yalaka na nsuni. Beno zaba yawu. Ya kele kuna ve? Ya kele banzila tanu. Banzila yikwa ke na kuyalaka nzutu? Tanu: kumona, luwu, kusimba, kuwa nsunga, kuwa. Ya kele kieleka? Yina kele nsuni, mantwala ya ngaanda, ya kele bima na yina beno lendaka telama ve samu ti ya kele nsuni.

261 Na manima mantwala ya kati, beto kele na mantwala ya kati, ya kele autel yina ke landa. Mpe autel yina ke landa ke kwizaka, mpe ya ke kwizaka na—na konsiansi, bambazulu, mabanza, bansatu, mpe luzolo. Ya kele banzila tanu yina ke yalaka na mantwala ya kati. Ya kele moyo. Banzila ya luzolo, ya kele moyo, zola, mpe nyonso yankaka yina. Mpe na manima yina ke landa na nzila yayi awa, ya ke vwanda mpe mabanza, mpe konsiansi, mpe kyadi, mpe nyonso yankaka yina, mpe—mpe—mpe mbanzulu. Beno ke vwanda mpe ke banza bima, yinki beno ke na kusalaka? Beno ke salaka yawu ve na nsuni ya beno, banzila ya beno ke banzaka ve. Ya kele mantwala ya kati na kati ya beno.

262 Ya kele na myelo tatu. Yinki beto ke na kusalaka? Beto ke na kubakaka na ndambu-ndambu ntangu yayi, beno kondwa Yawu ve. Beto me katuka nsuni, banzila tanu; na yina me landa, moyo, mantwala ya kati; kasi ntangu yayi beto ke kota na ntima. Beno me mona?

263 Ntangu yayi, ya kele kisika beno ba-Pèlerin ya sainteté mpe ba-Méthodiste bakaka kisika na ngaanda na autel *kuna*. Beno me mona, beno kele na mantwala. Beno ba-Luthérien mpe nyonso yankaka dyaka na nsuni, kuna dyaka na banzila tanu, yina disu lenda mona mpe kuswasikisa. Beno me mona?

264 Beno tala kukwiza ba-Pèlerin ya sainteté bayina vwandaka kaka ba-Méthodiste ya Kimpwanza, me kwiza tii na mantwala vwandaka landa mpe me kwikila na busantu, samu ti ba vwandaka bokila yawu kisika ba vwandaka tula munkayulu.

265 Kasi mbala mosi na mvula nganga-Nzambi ya ntete vwandaka kota na ya kulutula Santu ya santu yina vwandaka ya kukangama. Ya vwandaka na nsungi ya ba-Lutherien; na manima nsungi ya ba-Méthodiste; na manima nsungi *yayi*, minda ya Dibuundu ke na kwiza, ya kele mutindu systeme ya muntu.

266 Na yina wapi mutindu—wapi mutindu beto ke kotaka na *yayi*? Ntangu yayi, beno bambuka moyo ti, ya vwandaka na vwale mosi, vwale yina vwandaka ya kulelika na kati-kati ya kisika ya santu mpe na ya kulutula Santu. Ya kele na kati ya kisika ya kulutula Santu ya santu ti Klisto ke kwizaka vwanda na zulu ya ntima ya beno, Klisto ke kuzwa Kiti ya kimfumu. Yandi ke kwizaka na nzila ya mvedolo (Ya kele kieleka?); kusantisama; “Mpe kuna na nzila ya mosi. . .” (maza . . . na nzila ya dibuundu mosi. . . na nzila ya credo mosi. . . Ve!) “na Mpeve mosi,” na kati awa beto nyonso kele ya kubotama na Nzutu mosi yina kele Nzutu ya Klisto. Na nzila ya yinki? Mpeve-Santu.

267 Nani ke kota? Ba-Methodiste, ba-Baptiste, ba-Presbyterien, ba-Pentecotiste, muntu nyonso yina ke zola. Vwale yina, beno zaba yinki kele vwale yina ke fikaka ntima ya beno na Yawu? Beno me kubama? Vwale yango kele “luzolo ya beno mosi.” Beno me kuzwa kizizi ntangu yayi? Banzila yina kele *kuna* na

nganda, banzila ya nzutu mpe banzila ya moyo, mpe vwale na kati-kati ya yawu mpe kisika ya santu, ya kulutula Santu ya santu. Mpe mutindu kaka beno lendaka kota ya kele kuzwa luzolo ya beno mosi! “Samu ti muntu nyonso yina . . .” Yinki? Muntu nyonso yina ke pesa maboko? Muntu nyonso yina ke kota na kati ya maza? Muntu nyonso yina ke vwanda ya dibuundu? Muntu nyonso yina ke lakisa mukanda ya yandi? Muntu nyonso yina ke salaka . . .? Ve! “Muntu nyonso yina ke kwiza na manima ya *vwale*.”

<sup>268</sup> Beno bika Klisto kukwiza na banzila yango; beno ke tuba “Mbote, mu fwana sala yawu. Mu zola ve kukwenda na difelo, yina kele kima mosi. Mu ke kuma ya dibuundu.” Mbote mingi, ba-Lutherien.

<sup>269</sup> “Mbote, mu ke tuba na nge yina, mu ke kwikila ti mu fwana zinga luzingu ya mutindu yankaka, yina mu lenda,” kusantisama na autel. Mbote mingi, ba-Methodiste.

<sup>270</sup> Mbote mingi, mpe kuna muntu nyonso yina *zola*, ti yandi luta vwale ya kupasuka. Oh, nkembo na Nzambi! Mu kele na lweka yankaka. Alleluia na Nkumbu ya Yandi! Oh, la la! Muntu nyonso ke zola, ti yandi pasula yawu, lele ya nela ya luzolo ya yandi mosi, mpe ti Nzambi kukota na ntima ya yandi. Kuna kele Klisto na zulu ya kiti ya Yandi ya lufundusu na kati ya ntima ya muntu! Yinki ke salama?

<sup>271</sup> Beno ke tuba, “Mu fwana . . . Oh, mu—mu lenda tuba bansaka ya mvindu, ya ke fundisa munu ve.” Samu na yinki? Ya kele ve na kima yina Yawu lenda fundisa. Muntu ve kele kuna samu—samu na kubasisa yawu. Muntu ve kele kuna samu—samu na kufundisa nge. “Mbote, mu ke tuba na beno,” bakento ke tubaka, “Mu lenda vwanda na nsuki ya nkufi, ya ke fundisa munu ve.” Kukondwa ntembe! Beno me mona? “Oh, mu lenda lwata kupe . . . Mu lenda sala *yayi*. Mu . . .” Babakala ke tubaka, “Ya ke nyongisa munu ve na kunwa cigare, mpe ya ke nyongisa munu ve na kubula mwa—mwa bakalati mpe kulosa mwa nzeke,” mpe nyonso yina bawu ke salaka. “Ya ke nyongisaka munu ve.” Mpe bawu kele dyaka ya dibuundu, beno me mona, “Ya ke nyongisa munu ve na kusala *yawu*.” Samu na yinki? Samu na yinki? Ya kele ve na kima kuna samu na kusambisa beno.

<sup>272</sup> Kasi ntangu Klisto ke kwiza na kati, beno me sala autel na ntima ya beno mpe masumu ya beno me natama konso kilumbu. Santu ya nene Paul, yandi tubaka, “Mu ke kufwaka konso kilumbu. Ata ti mu ke zinga, kasi *munu* ve ke zinga, Klisto ke zinga na kati ya munu.” Beno tala vwale ya kati. Oh, mpangi ya bakala, mpangi ya kento!

<sup>273</sup> Beto sala mbangu, mu zaba . . . Oh, ve, mu . . . mu ke lenda kaka ve kumanisa yawu, mu me luta ngunga. Beto mona, ti mu kaka . . . Ve, mu ke sala mbote na kubika. Beno me mona, mu zola kubaka bakuluntu makumi zole na yiya, mpe mu zaba ti

mu ke na kangaka beno nyonso na kwenda kudy madya ya beno. Beto ke kaka . . . Beto tala, ti . . . Bantu yikwa ke tuba baka bakuluntu makumi zole na yiya? Kaka . . . [Dibuundu me tuba, “Amen.”—Mu.] Mbote mingi, kaka ntangu fyoti. Mbote mingi, kaka ntangu fyoti. “Bakuluntu makumi zole na yiya,” na yina, beto baka kaka yawu na nswalu ntangu yayi, “na ziunga ya Kiti ya kimfumu, mpe vwandaka makumi zole na . . . na ziunga ya Kiti ya kimfumu.”

<sup>274</sup> Ntangu yayi beno ke mona yina . . . Wapi kisika kele Kiti ya kimfumu ntangu yayi? Na kati ya ntima. Na kati ya ntima ya nani? Bamambele ya Bansungi Sambwadi ya Dibuundu, Klisto! “Kuzonza dyambu na kuteleminaka kimalu ya bawu, beno kele ya kubedisa,” beno ke pesa mvutu samu na yawu na Kilumbu ya Lufundusu. Mpe nani ke sambisa ntoto? Basantu ke sambisa ntoto.

<sup>275</sup> Nani Daniel monaka vwandaka kwiza na makumi ya mafunda na mbala kumi ya mafunda? Basantu. Babuku vwandaka ya kuzibuka, misumuki. Buku yankaka vwandaka ya kuzibuka, ya vwandaka Buku ya Luzingu, mwense ya kulala. Oh, la la, bawu lenda mona yawu ve? Dibuundu ya kulala, bayina kwendaka kutana na Bakala ya makwela, bawu bikaka Mafuta kumanisa na mwinda ya bawu; kotaka ata mbala mosi ve na Yayi, bikaka ata mbala mosi ve Klisto kubaka luyalu samu Yandi sala bimangu mpe kuzonza na bandinga mpe kusala mambu ya ngitukulu mpe bima samu na kulakisa ti Yandi ke zinga na kati ya Dibuundu ya Yandi.

<sup>276</sup> Yinki kana Yesu zolaka kwiza na ntoto mpe kutuba “Mu kele Yesu, mu kele Mwana ya Nzambi,” zolaka sala ata kima ve, ti Yandi zolaka tuba kaka “Mu—mu ke mata awa mpe ke kuma muntu ya dibuundu”? Yina zolaka vwanda Mwana ya Nzambi?

<sup>277</sup> Yinki Yandi tubaka? “Kana Mu ke sala bisalu ya Tata ya Munu ve, na yina beno kwikila Munu ve.”

<sup>278</sup> Oh, la la! Beno me mona? Nzambi ke tubaka Yandi mosi, Yandi zola. Yandi kele Yehowa. Yandi ke zolaka kusala Yandi mosi kuzabana. Oh, mu kele na kyese mingi samu na yawu. Inga, tata. Yandi me zabana na Yandi mosi na munu, mu zaba ti Yandi fwana sala na beno. Bayankaka ya beno bantu ya ntwenya yina me ndima kaka, dyaka beno ve . . . lendaka zaba Yandi ve na kati ya ngolo mpe bima ya nene yina Miklisto ya ntama ke salaka, kasi beno ke na kwizaka kaka na kati ya yawu. Beno ke na kumataka kaka nzila ya Ntinu. Ve . . . Beno landila kaka na kutalaka mpe kudyata kaka na mutindu ya ngolo yina beno lenda. Beno kima mbangu, kima mbangu, kima kaka mbangu na mutindu ya ngolo yina beno lenda. Beno sikama ve samu na kima mosi, beno landila kaka na kukwenda na ntuala.

<sup>279</sup> Mutindu Mpangi ya kento ya mawa Snelling vwanda tubaka:

Mu ke na kukimaka, kukimaka, kukimaka, mu  
me nunga;  
Mu ke na kukimaka, kukimaka, kukimaka, mu  
me nunga;  
Mu ke na kukimaka, kukimaka, kukimaka,  
mpe beno lenda vwanda ve.

Moyo ya kiboba ya mawa, yandi kele kuna bubu yayi.

280 Mbote mingi, ntangu yayi, mpe ya vwandaka—ya vwandaka na bakiti ya kimfumu mpe ya kele, ya kele na makumi. . . ya vwandaka na bakiti yiya mpe makumi zole. Ntangu yayi, yikwa ya ke vwanda, yiya mpe makumi zole? Makumi zole na yiya. Mbote mingi:

*. . . bakiti yiya mpe makumi zole: mpe na zulu ya kiti. . . na zulu ya bakiti mu monaka bakuluntu yiya mpe makumi zole. . . (mosi na mosi na kiti), ya kulwata na bilele ya mpe mbe; mpe bawu vwandaka na zulu ya bayintu ya bawu bayimpu ya wolo.*

281 Ntangu yayi, “bakuluntu makumi zole na yiya.” Mu zola beno kutala ti ba vwandaka ve Bawanzio. Bawanzio kele ya kuvukana ve, Bivangu ya Mazulu kele ya kuvukana ve na yina me tadila bayimpu mpe bakiti ya kimfumu. Beno me mona, bawu ata mbala mosi ve kele ya kuvukana, bawu kele Bawanzio, bawu ata mbala mosi ve kunungaka. Kana beno tala fyoti na ntwala, bankunga yina bawu vwandaka yimba, mpe nyonso, ke lakisa ti kungu vwandaka ve. Beno me mona? Bawu vwandaka yimba nkunga ya mpulusu; na yawu, Bawanzio kele na nsatu ve ya kuvuluswa. Beno me mona? Mbote mingi. Kasi bawu vwandaka bantu ya kuvulusa.

282 Mu kele ve. . . beno bantu, mu ke kuzwa ntangu ve ya kubaka yayi. Kasi beno bayina ke na kusonikaka, kana beno zola kuzaba ti bawu vwandaka bantu ya kuvulusa, beno baka Matthieu 19:28, mbote mingi, 19:28, ya Matthieu, Apocalypse 3:21, mpe beno baka, Apocalypse 20:4, Apocalypse 2:10, Ya Ntete ya Pierre kapu 5:2 mpe 4, ya Zole ya Timothée 4:8. Yina ke sala beno kuzaba ti bawu kele ya kuvuluswa. Mu vwanda zola kulongoka yawu na suka yayi, beno me mona. Mpe beno lendaka sana yawu balumingu, beno me mona. Bawu vwandaka ve—bawu vwandaka ve Bawanzio, bawu vwandaka ve Bivangu ya Mazulu, bawu vwandaka bantu ya kuvulusa. Beno me mona? Beno lendaka tala robe ya bawu, mutindu bawu vwandaka ya kulwata; beno lendaka tala ntelamanu ya bawu, yina vwandaka na bawu; beno tala bankunga, yina bawu vwandaka yimba; mpe beno ke zaba ti bawu vwandaka ve Bawanzio. Hmm.

283 Mu ke yinaka kukuma na yayi, kasi beto tanga Masonuku mosi dyaka. Beno zola? Mbote mingi. Beto vutuka na Daniel 7, kaka mwa ntangu fyoti, na manima awa, na Daniel 7, mpe beto tanga kaka Disonuku mosi awa. Mu zola. . . na yina yayi

ke sadisa beno mingi na nsangu ya suka yayi. Mu ke kwikila ti ya ke—ya ke sala beno kuwa mingi mbote na manima beno ke tanga yayi mpe beno ke mona yayi, beno mona yina Daniel, na kapu 7 ya Daniel, mpe beto banda ntangu yayi na . . . Daniel ya 7, beto baka ya 9 ya ka- . . . nzila ya 9. Ntangu yayi, beno kuwa mbote ntangu yayi na bima yayi:

*Mpe. . . Mu vwandaka tala tii ba vwandaka tula bakiti ya kimfumuu, mpe Kuluntu ya bilumbu vwandaka, yandi yina bilele vwandaka mpembe mutindu mvula ya mpembe, mpe yina nsuki ya yintu ya yandi vwandaka mutindu. . . mika ya kieleka: mpe kiti ya yandi ya kimfumuu vwandaka mutindu mulaka ya tiya, (Beno me mona dyaka, me vutuka na tiya yango ya emeraude.) mpe makulu ya yandi mutindu tiya ke na kuyokamaka.*

*Mpe. . . Nzadi mosi ya tiya vwandaka luta mpe vwandaka basika na ntwala ya yandi: mafunda na bambala ya mafunda sadilaka yandi, mpe makumi ya mafunda na bambala kumi mafunda (Beno tala kukwiza Bayina ba vulusaka.) telamaka na ntwala ya yandi: mpe bazuzi vwandaka, mpe babuku (babuku, mingi) kuzibukaka.*

<sup>284</sup> Ntangu yayi, beno tala, bazuzi yayi vwandaka. Beno me mona? Ntangu yayi, beno tala mbote. Daniel, ntangu yandi monaka bakiti ya kimfumu na lufundusu, ya vwandaka ya mpamba, yandi monaka “ba vwandaka tula bakiti ya kimfumu, yina vwandaka katuka Mazulu, Kuluntu ya bilumbu katukaka Mazulu.” Kasi ntangu Jean kumonaka yawu, Kiti ya kimfumu vwandaka yimeni ya kuvwanda na Yesu, mpe bakiti ya kimfumu ya bilandi mpe batata, bayina ba vulusaka, vwandaka yimeni ya kuvwanda. Beno me mona? Daniel monaka yawu bamvula nkama tanu na ntwala ya ntangu ya Klisto. Mpe na manima ya Klisto, ke sala makumi zole na tanu ya bamvula, mpe Jean kunatamaka na nsungi yina ke kwiza, mpe yandi monaka nyonso yayi kusalama. Kisika, Daniel kumonaka yawu ve, (Beno me mona?) yandi monaka kaka Kuluntu ya bilumbu kukwiza; yandi monaka Yandi ke kukwiza. Kasi ntangu Jean kumonaka Yandi, Kiti ya kimfumu vwandaka ya kubakama, beno me mona, bakiti ya kimfumu kutulamaka na Kuluntu ya bilumbu, mpe Bazuzi kuvwandaka. Kasi ntangu Jean kumonaka Yandi, bakuluntu vwandaka ntete ve ya kusola na ntangu ya Jean. . . to na ntangu ya Daniel, kasi ba vwandaka yimeni ya kuvulusa na ntangu ya nsuka. . . ? . . . Oh la la! Oh, yina kele ve. . . Yandi kele mbote ve?

<sup>285</sup> Na yawu, Daniel ya 7, yandi. . . yinki Daniel salaka? Yandi monaka Lufundusu na ntwala, yandi monaka bakiti ya kimfumu vwandaka ya mpamba. Beno me mona, yawu zolaka vwanda ya mpamba. Na yina Jean na ntangu ya yandi, na manima Dibuundu me zanguka, bawu vwandaka ya kubakama na bakuluntu yina ba vulusaka. Hmm.

286 Yinki zola kutuba *kuluntu*? Kana beno baka mpova *kuluntu*, mu kele na . . . bansasa nyonso yayi ya kusonika awa, mu ke luta kaka. *Kuluntu* zola kutuba “mfumu ya mbanza” to “mfumu ya dikanda.” *Kuluntu*, “mfumu ya kima mosi.” Mutindu mu—mu ke vwanda. . . Mpangi Neville ntangu yayi kele kuluntu ya dibuundu yayi. Yinki yandi kele? Yandi kele mfumu ya nzutu yayi awa. Beno me mona? Mpe mfumu ya mbanza ke vwanda kuluntu ya mbanza yayi; beno me mona, kuluntu ya bambanza. Beno ke bambuka moyo na ntangu ya ntama na kati ya Biblia, bakuluntu ya mbanza? *Kuluntu* zola kutuba “mfumu ya mbanza” to “mfumu ya dikanda.”

287 Ntangu yayi, bawu vwandaka bantu yikwa? Makumi zole na yiya, bakuluntu makumi zole na yiya. Ya kele kieleka? Ntangu yayi. . . Oh, la la! Nani ya vwandaka? Bantumwa kumi na zole mpe makanda kumi na zole ya Israël, bankooko kumi na zole. . . . Ntangu yayi, beto ke baka kaka yawu ntangu yayi na yina beto ke kota na baleso yankaka, mpe kulakisa ti ya kele kieleka, na yawu beno, mu kele na nsayi ti beno ke na kusonikaka yawu ntangu yayi. Beno me mona? Batata kumi na zole mpe makanda kumi na zole ya Israël! Ntangu yayi, beno tala mbote. Yesu tubaka ti. . .

288 Pierre yufulaka kilumbu mosi, yandi tubaka, “Yinki beto ke kuzwa? Beto me bika tata, mama, bakala, kento, bana, nyonso yankaka, beto me bika nyonso.” Pierre tubaka, “Beto me bika bakento ya beto, beto me bika bana ya beto, beto me bika tata ya beto mpe mama ya beto, bayinzo mpe bayinsi ya beto, samu na kulanda Nge.”

289 Yandi tubaka, “Ya kieleka, ya kieleka Mu ke tuba na beno, ti beno ke vwanda na bakiti kumi na zole ya kimfumu na kusambisaka makanda kumi na zole.” Beno tala, yina kele bayina ba vulusaka, bakuluntu yina ba vulusaka.

290 Beno tala—beno tala na David yina ke fwanikisa Klisto. Beno me mona? Ntangu David vwandaka kota na lutumu, kima ya ntete, yandi kuzwaka ntangu mosi ya mpasi mingi ntete yandi kuzwa lutumu. Ata ti yandi vwandaka na kupakulama na zulu ya yandi, yinga, kupakulama vwandaka na zulu ya yandi. Mpe bantu mingi banzaka “Yandi vwandaka kaka mwa kimpumbulu, ntwenya ya bakala yina vwandaka mutindu yankaka, yina vwandaka meka na kubebisa mwa kima mosi.” Kasi ya kele na bantu yina zabaka ti yandi vwandaka kwiza ntinu, ba vwandaka kaka na yandi. Mpangi, mu zola kutuba ti beno lendaka nata bawu ntama na yandi ve, na yina bawu vwandaka kwenda.

291 Kilumbu mosi yandi telemaka kuna na mongo, yandi talaka na yisi mpe monaka mwa ya yandi mosi, mbanza ya luzolo ya kuyala na mbeni. Mpe yandi telemaka kuna mpe yandi bambuka moyo na ntangu yandi vwandaka mwana ya fyoti ya bakala, yandi vwanda nataka mameme kuna mpe bawu vwanda kunwaka maza yina, ya vwandaka maza ya kieleka. (Beto



zonzilaka na yawu awa ntama mingi ve, *Bamaza ya Luzingu.*) Mpe yandi yina kuna, “Banzaka, mu kunwaka maza ya yawu.”

<sup>292</sup> Mpe nsatu ya yandi ya fyoti vwandaka lutumu samu na bantu yina vwandaka na yandi. Mpangi, zole ya bantu yango kusimbaka bambele ya bawu mpe salaka bakilometele makumi zole na yiya na kati ya ba-Philistin, na kubebisa bawu kubanda lubakala na lumoso, samu na kuzwa samu na yandi maza ya kunwa na dibulu ya maza. Bawu zabaka ti yandi vwandaka kota na lutumu. Yinga, tata. Kilumbu mosi, mosi ya bawu, samu na kuvulusa yandi, kotaka na dibulu mpe kufwaka nkosi, yandi mosi. Ba vwandaka binwani. Mpe ntangu—ntangu yandi kotaka na lutumu, beno zaba yinki yandi salaka? Yandi salaka mosi na mosi ya bawu mfumu na zulu ya mbanza mosi.

<sup>293</sup> Beno ke mona Klisto kuna? “Yandi yina ke nunga ke yala mbanza.” Minungi! Bubu yayi ntangu beto ke mona ti Yandi ke kota na lutumu, Klisto ke yala na yinza yayi. Allemagne, mpe Etats-Unis, mpe nyonso ke kubwa, konso yinsi fwana kubwa. Bimfumu ya yinza yayi me kuma bimfumu ya Nzambi ya beto mpe ya Klisto ya Yandi, mpe Yandi ke twadisa mpe ke yala na zulu ya bawu. Ya kele kieleka.

<sup>294</sup> Beto zaba ti Yandi ke na kukwizaka na kukota na lutumu, na yawu nsatu ya Yandi ya fyoti kele lutumu samu na beto! “Yandi zola ti mu monikisa Yandi na mwa Tombouctou mosi ya fyoti kisika ya kele ve na ba-centime makumi tanu ya mbongo, kisika ya kele na kima ve, to nkonga ya bantu ya bantu ya mputu,” yina kele nsatu mosi. Amen!

<sup>295</sup> “Beni kele na nsatu ya kuzwa bantu mingi ve, beno kele na nsatu ya kusala *yayi* ve, beno tuba kaka na munu ti Yandi zola kukwenda.” Amen. Kaka yina.

<sup>296</sup> “Kana Yandi zola ti mu sala mutindu yankaka, kusala mutindu yankaka,” mutindu bampangi ya bakento yayi mpe nyonso, “kana Yandi zola ti mu sala kima mosi, nkembo na Nzambi, ya kele bweso samu na munu na kusala yawu.” Yawu yina! Beto zaba ti Yandi ke na kwiza na kukota na lutumu, ata yina yinza ke tuba. “Kana mu fwana losa konso kizitu mpe ti masumu ke kangaka munu kukondwa mpati, bika mu kima mbangu na mvibudulu samu na lukanu yina kele na ntwala ya munu. Bika mu tala na Nsoniki mpe Mumanisi ya Lukwikilu ya beto, Yesu Klisto.” Yina ke na kwizaka na kukota na lutumu!

<sup>297</sup> Ti “bakuluntu,” bakuluntu makumi zole na yiya. Mbote mingi. Kumi na zole. . . Kuna na Apocalypse, beto ke tala yayi. Na Buku ya Apocalypse, na kapu ya 21, beto ke tala ti mbanza ya Jérusalem vwandaka na balufulu kumi na zole. Ya kieleka? Mpe yawu vwandaka na myelo kumi na zole, yina vwandaka tatu na lweka mosi-mosi, tanu na yiya kele kumi na zole. Kaka mutindu tabernacle vwandaka ya kuvwanda na ntoto ya kuyuma, samu ti Jean tubaka kieleka mpe yandi monaka kieleka kima mosi yina

Moise kumonaka ntangu yandi vwandaka na zulu kuna, kima mutindu mosi na yina Paul kumonaka.

<sup>298</sup> Mpe ntangu yayi beto ke tala ti balufulu kumi na zole vwandaka bankumbu ya bantumwa. Mpe myelo kumi na zole vwandaka na nkumbu ya konso dikanda na zulu ya mwelo. Mutindu beto ke tala na yawu mpe ke mona bakuluntu kumi na zole, makanda kumi na zole, bantumwa kumi na zole, balufulu kumi na zole, myelo kumi na zole! Oh, la la! Beno baka balutangu yango ya Nzambi mpe beno lendaka kondwa yawu ata fyoti ve, yawu ke kwenda kaka mbala mosi bisika nyonso konso ntangu.

<sup>299</sup> Ya kele samu na yina, beno me mona, beto kele na bilumbu sambanu yayi yina yinza me salaka, mpe beto kele ntama mingi pene-pene na kilumbu ya sambwadi ntangu yayi. Na bamvula mafunda zole ya ntete, Nzambi bebisaka maza . . . yinza na maza. Na bamvula mafunda zole ya zole, Klisto kwizaka. Yayi kele mvula ya 1961, kaka na kyelo, kaka ntangu fyoti. Mpe beno tala, Yesu tubaka, “Ntangu yayi, ya ke tambula ve nzila nyonso,” Yandi tubaka, “samu ti mu fwana zenga kisalu nkufi. Kana Mu sala yawu ve, bombe atomique ke kufwa nsuni nyonso. Uh-huh. Samu na luzolo ya Muponami, Mu ke zenga kisalu nkufi samu na ludedomo. Mu ke kumisa nkufi, ndambu ya ntangu.” Beno me mona, na manima bamvula mafunda Millenium, Kilumbu ya nene.

<sup>300</sup> Na yina Dibuundu me sala bamvula mafunda sambanu na kuteleminaka disumu, mpe funda ya sambwadi kele Millenium. Mutindu Nzambi salaka bamvula mafunda sambanu samu na kutunga yinza, mpe na funda ya sambwadi Yandi kupemaka na bisalu ya Yandi nyonso. Mpe Dibuundu ke sala bamvula mafunda sambanu na kuteleminaka disumu, mpe na funda ya sambwadi Dibuundu ke pema.

<sup>301</sup> Ba- robe ya mpembe yina bakuluntu lwataka kele ludedomo ya Basantu. *Mpembe* zola kutuba “ludedomo.” Mpe samu ti bawu vwandaka ya *kulwata ba-robe* ke lakisa ti bawu vwandaka “banganga-Nzambi to bazuzi,” ya kulwata ba-robe ya mpembe, banganga-Nzambi, bazuzi, bapofete, nyonso yina; beno mona, yina bawu vwandaka. Ba vwandaka ya kulwata ba-robe ya mpembe, bakuluntu makumi zole mpe yiya. Ya ke vwanda bakuluntu makumi zole mpe yiya. Ya ke vwanda na kumi zole ya bawu samu na makanda kumi na zole ya Israël; bantumwa kumi na zole samu na Dibuundu.

<sup>302</sup> Mpe bawu ke vwanda na mantwala ya Ntinu ya nene. Beno bambuka moyo, bawu kele ya kuvwanda kuna, *bayayi* kele. Mpe *awa* kele Kento ya makwela mpe Klisto ya kuvwanda na zulu ya Kiti ya Yandi ya kimfumu, mpe Kento ya Yandi ya kuvwanda na lweka ya Yandi, Dibuundu. Bakuluntu makumi zole mpe yiya . . . Bankama mpe makumi yiya na yiya ya mafunda ya bakalaka ya nene ya tempelo yina ke na kusalaka samu na Yandi. Kisika

Yandi ke mata, Kento ya Yandi ke kwenda na Yandi. Oh, oh la la!  
Na kati ya Nsungi yina ya nene yina ke na kwiza, ntangu disumu  
nyonso mpe kifwani ya masumu . . .

<sup>303</sup> Nyonso ya nene, bayinzo ya nene yina bantu ke na kuzolaka  
mingi bubu yayi, mbongo nyonso mpe kulula mpe disumu nyonso  
mpe bakento mpe babakala ya kitoko, mpe nyonso yina bawu  
ke na kumekaka na kusala na banzutu ya bawu, kima mosi  
to yankaka, samu na kuvwanda mutambu ya dyabulu samu  
na kufidisa myoyo ya bawu na difelo, ke kufwa mpe ke bola,  
mpe misobi ke kudya yawu. Mpe kima ya ntete, misobi ya  
nzutu . . . nyonso yina bawu vwandaka ntete ke kota kaka na  
tija ya volkan ke vutuka kima ve kasi mvindu mpe—mpe nyonso  
mbombi ya volkan.

<sup>304</sup> Kasi mosi ya basuka yayi, nkundi, mosi ya suka yayi, ntangu  
nyonso me suka, yandi ke basika dyaka. Bilanga na mpembe  
ya ba-trefle mpe mananasi ya ba-rose ke vukana na bafololo  
ya Yinti ya Luzingu, mpe Klisto ke vutuka suka mosi. Ntangu  
bandeke ya nene, bayembe, ke vwanda na bayinti mpe ke  
yimbila, mpe lufwa ke vwanda dyaka ve mpe mawa dyaka ve.  
Klisto mpe bantu ya Yandi yina ba me Vulusa ke vutuka na ntoto;  
biboba ve, kasi kukonda nsuka nyonso. Bayina ke kufwa ve, beto  
ke telama na kifwani ya Yandi, mwini mpe bambwetete ke lutila  
na kulezima.

Mu ke na nzila ya Mbanza yina ya kitoko  
Yina Mfumu ya munu me yidika samu na  
Bantu ya Yandi;  
Kisika bantu yina nyonso ba vulusaka na  
bansungi nyonso  
Ke yimbilaa “Nkembo!” pene-pene ya Kiti ya  
kimfumu ya Mpembe.  
Bantangu yankaka mu ke belaka samu na  
Mazulu  
Mpe nkembo ke tala:  
Wapi kyese ya ke vwanda ntangu mu ke mona  
Mvulusi ya munu,  
Na Mbanza yina ya kitoko ya wolo!

Mutindu mu zola kumona Yandi! Oh, mu zola kumona  
Yandi!

Mu ke na nzila ya Mbanza yina ya kitoko.

<sup>305</sup> Jean monaka yawu, na kisanga ya Patmos, na kukulumukaka  
mutindu Kento ya makwela yina me yilama samu na bakala ya  
yandi. Nkembo ya yawu mu zola tala, kilumbu mosi.

Mu zola kumona Yandi, mpe kutala kizizi ya  
Yandi,  
Kuna kuyimba kukondwa nsuka lemvo ya  
Yandi ya mpulusu;

Na babala-bala ya Nkembo ti mu zangula  
 ndinga ya munu;  
 Bampasi nyonso me luta, na nsuka na yinzo,  
 kukembila ntangu nyonso.

<sup>306</sup> Kubwa mpe kusyelumuka fyoti na mvula ya mpembe, ndungutula ya fyoti mpe bampasi ya kilumbu; mu ke zola kana ti kento ya munu mpe Mabel lendaka belama mpe kuyimba nkunga yina samu na munu, kana mu—mu lendaka, “Bampasi ya nzila ke monana kima ve, ntangu mu ke kuma na nsuka ya nzila.” Ya kele kieleka.

<sup>307</sup> Mu ke bambuka moyo nkokila yina ntangu mu bikaka dibuundu samu na kubanda kosalu ya kumwangisa nsangu, ntangu beno nyonso vwandaka dila; ata mosi ya bawu me bikana, na mpasi, mu banza ndambu ya beno awa. Mpangi ya kento mpe Mpangi Spencer, mpe ya lendaka vwanda bantu ndambu ya ntangu ya ntama, na ntangu bawu kudilaka awa. Kasi ntangu Mpeve-Santu tubaka, “Nge fwana kwenda!”

<sup>308</sup> Mpe mu ke bambuka moyo na lukutakanu ya munu ya ntete na manima mu kwendaka bangonda, Meda kwizaka na Jonesboro, Becky vwandaka kaka mwa mwana ya fyoti, bawu kwizaka na masini ya ntama ya Cottonbelt, ya bakaka bawu bilumbu na kukuma kuna. Mpe mu vwandaka ya kutelama kuna ntangu yandi kwizaka na nkokila yina. Beto mekaka na kukuma na kivinga, na babloke tatu ya bayinzo, bapulusu vwandaka bongisa na babala-bala mutindu yina. Babala-bala mpe vwandaka ya kifuluka. Ya lungaka ti ba lutisa munu na babala-bala mpe kulutula bisika yankaka samu ti mu kota na kivinga. Meda tubaka, “Bawu me kwiza kuwa nge kulonga, Bill?”

<sup>309</sup> Mu tubaka, “Ve.” Na manima beto yimbaka:

Bawu katukaka Esete mpe Wesete,  
 Bawu katukaka na ntoto ya ntama,  
 Samu na kusala feti na Ntinu ya beto, samu na  
 kudya mutindu banzenza ya Yandi;  
 Mutindu kele ya kusakumuna bizyeti yayi!  
 Na kutalaka kizizi ya Yandi ya santu  
 Kulezima na zola ya Kinzambi;  
 Bayina ke vwanda ya kusakumuna na lemvo ya  
 Yandi,  
 Mutindu misanga na yimpu ya Yandi ke lezima.

Oh, Yesu ke na kwiza ntama mingi ve,  
 Bakumekama ya beto ke suka kuna.  
 Oh, yinki kana Mfumu ya beto na ntangu yayi  
 lendaka kwiza

Samu na bayina kele na kimpwanza na disumu?

Oh, na yina ya ke nata beno kyese,

To mawa mpe kiadi ya kati?

Ntangu Mfumu ya beto na nkembo ke kwiza,

Beto ke kutana na Yandi na zulu.

<sup>310</sup> Amen! Oh, mu zola Yandi! Ya ke nata beno mawa mpe kyadi mingi, to ya ke nata beno kyese? Ntangu Mfumu ya beto na nkembo ke kwiza, beto ke kutana na Yandi na zulu. Na mabanza yina na dibanza ya beto, beto kulumusa bayintu ya beto. Kana Mfumu kuzola, mu ke manisa lukutakanu yayi mbala yankaka.

<sup>311</sup> Tata ya beto ya Mazulu, oh, bawu ke katuka Esete mpe Wesete, bawu ke katuka na ntoto ya ntama. Mu ke na kubanza na Enlevement ya nene yina. Bantu yina mu me longi na Afrika, na Inde, mpe bisika nyonso na yinza, mutindu mu ke mona dyaka kizizi ya bawu. Mingi ya bawu vwandaka dila, na kukwendaka na aeroport, mpe vwandaka kangama na bibaka ya bisengo mpe vwandaka boka mpe kudila. Mu ke banza na ntangu bawu kwendaka na Paul kilumbu mosi, bawu fukamaka mpe bawu sambilaka. Yandi tubaka, “Mu ke kwikila ve ti ata mosi ya beno. . . mingi na kati ya beno awa ke mona dyaka ve kizizi ya munu.”

Kasi bawu ke katuka Esete mpe Wesete,

Bawu ke katuka na ntoto ya ntama,

Samu na kusala feti na Ntinu ya beto, samu na

kudya mutindu banzenza ya Yandi;

Mutindu kele ya kusakumuna bizyeti yayi!

Na kutalaka kizizi ya Yandi ya santu (na nkembo ya emeraude,)

Kulezima na Nsemo ya Kinzambi;

Kaka ve minda to buzi, kasi—kasi Nsemo ya Kinzambi.

Kulezima na Nsemo ya Kinzambi;

Bayina ke vwanda ya kusakumuna na lemvo ya

Yandi,

Mutindu misanga na yimpu ya Yandi ke lezima.

O Nzambi!

Ntangu makala ya Tiya simbaka profete,

Kusalaka yandi ya kuvedila mutindu kuvedila

yandi lendaka vwanda,

Ntangu Ndinga ya Nzambi tubaka, “Nani ke

kwenda samu na beto?”

Na manima yandi pesaka mvutu, “Munu yandi

yayi, fidisa munu.”

<sup>312</sup> Oh, tinda Wanzio na suka yayi, Bakeluba na mapapu sambanu, mutindu Ésaïe kumonaka yawu, na kuluta na kivinga, na kubokaka, “Santu, santu, santu, kele Mfumu.” Mpe ntwenya ya profete Ésaïe kutubaka, “Mu kele na bikoba ya mvindu, mpe

kele na kati-kati ya bantu ya masumu, mpe meso ya munu me mona Nkembo ya Mfumu.” Makunzi ya tempelo kuninganaka. Mpe Wanzio bakaka ba-pense ya kisengo na autel, mpe kuzwaka dikala ya tiya mpe tulaka yawu na zulu ya bikoba ya yandi, tubaka, “Mu me vedisa bikoba ya nge. Ntangu yayi pesa profesii, mwana ya muntu.” Fidisa Wanzio na suka yayi, Mfumu, na kuvedisa bikoba ya beto na yimbi nyonso. Vedisa bantima ya beto, mpe kota, Mfumu. Zenga luzolo ya munu mosi. Ti . . . ti luzolo ya munu (na Nge) kuvwanda Luzolo ya Nge, Mfumu. Oh, ti Luzolo ya Nge kuvwanda na kati ya munu, O Nzambi. Mpe ti munu mpe dibuundu ya munu mpe bantu ya munu kuvwanda ya nge, O Mfumu. Beto ke kukipesa beto mosi na Nge.

<sup>313</sup> Mpe mutindu powete tubaka, Tata:

Mafuku ya bantu ntangu yayi ke na kufwaka  
na disumu mpe nsoni;

Kuna na Afrique, kuna na Inde, bisika nyonso na yinza, mafunda na ngunga mosi, mpe ke kutana na Nge kukondwa kuza Nge.

Mafuku ntangu yayi na disumu ke na kufwa  
mpe nsoni;

Dyaka, Nzambi, ya ke pasula moyo ya munu na bitini-bitini na kubanza na yawu.

Kuwa kudila mpe kuboka ya mawa ya bawu;  
Sala mbangu, mpangi, sala mbangu na  
kiswamunu;  
Pesa na nswalu mvutu, “Mfumu, munu yandi  
yayi.”

<sup>314</sup> Pesa yawu, Mfumu, pesa yawu dyaka. Mu me salaka mitindu nyonso ya bafoti, Tata, na nzila ya mvula yayi me luta, mu ke sambila ti Nge lemvokila munu samu na yawu. Mpe samu na Mvula ya Malu-malu yayi, Mfumu, kusa munu dyaka. Ti mu kwenda na mafuku yango yina kele ya kuvwanda kuna na kati ya disumu mpe na nsoni, ke na kufwaka, samu na kupesa bawu luzayikisu yayi ya nene ya Kieleka ya Nge, na kunataka na bawu kupakulama ya Mpeve-Santu; ti na kilumbu yina ba lendaka katuka Esete mpe Wesete, na kulezimaka mutindu misanga na Yimpu ya Nge. Sadisa munu, Mfumu, na kukwenda kuna mpe kusosa mpe kubasisa bawu na ntoto, na mvindu ya ntoto, na mvindu mpe yimbi na yina bawu ke na kuzingaka. Mpe ti bawu kumona Nzambi ya Santu yina ke sala ti bawu kuvwanda ya sukula mpe kuzinga mutindu Miklisto, ya kusantisama mpe ya kuvedila na ntwala ya Nge; na kubalukaka na yimbi, na mitindu nyonso ya bansaka ya yinza, mpe kubaluka na Nzambi ya moyo, mpe me sala bawu bangezi ya Kimfumu ya Nge samu na kilumbu yina ya nene.

<sup>315</sup> Santisa mwa dibuundu yayi na suka yayi, Mfumu. Santisa konso muntu na kati awa na Mpeve ya Nge, mpe bika ti Mpeve-

Santu kukwiza na bantima ya bawu, na mosi na mosi ya beto. Vutula ya malu-malu Mpeve na bayina kele yimeni ya ku- . . . zibula ntima ya bawu na luzolo ya bawu mosi, me manga luzolo ya bawu mosi mpe me kwiza na kuzaba Luzolo ya Nge.

<sup>316</sup> Bantwenya ya bayayi, Mfumu, mingi ya bawu kaka mwa ba-bébé. Mutindu Nge ke bombaka bawu na maboko ya Nge! Mutindu mama ke kebaka mwana ya yandi, na kukatulaka maza ya meso na meso ya bawu mpe—mpe ke pesa bawu bima ya mutindu yankaka samu ti yandi zola bawu. Ya kele mutindu Nge zola bana ya Nge yina me butama malu-malu, Mfumu. Bawu lenda kutambula ntete ve, bawu lenda tuba ntete ve. Kima kaka bawu lenda sala kele kudila mpe kutala na Mama. O Nzambi, simba bawu na maboko ya Nge, na malembe, mutindu bana ya mameme, mpe twadisa bawu tii kuna bawu ke kula. Na yina twadisa bawu, Mfumu, kuna na nzila ya kisalu. Pesa yawu.

<sup>317</sup> Lemvokila beto masumu ya beto, mutindu beto ke lemvokilaka bayina ke salaka beto yimbi. Twadisa beto ve na mpukumunu, kasi katula beto na yimbi. Samu ti na Nge kele Kimfumu, mpe ngolo, mpe nkembo, ntangu nyonso, na Nkumbu ya Yesu Klisto. Amen.

<sup>318</sup> Nzambi sakumuna beno! Mu ke na kivuvu ti Mfumu me sala kima samu na beno na suka yayi samu na kusala beno kubanda Mvula ya Malu-malu na zulu ya kima mosi yayi, ti beno ke zola Yesu Klisto, mpe kilumbu mosi beno ke zola kumona Yandi mpe kuzola Yandi mpe kuzinga na Yandi kukonda nsuka. Ya kele nsatu ya munu ti mosi ve na kati ya beno kuzimbana, ti mosi na mosi ya beno kuzwa mpulusu mpe kuvwanda ya kifuluka na Mpeve-Santu, mpe kuvwanda ya kukeba na kilumbu yina ya Nkwizulu ya Yandi, samu ti mu ke kwikila ti ntangu me kuma pene-pene.

Ntangu yayi mu ke vutula kisalu na Mpangi Neville.



*APOCALYPSE, KAPU YA YIYA KITINI YA II* KNG61-0101

(Revelation, Chapter Four Part II)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 1 ya Ngonda ya ntete, na mvula 1961, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)



## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)